

# KONDIMISA LILOBA NA YE



Tótikala ya kotelema wana togumbi mitó.

Nkolo Yesu, tozongisi matondi epai na Yo na ntongo oyo mpo na litómba ya koya Liboso na Yo na ndako na Yo, epai wapi libota na Yo bayangani na Nkombo na Yo. Mpe nyonso ezali ya Yo, Nkolo. Mpe tomitiki sikawa na maboko na Yo, mpo na mposa monene oyo tozali na yango na mitema na biso, ya ko—kosala mosala mpo na baoyo bazangi Nzambe mpe bazangi Klisto, ete bábikisama, mpe babeli bábika, ná basantu bápambolama. Kokisa yango, Nkolo. Bongo na nsuka, tokogúmba mitó na komikitisa mpe kopesa Yo nkembo mpo na nyonso oyo Okosala na nzela na biso lelo. Mpo tosengi yango na Nkombo na Yesu. Amen.

<sup>2</sup> Bokoki kofanda. Nazali mpenza kozongisa matondi mpo na litómba ya kozala lisusu awa lelo, mpe mpo na bino oyo bosali mobembo molai mpenza mpo na koya koyoka Nsango, na liyangani ya ntongo oyo. Nayebi ete boyei te kaka mpo na komona to koyoka ngai, boyei nde kokutana na Nkolo Yesu. Na bongo, natii motema ete Akopesa bino mposa ya mitema na bino.

<sup>3</sup> Sikawa nazo—nazongi, nayezi lisusu, namemaki libota na Tucson mpe nazongi. Nalembi mpe ná kolemba mpenza na nzoto. Na eleko ya eté mobimba oyo, nazalaki ntango nyonso kobima, kobanda sanza ya Liboso, mpe sikawa nayezi mpo na kokende na Kentucky na mpóso oyo, kokende bokila ná baninga, mpo na komeka kopema mwa moke. Epésaka ngai motema likolólikoló, boyebi, boye, naza . . . Ngai ná Billy, biso mibale, tosili mpenza, bongo to—tobondeli ete Nzambe ázunga biso na mpóso oyo tópepa.

<sup>4</sup> Soki Nkolo alingi, nakolinga koya lisusu awa mokolo ya Lomingo ekoya, soki Nkolo alingi. Mpe nalingi kosala liyangani ya ndenge mosusu Lomingo ekoya. Nalingi kosala likambo moko oyo ekeseni mwa moke na bo momesano. Sikawa, nazali koloba yango mpo bato oyo bako . . . ntango mosusu bakosepela na bango te koya, kasi tobondelaka ntango nyonso mpo na babeli, soki Nkolo alingi, ntango bato bayáka. Bongo, mokolo ya Lomingo ekoya, nalingi koyeba eloko nini ezali na mitema na bino. Na—nalingi ete bókoma yango, lelo, ntango bokobima, mpe bótia yango likoló na eteyelo, Ndeko Neville akopesa yango na Billy Paul, mpe ye akopesa ngai yango, eloko oyo ezali na mitema na bino. Bóloba kaka . . . soki ezali motuna ya Biblia, na momesano nasálaka yango bongo. Nakofungola yango mpe nakokende na yango mwa mosika sikawa, ntango mosusu ezali na likambo moko na motema na yo, oyo—oyo o—okokaka kosilisa te na lolenge moko boye, ndakisa, ozali, oh, ntango mosusu, na

likambo moko na ndako. Ozali na ntina ya kokoma nkombo na yo likoló na yango te, kasi kaka: “Mobali na ngai asalaka boye-na-boyé mpe etungisaka ngai.” “Mwasi na ngai asalaka boye-na-boyé.” “Mpe—mpe li—likambo moko boye esalemaka na bomoi na ngai,” to—to likambo moko, oyebi, kaka oyo ezali na motema na yo, likambo moko oyo etungisaka yo. Nakanisi ete ekozala malamú. Boye te? Na bongo ekoki kosalema wana, ete ntango mosusu otuni motuna mpe ngai nayanoli mpo na moto mosusu. Bomoni, bakoki kozala na motungisi yango moko. Kaka eloko oyo ezali na motema na yo, komá yango na mokuse ndenge ekoki, ndakisa: “Nazali na mwana moko oyo, ezali komonana lokola akómi na makambo mabe, nasengeli kosala nini?” “Nazali na mo—mobali oyo alingi koya na losambo elongo na ngai te. Akomi kosala lofundo na ngai, nasengeli kosala nini?” To, mwasi, ndenge moko. To—to, boyebi: “Biblia elobi *boye* na esika moko mpe *boye* na esika mosusu, nazosolala yango te. Makambo oyo, nakolinga koyeba nini Yango elingi koloba.” “Mpe nasengeli kosala nini, lokola Moklisto, ntango nazali kosala mosala na biró mpe mokonzi alobi makambo boye-na-boyé, mpe asengi ngai nákende elongo na ye na fėti, mpe na fėti yango, bamelaka masanga, násala nini?” Bomoni, kaka, boyebi, makambo ya ndenge wana, oyo ezalaka na makanisi ya bato. Tolingi bókomá yango.

<sup>5</sup> Mpe na yango, na bongo na—nasengeli kozonga, nsima na wana, na Arizona. Mpe nakanisaki ete nako—nakozua libaku malamú ya kosunga bino mwa moke mpo bósosola, na makoki na ngai nyonso. Nakosepela kozala na ebele mpenza, oyo ekoki kotiana na eteyelo lelé, liboso bókende. Bókoma yango mpe bótiya yango awa, mpe—mpe Ndeko Neville to moko na bango akopesa ngai yango. Mpe na mpóso oyo, kuna na ngomba, nakozua li—libaku ya koyekola yango mpe—mpe kobondela mpo na yango, mpo na kozua eyano ya Makomi mpo na bino na nyonso oyo nakokoka, mpo na kosunga bino. Mpo yango nde ntina oyo tosangani awa, ezali mpo na kosungana. Bomoni? Bosungaka ngai ntango bobóndelaka mpo na ngai, mpe nákolikia ete nakoki kosunga bino. Sikawa, na bongo, bóbosana te, ekozala mokolo ya Lomingo na ntongo.

<sup>6</sup> Sikawa, lelo, tozali...tozali na bapaya elongo ná biso, lokola na momesano. Bato boni bauti na ntaka ya kilometre koleka mokama na ndambo, bótombola loboko? Bazali ntuku libwa na libwa likoló na mokama ya eyanganelo. Eleki mwa ba-Lomingo, nalobaki: “Bato boni bauti na ntaka *boye*,” to eloko moko ya ndenge wana, mpe loboko ya moto moko te etombwamaki koloba ete bauti na Jeffersonville. Ha! Na mokolo oyo elandaki, ata bongo, balobaki: “Ndeko Branham, bapaya nyonso nde bakotaki na kati,” mpe balobaki, “totikelaki bango bisika na biso na kati ya losambo.” Boye balobaki ete bayaki, nkama na nkama bayaki kasi bakokaki kokota te, balobaki:

“Mpo tomonaki bapaya, omoni.” Sikawa, ezali malamumu mpo na bato ya Jeffersonville na zinga-zinga awa. To—tozali—tozóngisi matondi mpo na yango, bato ya Jeffersonville ná New Albany, ná bato ya zinga-zinga. Tozóngisi matondi mpo na yango. Bato boni bauti na ntaka ya kilometre koleka nkoto na ndambo? Oh, la la! Bato boni bauti na ntaka ya kilometre koleka nkoto na ndambo, bótombola maboko? Oh, la la! Ezali malamumu. Ezali . . .

<sup>7</sup> Mokolo ya Lomingu loleki, eleki mpóso moko, nateyaki likoló na *Efandelo Ekoya Ya Mwasi-na-libala Ná Mobali-na-libala*, mpe nakanisi ete toutaki na zinga-zinga ya kilometre nkoto mibale na ndambo. Mpe, esalemaki ete, yango nde ezalaki mpenza monene ya Engumba oyo nazalaki kolobela, kilometre nkoto mibale na ndambo. Nasalaka feti ná Yango kobanda wana, koyebáká ete ntango bomoi oyo ekosila, nakokende na Engumba wana. Nazokende na Engumba yango, mpe eloko mosusu nyonso ezali na ntina te. Bongo soki moi ebimi lelo te, to lobi etikali koya mpe te, bokeseni nini yango ekosala? Tozali na Ndako moko, Esika ya kopema. Tólemba to tólemba te, tozali kaka na Esika ya kopema wana. Okoloba: “Wana ezali na yango ndoto ya moto ya mobange.” Te, ezali yango te. Ezali yango te. Ezali Solo ya Biblia.

<sup>8</sup> Na mpokwa moko, nsima na koteya awa, mobali moko ayaki mbangu nsima na etumbelo awa, wana nazalaki kobima na ekuke, bazalaki koluka komema ngai kino na motuka. Mpe elenge mobali oyo alobaki: “Nalingi koloba na yo liloba moko mpamba.” Billy ná bandeko mosusu bazalaki koluka komema ngai kino na motuka. Alobaki: “Nakoki koloba liloba moko yango?”

Nalobaki: “Lobá, mesie.”

<sup>9</sup> Alobaki: “Ozalaki kolobela, na mpokwa oyo, kogángeláká mpenza bási, lolenge bazalaki koláta bilamba, kolátáká bilamba wana.” Alobaki: “Mobali ya mibu na yo akokanisa bongo, kasi soki ozalaki na mibu na ngai, olingaki kokanisa ndenge mosusu.”

Nalobaki: “Ozali na mibu boni?”

Alobaki: “Nazali na mibu ntuku mibale na nsambo.”

<sup>10</sup> Nalobaki: “Ntango nazalaki na mibu zomi, zomi na mitano elenge koleka yo, nazalaki koteya ndenge moko.” Bomoni? Nalobaki: “Etali likambo oyo ezali na motema na yo, mwana mobali. Miso na yo emonaka na nzela ya motema na yo.” Mpe akitisaki kaka motó mpe akendeki. Nabanzi eyano mosusu koleka yango ezali te. Bomoni, etalaka eloko oyo ezali *awa* na kati, yango nde ekobima *awa* mpe *awa*. Bomoni, Yesu alobaki: “Soki olobi likambo oyo ekeseni na oyo ezali *awa* na kati, na bongo, okómi mokosi.”

<sup>11</sup> Nazali na esengo na ntongo oyo, esika moko na kati ya eyanganelo, ya kozala na mo—moninga na ngai moko ya motuya mpenza, ndeko, Révérend Eddie Byskal ná mwasi na ye mpe

bana. Nabanzi ete bakómaki na liyangani na ntongo oyo. Eddie, ozali awa? Na—nakanisaki ete o. . . Ee, ntango mosusu akokaki koya te. Ndeko, oh, iyo, kuna. . . Sikawa, oyo wana ezali litúmu ya ba “amen” te, Eddie. Bokoki komata awa na etumbelo elongo na biso, batei, soki bolingi koya. Bongo, tozalaka na. . .

<sup>12</sup> Ndeko Eddie azalaki elongo na ngai ntango Nkolo apesaki ngai emononeli ya ngómbolo ná caribou. Mo. . . Bato boni bazali koyeba lisusu ntango nayebisaki bino yango? Malamu, azalaki wana. Ye nde elenge mobali oyo alataki simísi ya karé-karé, Ndeko Eddie Byskal. Azalaki wana, esika. . . mpe atunaki. . . na—natunaki bango soki moko na bango azalaki na simísi ya karé-karé. “Te,” moto moko te azalaki na yango. Nalobaki: “Ee, ekoki. . . Esengeli kozala simísi ya karé-karé. Ngó—ngómbolo moko monene ya mwa moindo ekozala wana, ná—ná lolenge moko ya nyama oyo maséké na ye ezali na molai ya centimetre mokama na mitano, *boye*, ezalaki lokola mbuli.” Mpe elekáki pene na sanza motoba, oyo nalobaki yango awa, boyebi, liboso ékokisama; molai, pene na boye, oh, liboso mpenza na eleko oyo ya mobu yango.

<sup>13</sup> Na bongo, babengisaki ngai kuna, epai ya mobali oyo, mpo na kokende bokila. Natikalá kokende na etúka yango te, kuna na nsima, epai tokendeki, mpe nalobaki yango. Kasi mwa nzela yango, oyo ezali kuna mosika, na nzela monene ya Alaska, epai eloko mosusu ezalaka te, kaka bazamba, bangómba ná banyama. Mpe na mpokwa wana, na motuka-ndako yango, ntango nazalaki koyebisa Ndeko Byskal, kuna, ná—ná Ndeko Southwick, alobaki: “Ee, na—na. . . Tozokende na etúka ya bampate ya zamba,” alobaki, “ekozala kuna te.”

<sup>14</sup> Nalobaki: “Iyo,” mpe nalobaki, “ezalaki ete moko na bilenge oyo bazalaki elongo na ngai azalaki na simísi ya karé-karé.” Moto moko te azalaki na simísi ya karé-karé, Ndeko Byskal azalaki na yango te, moko te kati na biso azalaki na yango.

<sup>15</sup> Na mpokwa ya mibale, tomonaki, na mosika, mpate-mobali moko ya zamba, mosika likoló kuna na mondelo ya zamba. Sikawa, ezali likolo mosika, esika oyo ata ba-nzete ekólaka te, esika oyo eloko mosusu ezalaka te, kaka ba-caribou ná bampate ya zamba, mpe tomonaki ndambo bango na mosika mpenza. Mpe ntango tozalaki kokita, nsima ya nzánga wana, Ndeko Byskal aselemukaki na mwa mai moko mpe apolaki mai.

<sup>16</sup> Na ntongo elandaki, tolamukaki na ntongo-ntongo mpe tobandaki kolanda ba-mpate ya zamba oyo tokanisaki ete tokozua bango. Mpe likoló ya. . . Tokómaki kuna mpe tozalaki. . . toutaki kolia bilei na biso ya moi, kasi tomonaki bampate yango te, mpe Ndeko Byskal autaki kaka koboma caribou moko. Na bongo ngai, totálaki zinga-zinga, mpe tomataki kuna, Ndeko Southwick alobaki na ngai, alobaki: “Nakanisi ete toko. . . soki olingi kotambola malamumpenza,

Ndeko Branham, tokomata likoló ya ngomba oyo, kuna na nsé ya mwa lobwaku wana, bampate yango bakokaki kokende kuna,” oyo ezali kotambola moko molai. Kasi butu eyíndaka noki te, ntango mosusu kino na ngonga ya zomi to zomi na moko, mbala mosusu.

<sup>17</sup> Mpe okotambola ntaka molai, na makolo, na kati ya bangómba ya mabanga wana. Boye nasepelaka kotambola na makolo, na bongo totelemaki wana mpe tosimbanaki moko zinga-zinga na mosusu, mandefu na biso mibale ebandaki kokóma mpembe, tosimbanaki moko zinga-zinga na mosusu, tozalaki kolela mpe koyeba, nalobaki: “Ndeko Bud, nazali kolikia ete mokolo moko, na Millenium, nakotambola na bangómba oyo nyonso.”

<sup>18</sup> Alobaki: “Nazali kolikia ete nakozala elongo na yo, Ndeko Branham.” Mpe totelemaki wana, kosepeláká kati na Nkolo. Mpe ngai nalingaka bangómba mingi mpenza!

<sup>19</sup> Na nsima tokitaki. Na ntango yango nde Ndeko Byskal abomaki ca—ca—caribou yango kuna. Mpo, azali misionnaire epai ya ba-Indien, mpe alingaki kopesa yango epai ya ba-Indien na ye. Bongo tokitaki, toliaki bilei na biso ya moi, mpe tobongisaki caribou yango mpe tozongaki.

<sup>20</sup> Ngai ná Bud tozalaki komata ngomba, na ntango moko boye, tobwakaki miso, na mosika, na ba-jumelle na ngai, namonaki nyama oyo namónáká, na mosika, ndenge naye bisáká bino awa. Ndeko Byskal, kuna, atelemaki mpembeni na biso. Na bongo nalobaki: “Nyama yango ye wana.”

<sup>21</sup> Atalaki na ba-jumelle, mpe alobaki: “Ezali mobange ya caribou moko ya monene mpenza, ya mobali.”

<sup>22</sup> Mpe nalobaki: “Natikálá komona yango te, nazaláká kokanisa ete bazalaka na maséké lokola bitápe.” Kasi oyo ezalaki na ba-sóngé, azalaki nyama moko ya ndenge mosusu, kaka ndenge namonáká na emononeli. Natikálá koboma caribou liboso te.

<sup>23</sup> “Boye, ee,” alobaki, “soki Nkolo apesi yo yango,” alobaki, “yango eko. . .”

<sup>24</sup> Nalobaki: “Iyo, esengeli kozala yango. Likambo kaka moko oyo nazomituna, ezali simísi wana ya karé-karé.” Natalaki zinga-zinga, mpe Ndeko Eddie, esengeli kozala ete mwasi na ye nde atiyaki yango (Ye wana *kuna*, elongo ná na ye mobali.), esengeli kozala atiyaki yango na sandúku na ye. Ntango apolaki mai liboso na mokolo yango, alataki simísi mosusu, mpe simísi ya karé-karé yango ezalaki wana. Nalobaki: “Yango oyo.”

<sup>25</sup> Ntango nakómaki kuna mpe nazuaki caribou yango, ye, Bud, alobaki na ngai, alobaki: “Sikawa, Ndeko Branham, olobi ete maséké oyo ezali na molai ya centimetre mokama na mitano?”

Nalobaki: “Yango nde oyo yango ekozala.”

Alobaki: “Mpo na ngai, ezali komonana lokola pene na nkama mibale na ntuku misato na mitano.”

Nalobaki: “Te. Ezali centimetre mokama na mitano.”

<sup>26</sup> Alobaki: “Sikawa, kokokana na oyo oyebisaki ngai, liboso tózonga esika elenge mobali wana azali, oyo alati simísi ya karé-karé, Eddie,” (esika oyo balingaki kokutana ná biso, na nsé ya ngomba, na ntáká ya kilometre misato), alobaki, “okoboma ngómbolo ya mwa moíndo.”

Nalobaki: “Ezali YANGO ELOBI NKOLO.”

<sup>27</sup> Alobaki: “Ndeko Branham, akouta wapi? Nazali komona kino na ntáka ya kilometre ntuku mwambe zinga-zinga.”

<sup>28</sup> Nalobaki: “Azali Jehovah-Jireh kino lelo. Nkolo akoki kopesa mpo na Ye moko, omoni. Akoki kosala ete biséndé bikelama. Soki Akoki kosala ete mpate mobali ya zamba ékelama, soki Alobaki yango mpo na ngombólo, ngombólo ekoki kokelama.”

<sup>29</sup> Tozalaki koluka komema caribou ya bozito oyo kuna, motole yango, na nsé ya ngomba, mpe ngai namemaki bondóki na ntango moko, na nsima ye amemaki bondóki, mpe bongo na bongo. Mpe ntango tokómaki mpembeni ya glace moko monene, ee, tokótaki na nsé na yango. Ézalaki mwa molunge, tokótaki na kati ya glace monene yango, mpe tofandaki kuna mwa moke mpo na kozua mwa mpio. Alobaki: “Oyebi, Ndeko Branham, totikali na ntáka koleka kilometre moko na ndambo te, longwa ná esika Eddie ná Blaine bazali, esika bilenge mibali mibale yango batelemi. Ekozala malamú ete mobange ngómbolo yango ébanda komonana.”

Nalobaki: “Bud, namoni ete ozali kotia ntembe na likambo yango.”

<sup>30</sup> Alobaki: “Ndeko Branham, ndeko na ngai azalaki kosala ba-crise ya maladi ya ndeke mibu ebele mpenza. Mpe mokolo moko oyebisaki ngai, mbala ya liboso oyo toyaki awa, ntango tokendeke na esika mosusu, oyebisaki ngai ndenge mwana mobali yango azalaki.” Eddie azalaki kokumba mpunda mpembeni na ngai, kuna, ntango Nkolo apesaki emononeli yango. Nayebisaki bango ndenge basengelaki kosala ná mwana mobali yango; ba-crise yango etikaki. Sikawa, alobaki: “Nakoki kotia ntembe na likambo yango te.”

<sup>31</sup> Nalobaki: “Bud, nayebi te esika nini ngómbolo yango ekouta.” Kasi nazalaki pene na mibu ntuku mitano, nakómi sikawa na mibu ntuku mitano na mitano, boye esalemaki eleki pene na mibu misato. Nazalaki pene na mibu ntuku mitano na mibale to ntuku mitano na misato. Nalobaki: “Natikálá te komona Yango kokweya. Nzambe akopesa ngai ngómbolo ya mwa moíndo wana, liboso náková esika bilenge yango bazali.”

Mpe tokómaki pene na esika banzete ya mike-mike ná banzete ya minene ebandaki.

<sup>32</sup> Na mwa nsé ya ngomba kuna, tokómaki pene na kokóta na zámba yango, afandaki. Ekómaki ngala na ye ya komema motolé, ngai namemáki mondóki. Bongo alobaki: “Ekozala malamú mobange ngómbolo yango ámonana, boye te?”

Nalobaki: “Akozala wana. Komitungisa te.”

Alobaki: “Nakoki komona bangómba nyonso.”

<sup>33</sup> Nalobaki: “Ngai. . . Kasi ngai nazomona elaká!” Bomoni? Bomoni, Alakaki. Nalobaki: “Ézala nyonso oyo Ye. . .” Nalobaki: “Bud, nini wana nde efandi kuna?”

<sup>34</sup> Atalaki, alobaki: “Ezali ngómbolo monene ya mwa moindo.” Nalobaki: “Ezali ye.” Ntango tozuaki ngómbolo yango mpe tozongaki. . . Namikaniselaki na emononeli oyo nayebisaki bino, nazalaki kobangela mondóki yango. Ezalaki mondóki moko ya moke mpenza ya .270, ná masasi ya mike, bomoni. Ezali na bande. Mpe nabetaki ngómbolo yango, na ntáká ya metre pene na nkama mitano, ndenge elobaki. Bud alobaki: “Ekozala malamú óbéta ngómbolo yango masasi na mokongo.” Alobaki: “Otikálá kobeta ngombolo masasi liboso?”

Nalobaki: “Te.”

<sup>35</sup> Alobaki: “Oh, bayebaka te oyo liwa ezali!” Nayékolaki yango mwa moke na nsima. Bongo alobaki: “Bakweyaka na mpasi te,” alobaki, “ekozala malamú óbéta ye masasi.”

Nalobaki: “Kokokana na emononeli, nabetaki yango na motema.”

<sup>36</sup> Alobaki: “Ee, soki emononeli yango elobaki bongo, nakozala mpembeni na yo.”

<sup>37</sup> Mpe nalobaki: “Tokei.” Topusanaki mpembeni moke koleka, mpe ntango natelemaki, ngómbolo yango amonaki ngai. Yango nde eloko oyo ye alingaki, mpo álanda ngai. Mpe na—nabetaki ngómbolo yango masasi, emonanaki lokola yango esalaki ye ata mpasi te. Abandaki koya! Mpe liboso nákoká kotia lisasi mosusu na mondóki, ngombolo yango ekufaki na ntáká ya metre pene na ntuku mitano liboso na ngai.

<sup>38</sup> Bud akómaki mpémbe na nsómo, alobaki: “Ndeko Branham, nalingaki te ete ákwelela ngai na bibelo.”

Nalobaki: “Ngai mpe te.”

<sup>39</sup> Alobaki: “Nasepeli ndenge emononeli yango elobaki ete obomaki ye.” Alobaki: “Sikawa, soki bongo, soki maséké yango ezali na molai ya centimetre mokama na mitano, nakozala na. . .” Nakoloba yango ndenge ye alobaki, alobaki: “Nakogána lokola moto ya libóma.”

<sup>40</sup> Nalobaki: “Ee, ekozala malamú ete ósala yango sikawa, mpo ekozala nde bongo.”

<sup>41</sup> Ntango tokómaki esika Ndeko Eddie azalaki, nalobaki na Ndeko Eddie. . . Tokangisaki bampúnda na nsinga, babángaka ngombólo. Mpe, oh, la la, bayokaki mpenza nsolo na yango. Tokokaki kolongola lomposo na yango te, ngonga esilaki koleka; tosengelaki koya lisusu mokolo oyo elandaki. Na bongo tokátaki nsinga yango pene na mbala zomi, mpe bampúnda bazalaki kokimakima bipai nyonso. Na bongo ntango tokómaki kuna, alobaki. . . Akendeki kozua metre ya nsinga na libenga ya mpúnda na ye, alobaki: “Blaine.”

<sup>42</sup> Nayebisaki Ndeko Eddie, nalobaki: “Tálá loboko ya moke wana malamumu sikawa, kokokana na . . .” Nakanisaki ete ekokaki kozala Billy Paul, mwa loboko ya moke oyo esimbaki metre ya nsinga mpembeni na liséké. Nalobaki: “Tálá loboko ya moke wana malamumu,” natútaki Ndeko Eddie. Tozongaki nsima. Atiaki yango likoló na yango *boye*, ezalaki mpenza bongo, centimetre mokama na mitano. Bomoni, yango mpenza. Yesu akweyaka ata moke te! Liloba yango ekokweya ata moke te na ntango oyo euti mpenza na Nzambe.

<sup>43</sup> Nauti komona katikati na biso, Ndeko mobali mpe Ndeko mwasi Jackson ya Afrika ya Sudi. Nabanzi ete basili kotalisa bango. Mpe—mpe batálisaki bino, Ndeko Jackson? Na ntongo ya lelo, bótelema, yo ná Ndeko mwasi Jackson. Nalingi ete bango bámona. Ndeko na ngai, Eddie, *oyo*, azali moninga na ngai ya bokila, ya kala, auti na Afrika ya Sudi, mosika mpenza. Nkolo ápambola bino, Ndeko mobali Jackson ná Ndeko mwasi Jackson, esengo mpenza ya kozala na bino awa elongo ná biso. Mpe batei nyonso oyo bazali awa bótombola maboko, baoyo nyonso bazali na kati ya lotómo. Ee, ezali mpenza kitoko mingi, malamumu. Nkolo ápambola bino. Tozali na esengo ya koyamba bino nyonso awa. Nakobanda molongo ya mabondeli na mwa miniti, *boye*, na—ezali te ete na . . . nalingaki kosepela ete bino nyonso bókoka kotelema, komata mpe koteya mpo na ngai. Tozali na esengo mingi ya koyamba bino, moko na moko na bino.

<sup>44</sup> Ntango nakanisaka na ntina na bosembo na bino, mpe—mpe ndenge bokatisaka ekólo mobimba, mpe bongo na bongo, mpo na koyoka ngai koloba na ntina na molingami Nkolo Yesu, kondimisama oyo bozalaka na yango, ete Ayokaka mabondeli na ngai. Nazalaki kosolola kala mingi te, na lisolo ya nkuku, ná mondimi moko ya losambo oyo, eleki miníti ntuku minei na mitano te, mama moko ná motema ebukani. Kaka ntango nabandaki koloba likambo moko na mwasi yango, (nayebi te soki akosepela ete nátánga nkombo na ye to te), Pole oyo bomonaka na fotó wana eyaki wana. Ezalaki na bisika nyonso, azóngaki na esengo. Tozali na esengo mingi, lelo, na eleko ya mbongwana oyo tozali kobika kati na yango, oyo ekómi mpasi mpo na kotia motema na likambo moko, biso tozali na Bokonzi oyo ekoki kobongwana te, ekoki koningana te. Oyo Eninganaka te! Ezali libanga ya Gibraltar te, kasi kondima na biso ekoki mpenza



kotelema likoló na Libanga ya Bileko, likoló na Yesu Klisto, Libanga ya lobiko oyo eninganaka te.

<sup>45</sup> Nalingi kotóna ndeko mwasi oyo ayaki na mwa engóngóló ya triangle ná Biblia na kati, mpo na mwasi na ngai oyo azali awa. Asálaki boyokani ná Nkolo na ntina na mwa engóngóló yango. Alingaki yango mingi. Ezali na . . .lokola ba-fotó ya bileko ya kala likoló na yango. Mpe asengaki na Nkolo . . . Azalaki kolinga engóngóló yango mwa mingi koleka, ntango mosusu. Ezali kaka mwa engóngóló moko boye, na lolenge ya pirámíde. Mpe amemelaki yango mwasi na ngai, ná Biblia. Matondi na yo, ndeko mwasi. Mwa makabo mikemike ya bino nyonso ná biloko oyo bopesaka na Billy Paul ná bamosusu, ekómelaka ngai. Nazongisi matondi mingi mpo na nyonso. Nzambe ázala na bino.

<sup>46</sup> Sikawa, bóbosana te, mokolo ya Lomingo ekoya na ntongo. Kaka ntango liyangani ekosila lelo, bócoma motuna na bino. Soki okoki te, yáka na yango mokolo ya Lomingo ekoya na ntongo. Nakoya mwa moke liboso na ntango, na bongo, bokotika ete báya na yango awa, mpo nákoka kozua ntango ya kopesa na yango moboko ya Makomi. Mpe tokoyanola na mituna yango mokolo ya Lomingo ekoya na ntongo, soki Nkolo alingi.

<sup>47</sup> Sikawa, miswále mingi ezali awa. Mpe nazongisi yango nsima, mpo na kotia nkasa ya mankómá na—na ngai awa, mpe ná . . .ná Biblia na ngai mpe, boye, to Biblia na ngai ná nkasa ya mankómá na ngai, nde, mpo nákoka kozua mwa esika. Kasi nazali . . .nakobondela mpo na moko na moko.

<sup>48</sup> Nakomi makomi na ngai, nazalaki na ntango moke. Nakoúmisa bino te ndenge nasalaki mbala ya nsuka oyo nazalaki awa, ezalaki pene na bangonga minei. Namipesaki elaká ete, soki nasengeli kotia liteya mosusu ya ndenge wana na bande, nakotia yango na bande ngai moko awa, to na lolenge moko to mosusu, boye, nakosengela koumisa bino ntango molai mingi te.

<sup>49</sup> Dr. Lee Vayle azali awa na ntongo oyo? Nalingaki kotuna soki Dr. Lee Vayle . . .Ozali awa, Ndeko Vayle? Tombola loboko soki ozali awa. Azali kuna na nsima? Malamu, matondi, Ndeko Roy. Mpe nalingi ete ótala mankómá yango malamau mpenza, Ndeko Vayle. Ozali esika oyo nakoki komona yo te kuna na nsima, na kati na bato mingi to awa na kati. Tosengeli kosenzela, tokoki kotika te ete bato mingi koleka bátelema, kapiténi ya mosala ya kozímisa móto akosepela te ete tósala bongo, bomoni, na bongo, tozali . . .Nalingi ete ótala malamau emoniseli na ngai na ntina na Momboto na Nyoka, mpo na étiana na kati ya oyo ya liboso, Eleko ya Lingomba ya Efese, oyo azali kokoma, kobongisela ngai grammair na yango. Esalemi kitoko mpenza! Mpe nalingi ete ótala yango malamau, bongo tótala moto oyo akotelemela Momboto na Nyoka sikawa (soki ezalaki solo, to te)! Boye Nkolo auti kopesa ngai yango kaka lobi, bomoni. Oh, eleki kitoko!

Nazuaka mateya boye: nazalaka kotambola na ngai elongo mpe Eloko moko ebeti ngai. Na nsima. . . Mpe soki nayebi ete ezali Nzambe, nakamataka yango mpe nalukaka yango na kati ya Makomi. Na nsima, nazalaka na. . . Etikálá kokweiya te, kasi, kobanda na Genese kino na Emoniseli, ezalaka ntango nyonso solo, etali te oyo bato bakanisi na ntina na Yango. Mpe ekómi kosálema mingi koleka uta Bilembo Nsambo wana. Bomoni, yango nde esalaki yango ntango wana. Boye, Nkolo ápambola bino sikawa, wana tozali koyekola. Sikawa, mpo na komemia Liloba. . .

<sup>50</sup> Mpe nakanisi ete moto moko, ingenieur, to oyo nyonso azali kolandela yango, mwa makeléle ezali kozonga awa na biyokiseli yango. Sikawa bozali koyoka malamumu, kuna na nsima? Bótombola maboko soki bozali koyoka. Kitoko!

<sup>51</sup> Sikawa tófungola Biblia, na bisika mibale kati na Makomi, mpe nakomeka koteya nsango mpe tóbima na ntango malamumu, soki Nkolo alingi. Sikawa tózua Malako, mokapo ya 5, mpe Mikonzi ya Liboso, mokapo ya 10; Malako, mokapo ya 5; Mikonzi ya Liboso, mokapo ya 10.

<sup>52</sup> Sikawa, kasi mpo na bapaya oyo bakoki kozala awa na kati na biso, oyo, tosangisi Ecodim na biso na kelasi kaka moko ya monene. Oyo nde kelasi yango, mpo bisika nyonso etondi mpenza na bato mpe tokokoka te kokabola ba-kelasi bo momesano, wana tozali koyekola Liloba mwa moke, mpe tozali na boyokani elongo ná bandeko. Bisó. . . Tozali denomination te. Tozali na denomination moko te. Tozali na bonsomi kati na Nkolo, mpe elingi koloba te ete tozali etónga moko ya bilandá-landa. Toteyaka kaka Biblia, mpe bobele Yango. Mpe Nkolo azalaka malamumu mingi epai na biso, na lolenge ete Ye atatulaka Yango mpe atalisaka ete Ezali solo. Mpe Epesaka biso kobondisama monene.

<sup>53</sup> Sikawa, totombeli—totombeli bino boyei malamumu katikati na biso na ntango nyonso bolingi koya. Sikawa, nazalaka awa ntango nyonso te, kasi tozali na bakengeli ya malamumu awa; Ndeko Neville, moko na bakengeli na biso; Ndeko Capps, mokengeli na biso mosusu; mpe Ndeko—mpe Ndeko Collins, Willard Collins, mokengeli na biso mosusu. Na bongo tozali na baoyo mosusu na bisika ndenge na ndenge, mwa ba-losambo na biso kati na bondeko. Soki ofandaka zinga-zinga na—na Texas, bandeko Martin, awa, ná Ndeko. . . Ndeko oyo ayaka elongo na yo awa, nkombo na ye nani? Nazali komona Ndeko Blair te, na ntongo oyo. Oh, Ndeko Blair, namonaki yo te, Ndeko Blair. Ndeko Ruddell, awa na nsima, moko na ba-losambo, na nzela 62, moko na balosambo kati na bondeko awa. Ndeko Junior Jackson, afandi awa, mpembeni na Ndeko Blair, namoni ye sikawa, losambo na biso mosusu, kati na bondeko. Mpe tozali na balosambo na ekólo mobimba, na bisika nyonso.

<sup>54</sup> Ndeko Jack Palmer, azalaki koya awa, nakanisi ete bazalaki kotambola mwa mbangu, na motuka ya sika ya mwana na ye ya mobali, tóloba, boyebi, tóloba, balekaki mbangu oyo esengeli, mpe bazuáki likama. Azokaki na mbanga, mpe azalaki na makoki ya koya te, azongaki na ndako. Boye akómi malamau mpenza. Mpe tozalaki na . . . Ndeko Ben, awa, ndeko mosusu kati na bandeko na biso, awa na Kentucky, abéngaki ye na ntongo oyo, mpo na koyeba soki basengélaki na mbongo to eloko moko oyo losambo ekokaki kosunga bango na yango, alobaki ete nyonso ezali malamau. Azalaki kozua libúnu moko na mbangu mingi, mpe aniataki mabanga ya mike-mike, mpe atútanaki na mbángá to eloko moko bongo. Mpe babéngaki uta na esika yango, ntango motuka na ye etutaki likonzi moko to eloko moko bongo, mpe—mpe abéngaki mpo na kosenga libondeli.

<sup>55</sup> Ndeko Billy Collins mpe, toyebi, afinaki mosapi na ye ya monene ya loboko, mabe mpenza, abukaki mokuwa na yango, ndenge nayoki, mpe basengelaki kobongisa yango. Boye, tolingi kokanisa ye na libondeli.

<sup>56</sup> Sikawa, ntina oyo totelemaka. Ntango topesaka limémiá, ntango babendele ezalaka koleka, to eloko mosusu, totelemaka ntango nyonso na kimia, to topesaka losáko, to totelemaka, ata wana, mpo na kopesa limémia na ekólo na biso, oyo tosengeli kosala bongo, na bendele na biso. Na bongo boni boni mpo na Nkolo na biso, ntango tozali kotánga Liloba na Ye? Tótelema sikawa, wana tozali kotánga Málako 5, kobanda na molongo ya 21. Bólanda na bokebi sikawa, wana tozali kotánga.

*Wana ekatisaki Yesu lisusu na masuwa na ngámbo mosusu, ebele mpenza na bato bayanganaki epai na ye: mpe ye azalaki mpembeni . . . na mbu.*

*Nde tala, moko na bakambi ya sinagoga ayaki, nkombo na ye Yailo; mpe ntango amonaki ye, akweyaki na makolo na ye,*

*Mpe abondelaki ye mingi, alobaki, Mwana mwasi na ngai moke alingi kokufa: nalómbi yo, yaka kotiela ye loboko—maboko na yo, mpe ete abika; mpe . . . ázala na bomoi.*

*. . . Yesu akendeki elongo na ye; mpe ebele mpenza ya bato balandaki ye mpe bazalaki kokangana na ye.*

*Mwasi moko azalaki kuna na litangá na makila mbula zomi na mibale,*

*. . . asilaki kozua mpasi mingi na minganga ndenge na ndenge mpe asilisaki misolo na ye nyonso, mpe azuaki malamau koleka te, kutu, kasi akómaki nde na mpasi koleka,*

*Ntango ayokaki nsango na Yesu, ayaki nsima-nsima na kati na ebele ya bato mpe asimbacki elamba na ye.*

*Mpo azalaki koloba ete, Soki kaka nasimbi elamba na ye nakobika.*

*Mpe nokinoki litangá ya makila ekaukaki; mpe ayokaki na nzoto na ye ete asili kobika na mpasi yango.*

*Mpe Yesu asó soli nokinoki na kati na ye ete nguya ebimaki na ye, abongwanaki e. . . na kati ya ebele yango ya bato, mpe alobaki, Nani amami bilamba na ngai?*

*Mpe bayekoli na ye balobaki na ye ete, Ozali komona ebele wana ya bato ndenge bazali kokangana-kangana na yo, mpe ozali koloba. . . Nani amami ngai?*

*Mpe atalaki epai na epai mpo na komona mwasi oyo asalaki yango.*

*Kasi mwasi yango, na kobanga mpe na kolenga, lokola ayebaki likambo lisalemi na ye, ayaki mpe akweaki liboso na ye mpe ayebisaki ye solo nyonso.*

*Mpe alobaki na ye ete, Mwana na ngai ya mwasi, kondima na yo esili kobikisa yo; kende na kimia, mpe bika na mpasi na yo.*

*Mpe wana azalaki naino koloba, bato mosusu oyo bautaki na ndako ya mokambi ya sinagoga bayaki mpe balobaki ete, Mwana na yo ya mwasi asili kokufa: mpo na nini ozali kotungisa Molakisi lisusu?*

*Bobele ntango Yesu ayokaki maloba oyo elobamaki, alobaki na mokambi ya sinagoga ete, Banga te, ndima kaka.*

*Mpe apesaki moto moko te nzela álanda ye, longola bobele Petelo, . . . Yakobo, . . . Yoane ndeko ya Yakobo.*

*Mpe ayaki, akómaki na ndako ya mokambi ya sinagoga, mpe amonaki yikiyiki makasi, mpe ntango. . . mpe bato bazalaki kolela mpe kogánga makasi.*

*Mpe esili ye kokóta, alobaki na bango ete, Mpo na nini bozali kosala makelele, mpe kolela? mwana moke oyo akufi te, kasi alali mpongi.*

*Mpe basekaki ye na lityo. Kasi nsima ya kobimisa bango nyonso libanda, azuaki tata mpe mama ná mwana moke yango, ya mwana moke yango (kutu), mpe bongo, baoyo bazalaki elongo na ye, mpe bakotaki epai mwana yango atandamaki.*

*Mpe Alobaki na mwana moke yango, mpe A. . . (bolimbisa ngai). . . asimbaki loboko ya mwana yango, mpe alobaki na ye ete, Talita kumi; oyo elingi koloba, soki balimboli yango ete, Elenge mwasi, nalobi na yo, telema.*

*Mpe na mbala moko elenge mwasi yango atelemaki, mpe atámbolaki; mpo azalaki na... mbula zomi na mibale. Mpe bakámwaki na kokámwa mpenza.*

*Mpe apekisaki bango mingi, alobaki ete moto áyeba likambo yango te; mpe Ye alobaki ete bápesa mwana mwasi yango eloko ya kolia.*

57 Na Buku ya Mikonzi ya Liboso, Mokapo ya 10, tokotánga milongo misato oyo.

*Mpe ntango mokonzi-mwasi ya Sheba ayokaki nsango ya lokumu ya Salomo mpo na nkombo na YAWE, ayaki mpo na komeka ye na mituna ya makasi.*

*Mpe akómaki na Yelusaleme ná bato mingi nsima na ye, ná bakamela oyo ememaki malasi, . . . wolo mingi, ná mabanga ya ntalo: mpe ntango akótaki epai ya Salomo, ye. . . ayebisaki ye makambo nyonso oyo ezalaki na motema na ye.*

*Mpe Salomo ayanolaki ye—ye na mituna na ye nyonso: likambo ata moko te ebómbamaki na mokonzi, oyo alimbolelaki ye te.*

58 Tobondela.

Nkolo Yesu, wana tozali kotánga masolo oyo ya Biblia, mitema na biso ezali kopumbwa na esengo. Mpo toyebi ete Ozali Nzambe, mpe Obongwanaka te. Obongolaka lolenge na Yo ya kosala ata moke te, Obongolaka banzela na Yo ata moke te, Otikali Nzambe mpo na libela. Mpe tobondeli, e Nzambe, ete Ópesa biso ndimbola, na ntongo oyo, ya Makomi oyo Olingi ete biso tóyeba, mpo ékoka kososola mitema na biso, mpe Molimo Mosanto ya nkembo áya katikati na biso lelo, mpo na kososola makanisi na biso mpe mitema na biso. Mpe tika ete eloko moko te étikala, na lolenge ete mitema na biso ekozanga. . . ekotonda mpenza na esengo ntango tokobima awa mpe tokoloba lokola baoyo bautaki na Emau na mpokwa wana: “Mitema na biso ezalaki kopela móto kati na biso te wana Azalaki kosolola na biso nzela-nzela?” Yo Ozalaka ntango nyonso Nzambe, mpe biso tozali bana na Yo oyo basangani na nzala na ntongo oyo. Mpo, ekomami: “Moto akobika na Liloba nyonso ekobimaka na monoko na Nzambe.” Pambola biso na kosangana na biso elongo mpe bato nyonso oyo, Nkolo, baoyo bauti na ba-kilometre nkama na nkama mpe, iyo, na ba-kilometre nkoto na nkoto. Tobondeli ete, ntango bakozonga na bandako, mitema na bango ésepela mpenza na makambo malamumu ya mawa mpe ngolu na Nzambe. Mpo tosengei yango na Nkombo na Yesu. Amen.

59 Mwa motó ya liteya moko ya ndenge mosusu, oyo nalingi kolobela na maloba misato, longwa na litangi nyonso oyo. Bokoki koloba: “Ezali eloko moko ya moke mingi, maloba misato longwa na nyonso oyo otangi, eteni ya mikapo mibale mobimba ya

Biblia.” Kasi na—nasalaki yango lokola moboko mpo na kozua maloba misato oyo: *Kondimisa Liloba Na Ye*.

<sup>60</sup> Boyebi, ezali na Likomi moko na Biblia, na Batesaloniki ya Liboso 5:21, epai ekomami ete: “Bómeka makambo nyonso; bókangama makasi na oyo ezali malamumu.” Soki eloko moko emekami, to ekondimisama lokola “solo” to “lokuta.” Mpe soki eloko moko etiami ntembe, esengeli komekama kino bokoyeba bosólo na yango. Na nsima, ntango boyebi bosólo na yango, Elobi ete: “Bókangama na yango makasi.” Na elobeli mosusu: “Bósimba yango makasi, bótika yango te. Bókangama na yango makasi!” Na elobeli mosusu: “Bósimba yango makasi, mpo éselumuka te.” Bókangama makasi na oyo ezali malamumu, nsima na yango kondimisama ete ezali “solo.” Mpe eloko nyonso oyo endimisami ete ezali “solo te,” bótika yango nokinoki mpenza, bókende mosika na yango. Bókangama ata moke te na likambo ya lokuta.

<sup>61</sup> Sikawa, ekoki kosalema ete Baklisto ya solosolo, bato ya malamumu, bókangama ntango mosusu, bókangama na makambo ya lokuta, kokanisáká ete ezali solo. Kasi na bongo makambo yango masengeli komekama, soki ezali “solo” to “lokuta.” Mpe ezali mokumba na biso nyonso, biso baoyo tozolikia kokende na Lola ntango Yesu akoya. Mpe ezali mokumba ya motei, ntango motuna moko etunami, ete ápesa eyano polele na yango, na nsima, ándimisa yango liboso na bato, mpo bákoka kosósola, mpo moto moko te alingaka kozala na “libunga,” akangami na likambo ya lokuta.

<sup>62</sup> Boye, tozali na Likomi moko (mpe Yesu alobaki: “Makomi nyonso esengeli kokokisama”) ete tosengeli kondimisa makambo nyonso. Na nsima “bókangama makasi,” to, “bósimba makasi, bosimba yango mpenza ngwi. Mpe bótika yango te, bókangama makasi na likambo oyo ezali malamumu.”

<sup>63</sup> Namikaniseli na eteyelo, nayekolaki likambo moko, mingi kati na bino mpe bayekolaki likambo yango moko. Ntango opesi eyano na likambo moko, osilisi yango mpenza, okoki kozua eyano yango mpe kondimisa yango na likambo yango. Bato boni basilá kosálá yango? Bino nyonso, na ntembe te. Na bongo—na bongo ozali na ntina ya komitungisa te soki eyano na yo ezali solo to te, eyano ya likambo yango esili kondimisama na likambo yango. Na yango oyebi ete ozali na eyano ya malamumu. Soki eyano na yo moko moko, na ekomeli na yo to na lokasa na yo, esili kondimisama, likambo oyo endimisami na . . . eyano oyo endimisami na likambo yango, boye olongi yango. Moto moko te akoki koloba ete ezali mabe, osengeli kozala na . . . Soki osali mosala na yo malamumu na ndenge esengeli mpe esengelaki, ná lolenge oyo esengelaki kosalema, mpe eyano na yo esili kondimisama, okoki kofanda mpe kopema na endimiseli nyonso ete okozua Zomi na likambo wana, na eteni ya lokasa oyo

ozongisi, mpamba te esili konisimisama, endimisami na likambo yango.

<sup>64</sup> Sikawa, ezali na liseke moko ya kala oyo elobaka: “Ndimisa yango, mpe nakondima yango.” Sikawa, na moko na bitúka na biso, moko na bitúka na biso na ekólo, bazalaka na ekolóngó moko: “Nazali moto ya Missouri, tálisa ngai.” Bomoni, na elobeli mosusu: “Ndimisa ngai yango, nazali moto ya Missouri.” Kasi yango esimbaka ntango nyonso te, mpo Nzambe, na bileko nyonso, akokisaki mpe andimisaki mosala oyo Asili kobongisa mpo na eleko wana, mpe Alobaki yango na Liloba na Ye. Mpe mbala nyonso oyo Liloba na Nzambe endimisamaka na eleko yango, ebele na bato babóyaka Yango. Boye: “Ndimisa yango, mpe nakondima yango,” ezali bongo te. Okoki kozala na kondima kaka ndenge Nzambe apesi yo kondima. Kondima ezali likabo ya Nzambe. Okoki kozala mosambeli ya ndenge nini, ata bongo esengeli. . . osengeli kozala na kondima. Mpe soki ozali Moklisto, kondima na yo ekoki kopema kaka likoló ya Liloba na Nzambe oyo endimisami.

<sup>65</sup> Sikawa, bóbosana te, Nzambe asilá kopésá Liloba na Ye na eleko moko na moko, mpe alobáká liboso likambo oyo ekosalema na eleko oyo Azalaki kolobela. Sikawa, soki Mose áyaka ná nsango ya Noa, elingaki kosimba te. Soki Yesu áyaka ná nsango ya Mose, elingaki kosimba te. To soki mosakoli moko áyaka ná nsango ya mosakoli mosusu, elingaki kosimba te. Kasi na nzela ya basakoli na Ye, Asilaki komonisa mobimba nyonso na Ye moko ná mwango na Ye. Na yango Biblia, liloba moko te ekoki kobakisama na Yango to Liloba moko kolongolama na Yango.

<sup>66</sup> Boye, soki ondimisi likambo na yo na nzela na . . . eyano na yo na nzela na likambo na yo, na bongo mpo na nini te kondimisa e—eyano oyo tozali sikawa kozua na Liloba ya eleko oyo? Soki Biblia elobi ete likambo moko esengeli kosalema na eleko oyo, ezali kati na Biblia mpe ekosalema. Na bongo soki eyano na yo, oyo ozoluka koyebisa bato, soki endimisami na Buku, na bongo ezali solo, ezali solo. Soki te, ezali yango te.

<sup>67</sup> Sikawa, tomoni eloko mosusu, na bongo, na ntembe te, bosilá koyóká bato koloba: “Komona ezali kondima.” Wana ezali liseke mosusu ya kala, oyo tozalaka na yango awa, kasi yango mpe esimbaka te. Esimbaka te, mpo moto akoki kofanda mpe kotala sémba eloko moko, mpe kozanga komona yango. Liloba oyo “komona,” na Anglais, liloba oyo “komona” ezalaka na ndimbola mingi mpenza ya ndenge na ndenge. *Mbu* ekoki kolakisa “mai monene.” Mpe *komona* ekoki kolakisa “kosósola.” *Komona* ekoki kolakisa “kotala yango.” Mpe, oh, okoki kosalela maloba nyonso ya ndenge na ndenge. Kasi na ntango olobi “komona ezali kondima,” ozali na libunga.

<sup>68</sup> Ntango *osósoli* yango, ondimi yango. Yesu alobaki: “Soki moto abótami mbala ya mibale te, akoki *komona* Bokonzi te,” na

elobeli mosusu, akoki “*kosósola* Bokonzi” te, mpo Bokonzi ezali Molimo Mosanto kati na yo. Boye, osengeli kosósola eloko oyo ezali kati na yo. Mpe nzela bobele moko okososola yango, ezali ete ókokanisa oyo yango esalisaka yo ná oyo Biblia elobaki ete ekosalisa yo. Na ntango wana, likambo na yo ezui eyano, bomoni. Mpe, na bongo, Ye azali Molimo Mosanto yango.

<sup>69</sup> Boye, komona ezali kondima te. Nakoki kondimisa yango na nzela na biyokeli ya nzoto, bomoni, ete komona ezali kondima te. Nakoki komona molangi ya mafuta oyo te. Nakoki komona yango te mpo ezali nsima na ngai, kasi ata bongo nazali na eyokeli ya—ya komama, oyo eyebisi ngai ete nasimbi yango na loboko. Bomoni? Sikawa, nakokaki komona yango te, ekoki kosalema te. Sikawa nakoki kosimba yango te, ekoki kosalema te, kasi nandimi yango. *Oyo*, komona ezali kondima; *oyo*, komama ezali kondima. Sikawa nakangi miso, nakoki komona yango to komama yango te, kasi soki napusani mpembeni na yango mpe nakoki koyoka solo na yango, nákokóba kondima ete ezali wana. Boye: “Kondima ezali elendiseli ya biloko elikiami, elembeteli,” ezali te oyo emonami, elétami, emamami, koyoka nsolo, to eyokami. Ondimi yango! Mpe kondima esengeli kozua esika ya kopema. Likambo nyonso oyo ekeseni na Liloba na Nzambe, kondima na Nzambe ekoki kozua esika ya kopema te, bobele soki ezali elaká ya Nzambe. Mpe kuna nde ezuaka esika na yango ya Seko.

<sup>70</sup> Kasi na liboso ya oyo nyonso ya koza-...ya bileko ya kotia ntembe ná makambo, oyo tosili koleka na yango mpe oyo tozali kobika kati na yango lelo, oyo eleki na mabe nyonso, na liboso ya ntembe nyonso oyo, Nzambe azali mpenza kokóba kondimisa Liloba na Ye, ete ezali solo, ndenge Asalaka na bileko nyonso. Ye. . .Kozanga kondima etelemisaka Nzambe te, epekisaka Ye te. Ata mokili ezangi kondima ndenge nini, Ekokokisama ata bongo. Kozanga kondima esalaka eloko mosusu te, bobele kokweisa mozangi-kondima. Kozanga-kondima ekotinda mozangi-kondima na Lifelo. Ekoyíba ye mapamboli nyonso oyo Nzambe alakelaki ye, kasi epekisaka Nzambe te kokóba kokende liboso ná mondimi. Bomoni, kozanga kondima epekisaka Nzambe te, epekisaka bobele mozangi-kondima.

<sup>71</sup> Bokoloba: “Ngai...Lobi, moi ekongenga te, nakopekisa yango.” Meká yango. Bomoni? Malamu, okoki kosala yango te. Nzambe nde atiaki yango na molongo mpe alobaki ete ekongenga, mpe ekongenga, esili, Alobaki ete ekongenga. Mapatá ekoki kozipa yango, kasi ezokóba bobele kongenga, kaka ndenge moko. Mpe okoki kopekisa Nzambe kosala yango te. Ye, oyo. . .

<sup>72</sup> Ndenge nini Asalaka ete Liloba na Ye eyébana na bato? Ya liboso, Nzambe ayebaki ete bazangi-kondima bakozala. . . Sikawa, bótala bwanya ya Nzambe; ayebaki ete bazangi-



kondima bakozala, mpe lolenge oyo ebele bakozala bazangi kondima. Ye, na boyebi makambo liboso, abongisaki liboso momboto moko mpo na eleko moko na moko, baoyo bakondima Yango. Sikawa, soki botali malamumu kuna, mpamba te, eleko moko na moko ekendeke liboso elongo ná Liloba na Ye, makambo nyonso ekotambola na ntango elongobani, eloko moko te epekisaka Nzambe. Akóbaka se kokóba, mpe eloko nyonso, ata ya moke, ezotamboláká mpenza ndenge esengeli. Mbala mosusu, tokanisaka ete ekotambola malamumu te. Kasi bómitungisa te, sáa na Ye ezali kokende na bosikisiki nyonso na ngonga esengeli, mpe nyonso ezali kotambola malamumu mpenza.

<sup>73</sup> Mbala mosusu, ntango natálaka zinga-zinga mpe nákomona ba-Ricky ná ba-Ricketta oyo tozali na bango lelo, na babalabala, mpe lolenge oyo makambo nyonso ezali kotambola, nakanisaka: “E Nzambe!”

<sup>74</sup> Alobaka: “Zela naino,” bomoni, “Sáa na Ngai ezotámbolaka na ndenge esengeli mpenza. Nasengeli kotia yo na mobóko moko oyo Natiaki moto ya liboso, na mikolo wana. Natii yo na mobóko moko ná Luther, mpe na mobóko moko ná Wesley.” Mpamba te, bomoni, lisumu eyebanaki te na ntango wana ndenge eyebani sikoyo. Mpe ntango tokómi na boyebi mingi sikoyo, koleka ndenge tozalaki na yango na ntango wana, mpe ntango monguna ayei lokola mpela, Molimo ya Nzambe etombolaka bendele kotelemela yango. Bomoni? Sikawa, lelo, tokómi na boyebi mingi koleka, lisosoli mingi koleka, boye bibale ya kozanga kondima ezali kotiola makasi mpenza, kasi Nzambe atelemisi bendele mpo na kotelemela yango. Kasi, bómikanisela, Azalaka ntango nyonso... Ntina oyo A—Abongisaki liboso makambo kosalema. Alobaki yango liboso na nzela ya basakoli na Ye ete ekosálema. Mpe ntango bayengebene bakomona makambo yango kokokisama, na bongo bakoyeba ete Ezali solo. Etali te oyo moto mosusu nani alobi, bango bayebi ete Ezali solo.

<sup>75</sup> Tomoni ete kuna na—na—na, nabanzi, ezali na Batesaloniki ya Liboso, Alobaki: “Abongisaki biso liboso mpo na kopesama lokumu ya bana na nzela na Yesu Klisto.” Nzambe alobaki te: “Nakopona yo, mpe Nakopona yo te,” kasi boyebi na Ye makambo liboso, eyebaki nini okosala. Boye, na boyebi makambo liboso, Akoki kotia makambo na molongo, mpe Asalaki ete makambo nyonso étambola mpo na bolamu na Ye, mpe mpo na bolamu na bino.

<sup>76</sup> Na Genese, Nzambe ayebisaki Adama ná Eva nini ekosalema ntango bazangaki kondima Liloba na Ye. Sikawa, Atiaki malamumu ná mabe liboso na bango, mpe Alobaki: “Mokolo oyo bokolia na yango, mokolo yango bokokufa.” Mpe Nzambe alingaki mpenza koloba likambo oyo Alobaki. Asalaka ntango nyonso bongo, Alingaka koloba likambo oyo Alobi.

<sup>77</sup> Satana akambaki mwasi na kozanga kondima Yango, mpo

Satana ye moko atikalá kondima Yango te. Andimaka Yango te, boye akambaki ye ándima yango. Mpe asalaka likambo yango moko kino lelo, mpe ateyaka bamosusu ndenge moko, mpe bandimaka Yango te, lokola ye mwasi asalaki. Nzambe alendisaki bato na Ye kozala nsima ya Liloba na Ye, yango nde libateli na bino kaka moko. Ebongiseli na yo te, tata na yo to mama na yo te, nyonso wana ezali malamú, kasi nsima na Liloba na Nzambe. Yango nde esika oyo mondimi abátelamaka, nsima na Liloba. Ntango nzela moke wana ekátanaki kuna, mpo na mwa “nazali komituna soki Ezali solo to te? Yango. . .” mabánzo ekotaki mpe ezuaki esika ya kondima, babúkaki bipekiseló. Mpe Nzambe abatelaki Liloba na Ye, Akokisaki Yango. Satana alukaki komema ye mwasi kozanga kondima Yango.

<sup>78</sup> To, lobánzo, kobánzaka ná Yango te! O—okoloba: “Ee, nabanzi. . .” Ozali na ndingisa moko te. Ntango Nzambe alobi likambo, kaka—kaka ndenge Alobaki, yango nde likambo ya kosala. Okoloba: “Ee, nakanisi. . .” Kasi ozali ata na likanisi moko te ya kopesa. Tika ete likanisi oyo ezalaki kati na Klisto ézala kati na yo. Mpe Klisto azali Liloba! Tika ete Liloba ézala kati na yo. Maloba mosusu nyonso ézala lokuta, Maloba ya Klisto ézala solo! Bato mosusu bandimelaka ye ná mabánzo na ye nyonso, lokola ye mwasi asalaki, kobanza: “Ee, mpo na nini Nzambe akosala likambo oyo? Sikawa, likambo oyo ezali malamú lokola oyo Wana, boye te?” Soki ekeseni na Liloba, ezali bongo te! Boye, likambo nyonso, molakisi nyonso, molimboli nyonso ya Biblia, mosusu nyonso oyo akolakisa yo, to akomeka kondimisa yo likambo moko, iota moko ya moke mpamba oyo ekeseni na oyo Biblia oyo elobi, ezali malakisi ya lokuta. Ezali Satana lisusu, kaka mpenza ndenge esalemaki epai na Eva. Nzambe akóbaka kokende liboso, ata asali nini, oyo Satana asali, Nzambe akóbaka kokende liboso kondimisa Yango ete ezali bongo.

<sup>79</sup> Sikawa bótala likambo oyo alobaki na Eva: “Solo mpenza, bokokufa te. Bokokóma na bwanya.” Yango nde eloko oyo mokili ezali koluka lelo, ndángá ya science, boyebi moko boye ya moto. Mpe alobaki: “Solo mpenza, bokokufa te.”

<sup>80</sup> Kasi Nzambe asilaki koloba: “bokokufa,” mpe Nzambe andimisaki yango bongo. Mpe tokoki komona yango, Alingaki koloba eloko oyo Ye alobaki. Soki okei awa na malíta, okoyeba soki Alingaki koloba yango to te. “Mokolo bokolia yango, mokolo yango bokokufa.” Mpe soki bokei awa, mpo na kotuna moto nyonso bolingi, ya mobu nyonso, ata moto moko te asilá kobíká mibu nkóto. Nzambe andimisaki Liloba na Ye bongo, Akosala yango ntango nyonso.

<sup>81</sup> Kasi, bómikanisela, Akokisaka bilaká na Ye nyonso ya mapamboli mpe Asalaka ya bilakeli mabe na Ye. Lokola baliaki na yango, mokolo yango bakufaki; mpe Andimisaka yango epai na bino, ete bakokufa mpenza mokolo oyo balie

yango. Akokisaka mpe Liloba nyonso oyo Alobáki na ntina na mapamboli na Ye. Bilaka nyonso, Nzambe akokisaka yango! Oh, nalingaka yango. Osengeli kopona nini olingi: mapamboli na Ye, na kondimáká; to bilakeli mabe na Ye, na kobebisáká Yango. Soki obebisi Yango mpe ondimi ngámbo na Yango ya libebi, na ntango wana, olakelami mabe. Soki ondimi Yango kaka ndenge Akomáki Yango, mpe okangami na Yango, na ntango wana, opambolami. Mpe Ekesanaka ntango nyonso na science, ekesanaka ntango nyonso na—na ndenge bato ya science batalisaka makambo. Mpamba te, Akokisaka Liloba nyonso, ya mapamboli na Ye, ná ya bilakeli mabe na Ye.

<sup>82</sup> Ntango mibali ná basi basalaki masumu mingi liboso na mpela, ye azalaki na . . . kotelemela Liloba na Ye ya solo, Adama ná Eva basalaki lisumu liboso na Liloba na Ye ya solo. Kasi, bikeke nyonso oyo eyaki nsima na bango babandaki kosala makambo yango moko, Asakolaki kufa likoló na bango, mpe sukasuka, ekomaki na kobébisama mobimba nye ya makambo nyonso na mokili, ezindaki na nsé ya mai, esukolamaki mobimba na mai.

<sup>83</sup> Sikawa, Nzambe moko oyo abebisaki nye biloko nyonso na mokili, matiti nyonso, bikelamo nyonso, longola kaka oyo Ye atiaki mpembeni, mpe atombolaki likoló na mokili, makambo nyonso oyo Alakaki ete Akosala, Asalaki yango. Mpe Nzambe moko oyo alakaki mai, mpe Akokisaki Liloba na Ye, Nzambe yango moko alaki móto, mpe Akokokisa Liloba na Ye. Akokokisa Liloba na Ye.

<sup>84</sup> Sikawa, sikawa Asalaki nini? Bayébaki Liloba na Ye ndenge nini? Mpamba te, lolenge nyonso na Ye ya kosala, ya komitalisa Ye moko polele liboso Ye ásala mbéba, to ápesa etumbu, Atindelaka bato ntango nyonso Liloba, mpe Akébisaka bato ntango nyonso. Oh, nalingaka yango! Na bongo, tokoki mpenza komona esika oyo tokómi.

<sup>85</sup> Ezalaki na lolenge nyonso ya batei ná masangá ya bato, na mikolo ya Noa, ezalaki mpe na lolenge nyonso ya ba-religion na ntango ya Noa, mpo Yesu alobaki: “Pelamoko esalemaki na mikolo ya Noa, ekozala mpe bongo na boyei ya Mwana na moto.” Kasi mosakoli moko ayaki, mpe abandaki kosala eloko moko, abandaki kotonga masuwa. Mpe Nzambe atindaki mosakoli na Ye, Noa, mpo na kondimisa ete Atindaki Liloba na Ye, mpo na koyebisa bango ete kobebisama ezalaki koya, ete Akokaki koyikela mpiko te lolenge oyo—oyo bato bakómaki kosala, ete Asengelaki kobebisa moto oyo Asíláká kokela.

<sup>86</sup> Sikawa, Liloba eyaka ntango nyonso epai ya mosakoli, Abongwanaka ata moke te. Malaki 3, elobi: “Nazali Nzambe, mpe Nabongwanaka te.”

<sup>87</sup> Noa atindamaki na eleko moko ya bato ya science, ná Nsango moko oyo ezalaki libanda na makambo ya science. Noa

atindamaki na eleko moko ya mayele ya bongó, ná Nsango moko ya mayele na bongó te. Atindamaki na eleko moko ya science, na ntango oyo azalaki na Nsango ya kondima ná elaká epai ya eleko moko ya bato ya science. Boye bokoki kondima ete eleko ya bato ya science éndima Nsango moko oyo ya makambo ya science te? Eleko ya bato minene ya mayele, na bongo bondimi ete bango bakondimela eloko moko oyo emónanaki lokola bolémá mpenza na makanisi ya bato? Kasi Nzambe asalaka makambo ntango nyonso ndenge wana. Noa azalaki mosakoli atitolami na Nkolo, mpe azalaki Nsango ya Nzambe mpo na ngonga yango. Asengelaki kondima yango, bato basengelaki kondima Nsango na ye, nsima na ye kotatolama na Nkolo, ete ezalaki Liloba na Nzambe, mpe Nzambe alingaki kokokisa Liloba na Ye.

<sup>88</sup> Sikawa, ezali ndenge moko lelo. Tokómi na ntango ya nsuka. Sikawa, bato yango basengelaki koyeba, bomoni. Sikawa, bótala, Noa azalaki elilingi ya Bayuda oyo bakoleka na Minyoko. Enoka azalaki elilingi ya—ya Nsango ya solosolo, ya—ya—ya konetolama ya Lingomba, mpo Enoka anétolamaki, na nsima mpela eyaki. Mpe bango mibale. . . Mosakoli ya liboso, Enoka, alongolamaki na nzela mpo Noa ákoba na oyo ya ye—na oyo ya ye. . . mpo Nzambe ákoka kokóba ná Noa. Sikawa, Lingomba ekonetolama mpo Nzambe ákoka kosala lisusu ná Bayuda, litíka ya Bayuda, bato nkóto mokama na ntuku minei na minei, ndenge toyekolaki yango awa na Makomi.

<sup>89</sup> Kasi na liboso ya eleko mobimba ya bato ya science, ya bazangi kondima Nzambe andimisaki Liloba na Ye ya elaká ezali solo, na kotindeláká bango mpela. Sikawa, bómikanisela, na ntango ya Noa, mbula ebétáká naino ata moke te na mokili. Nzambe azalaki komatisa londendé na mabelé mpe bato bazalaki kosala nzela mpo na mai, kasi mbula etikáláká kobeta te. Kasi Noa alobaki: “Mbula ekobeta.” Sikawa, ezalaki. . .

<sup>90</sup> Bakokaki kozua esalelo moko, kotinda yango na likoló, mpe koloba: “Kuna na likoló, bobandú ezali kuna na likoló te. Mvula ezali kuna te. Tokoki kotalisa polele ete mbula ezali kuna te.”

<sup>91</sup> Etali te soko science elobaki nini, Nzambe alobaki ete mbula ekobeta, boye wana ekati likambo. Sikawa, Nzambe asalaki nini? Na likanisi na ngai, ntango bamosusu kati na bango baningisaki mokili mwa moke mpe elongwaki na esika na yango, na bongo, ebwakamaki na nsima *boye*, molunge ya mabelé ekutanaki na malili, ezalaki kopesa kaka lo—londendé. Mpe mokili ezipamaki, liboso, mpe misánda ya mipepe kuna na likoló, bobandú na kati ya mopepe, esanganaki mpe esalaki mapata mpe ekitisaki yango, esili wana.

<sup>92</sup> Sikawa, toyebi lelo, ete móto ezali kuna na likoló, mpo bagaz ezalaka na kati ya mabelé. Mpe Biblia elobi: “Likoló mpe nse ekoleka na makelele makasi, mpe mabelé ekoniángwa na móto

makasi.” Boye, toyebi ete ezalaka kuna na likoló, boye, kaka lokola ezalaki na mikolo ya Noa.

<sup>93</sup> Sikawa, bómikanisela, Nsango ya ntango ya Noa ezalaki kaka na nzela ya kondima, kasi endimisamaki na science te. Kasi, lelo, Nsango ezali yengebene na Liloba na Nzambe, mpe endimisami na science. Eliya ayaki liboso, kosaláká bikamwa, ateyaki ata te; kaka kokendéké bipai na bipai, kosaláká bikamwa. Na mbala oyo elandaki, ayaki na lolenge ya Yoane Mobatisi, ayaki na kosaláká bikamwa te, kaka koteya. Na mbala ya misato oyo ayei, bikamwa ná koteya nyonso mibale ezali. Bomoni? Bomoni ndenge ezali? Bótala ndenge Makomi ezali kokóba kotambola. Tokokaki mpenza kolekisa ntango molai likoló na yango, kasi tokosala yango te, tokotia yango mpembeni, mpo nakanisi ete bosósoli.

<sup>94</sup> Asalaki na eleko wana, kaka ndenge Asálaki na bileko nyonso, mpe ndenge Akosala, kaka ndenge Alakaki kosala. Soki Nzambe alaki likambo, na nsima Akitaka mpo na kondimisa ete Liloba na Ye ezali solo. Baoyo nyonso bandimaki, baoyo nyonso bandimaki Nsango ya eleko yango, bakotaki mpe babikisamaki. Ekozala mpe bongo na eleko nyonso. Baoyo nyonso baboyaki kondima Nsango ná motindami, bakufaki.

<sup>95</sup> Mpe baoyo nyonso bandimaka mpenza Liloba na Nzambe lelo, bakonetolama. Baoyo nyonso baboyaka kondima Liloba na Nzambe, bakokufa elongo ná mokili, mpo bazali ya mokili, mpe eloko nyonso oyo ezali na kati ya mokili esengeli kokufa elongo ná mokili. Mpe eloko nyonso oyo ebikisami na kati na Nzambe, esengeli kozala kati na Nzambe, mpe ekoki kokufa te: “Nakopesa bango Bomoi na Seko, mpe Nakosekwisa bango na mokolo ya nsuka.” Sikawa, ezali mpenza libondisi mpo na mondimi nyonso, koyeba ete, ntango ozali kati na Klisto, kaka ndenge Nzambe akokisaka Liloba na Ye mpe abomaka mokili, Ye akokokisa Liloba na Ye, akosekwisa bato na Ye mpe akobikisa bango. Andimisaka yango.

<sup>96</sup> Andimisaki ete Liloba na Ye ya elaká ezalaki solo epai na Abraham na eleko na ye. Bótala, ezalaki libanda na makambo science, na eleko ya Abraham, ete mobali ya mibu mokama, ná mwasi ya mibu ntuku libwa, bábota mwana, wana basilaki koleka mibu yango. Kasi Abraham akokaki kolimbola yango te. Soki ákendeke epai ya monganga, koloba: “Monganga, ekoki nde kosalema?”

<sup>97</sup> “Ekoki kosalema te!” Soki ákendeke na lopitalo mpe ámilengelaka mpo mama ábota mwana yango, to soko nini ekokaki kozala, soki bolingi kokokanisa yango na eleko oyo, balingaki kobenga ye moto ya liboma: “Abeli liboma.”

<sup>98</sup> Kasi Nzambe alobaki! Mpe ye. . . Biblia elobaki na Baroma, mokapo ya 4, ete “Abraham atengá-tengaki te mpo na elaká ya Nzambe, na kozanga kondima, kasi akómaki makasi, azalaki

kokumisa Nzambe. Mpamba te ayikaki mpiko lokola azali komona Ye Oyo amonanaka te, mpe asepelaki, asimbaki makasi.” Kotelemáká ngwi, mpo andimisamaki na mobimba ete likambo oyo Nzambe alakaki, Nzambe azalaki na makoki ya kosala yango! Mpe biso tosendeli kozala bana na ye. Amen! Sikawa, namiyoki mosambeli, bomoni, kaka ntango nakanisi likambo yango. Oh, Andimisaki yango, nsima na mibu nyonso wana, Abongolaki Abraham, mpe Sara azóngaki elenge mwasi, mpe abotaki mwana yango. Mpe Abraham ná Sara babikaki... Nsima na mibu ntuku minei na mitano, Sara akufaki, mpe Abraham abáláki lisusu, nsima na mibu mokama na ntuku minei na mitano, mpe abotaki bana mibali nsambo, libanda na bana na ye ya basi. Nzokande, asilaki koleka mibu ya kobotisa, azaláki ekomba, a—azaláki na momboto te, na bomoi lisusu kati na ye te, pene na mibu mokama liboso na yango. Amen! Mpo na nini? Atalaki nzoto na ye moko te, atalaki te ndenge libumu ya Sara esilaki kokufa. Atalaki kaka oyo Nzambe alobáki, mpe ayebaki ete Nzambe akondimisa oyo Alobáki. Amen! Nzambe andimisaka oyo Ye alobaka ete Akosala. Katikati na baoyo bazali libanda na makambo ya science ná bato ya science, mpe—mpe katikati na makambo nyonso, ézala eloko nini, Nzambe andimisaka ete Alobaka solo, Andimisaka ntango nyonso Liloba na Ye. Ye alobaka solo, bamosusu nyonso bazalaka na libunga.

<sup>99</sup> Lisusu, Andimisaki Yango epai ya Lota, ntango Alobaki: “Soki obimi na engumba oyo te, Nakotumba yango.” Mpe Ayebisaki Abraham, soki Akokaki “kozua bato zomi,” Akoboma engumba yango te. Kasi Akokaki kozua bato zomi yango te, na bongo Atalisaki polele ete Liloba na Ye ezalaki solo.

<sup>100</sup> “Móto yango ekouta wapi? Ata móto moko te ezali awa, na bisóbe oyo, awa, na mabulu ya gudró oyo.” Kasi Nzambe nde alobaki bongo, mpe Abraham ayebaki ete ekosalema. Lota ayebaki ete Ezalaki bongo, mpe akimaki na ngomba.

<sup>101</sup> Alakaki ete momboto na ye, bakozala bapaya na mboka mopaya, mpe bakotiolama na bato, mpe bakofanda kuna, momboto ya Abraham, mibu nkama minei katikati na bapaya, na libota ya bapaya. Mpe Akokisaki mpenza Liloba na Ye, lolenge oyo mpenza Alobaki ete Akosala. Momboto ya Abraham efandaki mpenza na Ezipito mibu nkama minei. Alakaki, lisusu, kosikola bango na loboko ya nguyua. Na loboko ya nguyua, Akosikola libota yango na boómbo na Ezipito. Mpe Akokisaki Liloba na Ye. Bótala ndenge Asengelaki kosala mpo na komema bana yango na Ezipito. Emonanaki lokola likáma moko ekweaki, ezalaki kokwea, mpe nyonso wana. Emonanaki lokola . . .

<sup>102</sup> Ezalaki nsómo mpo Yosefe átángama lokola mokufi, mpe mobange Yisaka, to Yakobo, tata na ye (to Yisaka, tata na ye, kútu, to Yakobo, oyo azalaki, Yisaka azalaki nkóko na ye) mpo Yakobo, tata na ye, ándima ete mwana na ye mpenza abomamaki na banyama. Ezalaki mpenza mpasi mpo na Yosefe moke koyeba

ete ye mwana moke mpenza, mosika na libota na ye, atekamaki na bandeko na ye, abwakamaki na kati ya libulu, bakanisaki ete akufaki, bapakolaki makila ya mpate na monkóto na ye, esika oyo, bautaki koboma mwana mpate moko mpo bália yango, bapakolaki yango makila mpe bamemaki yango epai ya tata na ye, mpo áyeba makambo nyonso wana. Kasi Yosefe akokaki komikanisela likambo moko, ete loboko ya Nkolo ezalaki likoló na ye. Ayebaki ete azalaki mondimi. Ata bandeko na ye baboyaki ye ndenge nini, ata boyokani to eloko mosusu ezalaki te, Yosefe ayebaki Nzambe akobatela Liloba na Ye. Ntango amonáká emononeli wana, ya bango nyonso kofukama liboso na ye, ayebaki ete yango esengelaki kokokisama, mpo ezalaki YANGO ELOBI NKOLO. Amen. Ata emonanaki lokola likambo ya bolémá, Yosefe ayebaki ete ezalaki solo. Ata mokumba yango ezalaki mpasi ndenge nini, ná makambo oyo asengelaki koleka na yango, ayebaki ete mokolo moko bango nyonso bakofukama liboso ya makolo na ye. Alingaki kosala yango ndenge nini, wana bazalaki koyina ye? Kasi ayebaki ete Nzambe akondimisa mpenza Liloba na Ye, ntango nyonso.

<sup>103</sup> Akosala mpe bongo lelo! Nzambe akondimisa Liloba na Ye mpenza, ata science ekoloba ete: “Ekoki kosalema te.” Ata toyekoli ndenge nini, ata tokómi na mayele mingi, ata mangomba emikotisi na—na makambo mingi ya mpamba-mpamba mpe bongo na bongo, Nzambe akondimisa kaka Liloba na Ye ete ezali “solo.” Bómipémisa mpenza na kati ya Liloba yango.

<sup>104</sup> Iyo, Yosefe asengelaki koleka na makambo mingi, kasi, mpo na kokita kuna na Ezipito, kasi Nzambe abimisaki ye na yango, kaka ndenge Alobáká; elilingi moko kitoko mpenza mpo na lelo, soki tozalaki na ntango ya koyekola yango. Nakanisi tosilá koyekola yango, liboso, awa na eyanganelo. Kasi Nzambe abatelaki Liloba na Ye, mpamba te, basengelaki koumela kuna. Ezalaki mpasi mpo na bana ya Baebele wana, kozala kuna, na boómbo na Ezipito, baoyo basilaki kopambolama mpe kopesamela mbuma ya ekólo, esika ya malamú koleka, Goshen, komona ete basengelaki kokóma baómbo; ná bamama wana, oyo basengeláki kopesa na maboko ya basodá ya Ezipito, mbuma ya mabumu na bango, mwa babebé na bango ya bolingo, mpe komona ye atelemei wana, azui mbeli ya monene, apasoli mwana mpe abwaki ye na mabelé, mpo kopesa ye lokola bilei na bangandó. Sikawa, ezalaki likambo ya mpasi mpo na bango, kosengela koleka na likambo yango.

<sup>105</sup> Kasi mokolo moko, momboto oyo ebongisámá liboso ebotamaki, mwana moko oyo azalaki mwana oyo abongi. Ezalaki na eloko moko na ntina na ye oyo emonanaki lokola ndenge mosusu. Kuna na nsima na bilíki, mokolo moko, Molimo Mosanto ekitaki na lolenge ya Likonzi na Móto mpe efandaki kati na mwa nzete, mpe elobaki: “Nayoki kolela-lela ya libota na Ngai, mpe Namikaniseli elaká na Ngai. Ntango ya lisiko ekómi

pene, mpe Nazali kotinda yo kuna mpo na kosala yango.” Ná língenda na loboko, mwasi na ye likoló ya mbalata-mpunda, mwana moke na mabólóngó ya mama, asalaki yango na nguya ya Nzambe na Nguya-nyonso. Likambo ya nsoni koleka, mwa língenda oyo eténgámá elingaki—elingaki kosala nini, liboso na makongá nkóto zomi? Kasi, bomoni, Nzambe azali kati na yango. Etalaka esika oyo Liloba na Ye ezali. Mose azalaki na Liloba na Ye, Falo azalaki na makongá. Mose azalaki na Liloba.

<sup>106</sup> Yango nde nyonso oyo asengelaki na yango, Liloba. Yango nde nyonso oyo osengeli na yango lelo. Ezali mokanda ya lingomba moko boye te. Ozali na bosenga ya kosungama na denomination moko te. Ozali na bosenga na Liloba, mpo na Konétolama ná Yango. Ozali na bosenga ya mokanda moko boye te. Ozali na bosenga ya histoire moko molai ya eteyelo moko boye te, mpo na kobikisama na bokono na ntongo oyo. Ozali na bosenga ya koyamba Liloba, esili!

<sup>107</sup> Ozali na bosenga ya liloba ya monganga te. Soki monganga alobi ete asili kosala nyonso oyo akoki kosala, yango nde nyonso oyo ye akoki kosala. Soki alobi ete ozali na cancer, tumeur, miso na yo ekokufa, matoi ekúfi, ozali bába, ézala soko nini, wana ezali na ntina te. Soki okoki komema Liloba yango na elaká oyo ezali kopela móto, ya mwa nzete yango kuna, amen, likambo moko ekosalema! Nzambe akotalisa polele ete ezali Liloba na Ye, ntango nyonso oyo Ekoyambama na mabelé ya lolenge ya malamú. Yango nde oyo osengeli na yango, Liloba na Ye. Andimisaka Yango, Abatelaka Yango. Okoki mpenza kondimisama ete Ezali solo.

<sup>108</sup> Andimisaka Liloba na Ye na bileko nyonso, na ndenge ya libanda na momesano kasi Asalaka yango ntango nyonso ndenge moko. Bomoni? Asalaki nini na mikolo ya Noa, ntango Alingaki kosikola litika yango? Atindelaki bango Noa, mosakoli. Atindaki Noa, elembó.

<sup>109</sup> Sikawa bótala, ntango Ayei kosikola bana ya Yisraele, Asali eloko nini? Lolenge moko Asalaka, Atindaka mosakoli na Ye. Mosakoli na Ye azalaka na Liloba. Bilembó ná bikamwa ya Liloba oyo elakamaki endimisaka yango, ete ezali mpenza Solo. Yisraele atámbolaki kino na mboka ya elaká, mpo bandimaki yango.

<sup>110</sup> Mpe na mobembo kati na esobe, esalemaki ete bandimaki mosakoli yango te, nsima na bango komona Liloba kotatolama mpenza, Mwasi na libala abimaki na molongo (boyebi eloko nini nazolobela, na kati ya emononeli, bomoni, “babimaki na molongo”). Moto moko mpamba atikalaki na molongo, nkombo na ye Yoswa, ná Kalebe, bandimaki ete Liloba ya elaká ezali solo, etalaki te makambo oyo ezalaki kosalema.

<sup>111</sup> Bótala ntango bakómaki na Kadesi-Balenea. Na Kadesi-Balenea, Mose atindaki moto moko na libota moko na moko,



mpo na kokende konónga mboka yango, mpe komona nzela nini basengelaki kokota. Atindaki general na ye, Yoswa, oyo azalaki mosakoli, boye, atindaki mosakoli ya moke na nsé ya Mose. Mpe Yoswa ayokaki Mose. Batindaki ye kuna, bongo, alobaki: “Kende kuna konónga mboka yango.”

<sup>112</sup> Mpe general akendeki kozua moto moko na libota moko na moko, mpe bakendeki. Azuaki Kalebe, moninga na ye ya motema, mpo ayebaki ete Kalebe azalaki kondima. Bakendeki kino na mboka ya elaká, mpe bazongaki ná bambuma ya vínyo oyo esengelaki komemama na bato mibale. Tóloba, alobaki sikawa: “Mpo Yisraele ázua ndanga liboso bákota ata na kati ya elaká. Bomoni, bakoza ndanga ete Nzambe alobaki ete ezali mboka ya malamú, etondi na míliki ná mafuta-ya-nzoi. Ezali mboka monene mpenza. Ezali mboka malamú. Sikawa . . . oh, ba-áyi nyonso ya kala wana, matungulu, ná nyonso oyo bozali na yango awa na Ezipito. Sikawa tozali komema bino na mboka oyo ezali na míliki mpe mafuta-ya-nzoi. Ntango mosusu botikálá te komeka elengi ya míliki to mafuta-ya-nzoi, kuna na Ezipito, na mibu nyonso oyo. Bapesaka bino kaka mwa póso ya baómbo. Kasi sikawa bozali kokende na mboka oyo.” Boye, kaka ntango basalaki mobembo ya mokolo moko mpamba, na Kadesi-Balenea, esika ngwende monene ya kosambisama ya mokili ezalaki, batelemaki na nsé ya ba-banzete minene ya mbila, kuna, na maziba, mpe basalaki molako. Alobaki: “Sikawa, mpo bato bákoka koyeba . . .” Bótala ndenge yango ezali ndanga ebongi be mpenza, ya solosolo, ebongi be mpenza, ndenge Nzambe asalaka kaka ndenge Azali kosala lelo. Alobaki: “Sikawa, Nzambe alobaki: ‘Mboka yango ezali kitoko.’ Sikawa, liboso bókende kuna, nalingi ete bómoma ete mboka yango ezali kitoko. Boye bókende, bóyela ngai mwa ndanga ya mboka yango mpe bólakisa yango na bato.”

<sup>113</sup> Boye, bakendeki kuna. Mpe, sikawa, ntango nyonso oyo bokendeke mpo na komema ndanga, monguna azalaka wana na nzela. Ntango bamosusu na bango babwákaki miso mpe bamonaki bingambe minene ya Kanana, oh, la la, balobaki: “Tokokoka te.” Kasi bango bazóngaki ná ndanga, kotalisa ete mboka yango ezalaki mpenza wana. Bakambámaki na libunga te. Nzambe azalaki kondimisa bango Liloba na Ye, liboso kutu bákota na mboka yango.

<sup>114</sup> Bokoki te komona, lelo, ete soki otamboli na motuka kilometre moko na ndambo mpo na koyoka Liloba, mpe omoni Yango kondimisama mpe kotatolama, ezali ndanga ete ezali Mboka moko kitoko? Bokoki komona elilingi ya moto oyo alali wana ná cancer, kobundáká na liwa, “Bikisámá.” Soki tomoni Maloba ya Nzambe, oyo Alobaki ete ekosalema lelo, kotatolama polele, ezali ndanga, kotalisa ete Abatelaka Liloba na Ye. Mboka moko ya kitoko ezali. Soki bomoi na ngai ekómi na nsuka, mpe Nzambe akiti mpo abateli yango lisusu, yango elakisi ete

ndanga ya Bomoï na Seko ezali. Kala, esika oyo ozaláká kolinga kokóma ata pene na ekuke ya losambo yango te, sikawa okómi kotelema na molongo mpo na kokota kati. Ezali ndanga. Nzambe abatelaka Liloba na Ye mpe andimisaka yo Yango, ete Ezali solo.

<sup>115</sup> Bokokumba motuka kilometre nkoto na nkoto; nayaki awa na ntongo, nabwakaki miso kuna mpe namonaki bato bazoleisa bana na bango na molangi ya Coca-cola, mwa poto-poto, pene na ngonga ya mitano na ntongo, bafandaki na etando wana. Namilobelaki: “E Nzambe, nakozala mokosi ya mabe koleka na mokili, soki natiki bato yango kouta mosika mpenza, bongo nayebisi bango likambo ya lokuta. Kasi nayokelaka bango mawa, motema na ngai ezalaka elongo na bango. Bazali na nzala mpe na mposa ya Nzambe. Sungá ngai, Nkolo, mpo náyebisa bango Solo, soki te, longola ngai na mokili oyo. Tika ete náyebisa bango Solo, boye, sunga ngai, e Nzambe.” Nalobaki: “Símba loboko na ngai, mpe tika nayeba nini ezali Solo, na nsima, tátola yango na nzela ya kokokisa makambo oyo nalobaki ete ezali Solo, mpo báyeba ete Yango ezali Solo. Kotika te ete bato yango bápengwisama. Te.” Motema na ngai esalaka mpsi mpo na makambo ya ndenge wana, komona bato ya bosembo mpenza!

<sup>116</sup> Nabanzi Yoswa akanisaki ndenge moko, mokolo wana, ntango asangisaki bango, amonaki bango kosukola bilamba na bango mpe komilengela mpo na mokolo ya misato. Iyo, Andimisaki yango. Sikawa, Yoswa alobaki nini? Ntango balobaki: “Oh, tokoki kosala yango te. Bokoki kosala yango te. Tokosengela kobima na ebongiseli na biso. Tobebi—tobebi—tobebi na biso. Bomoni, sikawa, tokokaki kosala yango te. Tokokoka na biso kosala likambo oyo te, mpo ezali mpenza boléma.” Mpe ntango Yoswa akambaki bango kuna, ezalaki na sanza ya Minei, ntango mai ezalaki ya kotónda, mpe Yaladene ekómaki monene mpenza lokola Ebale Ohio. Emonanaki lokola Nzambe asalaki libúnga moko monene.

<sup>117</sup> Boyebi, ntango mosusu soki obeli, olobaka: “Ee, nazali Moklisto. E Nzambe, A—Asalaki libúnga, Atiki ngai nábela, mpe nazali Moklisto.” Boyebi te ete Biblia elobaki ete makambo nyonso ekotambola elongo mpo na bolamu ya baoyo balingaka Nzambe?

<sup>118</sup> Esika oyo Yoswa akambáki bango wana, sikawa, Yaladene ekiti mingi mpenza. Okoki kokatisa yango na makolo, ata na esika nini, loba kaka soki otii lokolo na libulu ya mai, na esika ya bozindo mingi; okoki na yo, na mwa bisika oyo ezangi bozindo mpe bisika mosusu kuna, na—na mabóngo, esika Yeliko ezaláká. Ee, ezali, okoki mpenza kokatisa yango na makolo, bozindo na yango elekaka ata litíndí te, okoki kokatisa yango na motuka ya jeep, kokumba, kokatisa yango na motuka, kotambola na makolo, to na eloko mosusu. Kasi akambáki bango kuna, na sanza ya Minei, ntango etúka yango etondaka na mai, pene na kilometre moko na ndambo. Mai yango ekómaki

mbala mosusu na bozindo ya metre pene na zomi to zomi na mibale. Mpe alobaki: “Na mokolo ya misato, tokokatisa. Nzambe alobaki bongo! Sangísa bato elongo mpe búlisa bango, mpo, na mokolo ya misato, bokokatisa Yaladene.” Bomoni ndenge Nzambe atikaka likambo yango ésalema? Kaka mpo na kosala yango, kosala ete bato. . . kaka mpo na kobimisa bato na Ye. Basálaki nini? Bamibúlisaki mpe bamilengelaki, ata soko mai yango ezalaki na bozindo boni, ná potopóto boni, ná lombangu ya kotsiola boni. Bomoni, bayebaki ete Nzambe akondimisa Liloba na Ye.

<sup>119</sup> Ata likambo nini, ndenge nini ozali mpembeni na Yaladene, ata makambo na yo ezali ndenge nini, okoki kaka kosimba elaka wana ya Nzambe, na motema, Nzambe akondimisa yango, ete Ezali bongo. Katikati na kozanga kondima nyonso, Akondimisa Yango kaka, ete Ezali bongo. Iyo, Akosala yango. Lolenge ya makambo epekisaka Ye te, Akokoba kosala ndenge moko, ndenge Asaláká na ntango wana.

<sup>120</sup> Bótala, ezalaki na nzela ya bandimi na Ye nde Andimisaka Liloba na Ye. Akoki kondimisa Liloba na Ye kaka . . . na bazangi-kondima te, kaka na nzela ya bandimi nde Akoki kondimisa Liloba na Ye. Ata bamosusu na bango babetaki tólo ete bazalaki banani: “Oh, nandimi, ndeko!” Bomoni, soki ondimi, Nzambe akondimisa yango ete ezali bongo, mpo totalaka mpe tomonaka bato mosusu. Tokoki koyeba yango ndenge nini, kasi? Bomoni, na nzela ya bandimi ya solo nde Andimisaka Liloba na Ye; ezali te na nzela na baoyo *balobaka* ete bandimi, kasi baoyo bandimi mpenza. Na nzela na bana na Ye oyo bandimi nde Andimisaka Liloba na Ye.

<sup>121</sup> Sikawa, azalaki na bandimi. Mbuma ya kala esilaki kokufa, bazangi-kondima oyo balobaki: “Tokokoka kozua yango te,” Atikaki ete bango nyonso bákufa (mpo na nini?), bango nyonso, longola kaka bandimi. Banani batikalaki? Mose asilaki komemama na Nkembo. Bazangi-kondima basilaki kokufa na esobe, mpe oyo ezalaki bana na bango. Ezalaki bobele na bato mibale oyo bakatisaki na ngámbo, baoyo bazalaki bandimi, Yoswa ná Kalebe. Bango nde bazalaki bandimi, bango nde baoyo bakatisaki na ngámbo. Yango ezali lolenge kaka moko oyo Nzambe akoki kosala likambo yango, ezali na nzela ya bana na Ye oyo bazondima. Bondimi yango? Malamu. Bandimi na Ye ezalaki baoyo basalaki yango. Asalelaki bango mpo na kokatisa na ngámbo ná bango. Bomoni?

<sup>122</sup> Sikawa, nalingi ete bótala malamumu, Asalaka bongo na bileko nyonso. Asalelaka yango ntango nyonso na lolenge yango moko, Asengeli kozua bandimi. Na nsima, mpo na bandimi bákutana na Liloba yango, Asengeli kobongisa yango liboso mpo na eleko wana. Bomoni yango? Asengeli kobongisa liboso likambo yango, mpo ézala wana, mpo na élonga oyo eleko yango esengi. Ezuaki bino? Boyokaki yango na nzoto? Bomonaki yango? Bososoli

yango? Yango nde ezali kosalema lelo, Abongisaki yango liboso mpo na likambo oyo, na boyebi na Ye makambo liboso. Oyo Abongisaki liboso, na Malaki 4, esengeli kosálema. Ntango Ayaka kobongisa liboso makambo oyo esengeli kosalema na Liloba na Ye, Asengeli kondimisa Liloba na Ye, ete ezali bongo. Ntango Abongisaka liboso makambo mpo na kosalema mpe Alobi ete ekosalema, Ayebaka ete momboto yango ekozala wana na ntango yango mpenza. Abongisaki liboso Mwasi na libala moko, Akozala wana! Konetolama ekosalema, Akozala wana! Abongisaka yango liboso, na boyebi na Ye makambo liboso. Bomoni, eloko moko te ekopekisa yango.

<sup>123</sup> Ntango Nzambe ayebisaki bango: “Sikawa, Napesi bino elaká ya mboka na elaká. Nayebisaki tata na bino, Abraham, ete bana na ye bakofanda awa mibu nkama minei.”

<sup>124</sup> Sikawa, Mose alobaki: “Nazali mosakoli na Nkolo. Sikawa bólandela malamú mpe bójala makambo oyo nasakoli. Soki ekokisami, na bongo, bokoyeba ete natindami na Nkolo, mpo boyebi ete Nzambe asilaki koyebisa bino yango. Sikawa, sikawa soki nasakoli likambo *oyo* mpe esálemi, mpe likambo *oyo wana* mpe esalemi, ná likambo *oyo* mpe esálemi, mbala nyonso ndenge moko, na bongo, bokoyeba ete Nkolo nde atindaki ngai mpo náyebisa bino yango. Sikawa, mboka ya elaká moko ezali, oyo Nzambe alakaki. Bomoni? Mpe Nzambe nde alakaki mboka oyo. Sikawa, ezali mboka moko kitoko, ezali kofúluka miliki ná mafuta-ya-nzoi. Bólanda ngai.”

<sup>125</sup> Bongo, ntango bakendeki na esobe, epai asengelaki kosala mobembo, mpo ámema bango na esobe, epai Nzambe ayebisáká ye ete ámema bango, na Ngomba Sinai, na nsima, Nzambe akitaki liboso na Yisraele nyonso, ná Likonzi na Móto, mpe Atátolaki makambo oyo Mose alobaki, ezalaki wana, andimisaki ete ezalaki ya solo, kotatoláká Mose kuna: “Mose alobaki ete Nazalaki na ngomba oyo, Nakutanaki ná ye na lolenge ya nzete ezali-kopela-móto. Sikawa Napelisi móto na ngomba mobimba.”

<sup>126</sup> Balobaki: “Tála! Kotika te Nzambe áloba, tika Mose áloba. Tokokufa.”

<sup>127</sup> Alobaki: “Na—Na—Nakosála likambo oyo lisusu te. Nakotelemisela bango mosakoli, ako—akoloba na bango na Nkombo na Ngai.” Boye yango nde Asalaka, lolenge wana mpenza nde Akokisaka Liloba na Ye.

<sup>128</sup> Bótala, na bongo, baoyo bandimaki te, nsima na bango kokóma mpenza pene na mboka yango, batiaki ntembe. Sikawa, bino baoyo bozali kokoma, bócoma Baebele 6, kaka awa epai elobaki: “Baoyo basilaki kongengisama, kosangana na Molimo Mosanto; mpo, soki bakweyi, bakoki lisusu te kozongisama mpo na kobongola motema; mpo bazali bango moko kobáka lisusu Mwana na Nzambe na ekulusu, mpe koyokisa Ye nsoni na miso ya bato; ekoki kosalema te ete bango bábikisama.” Bomoni, kaka

ndenge ekokáki kosalema te ete bákatisa na ngámbo mpo na kokota na mboka na elaka.

<sup>129</sup> Bato bapusanaka mpenza pene na Libatisi ya Molimo Mosanto, bapusanaka mpenza pene na Liloba, balekaka na nzela ya bibongiseli ndenge na ndenge, ná mangomba ndenge na ndenge, ná ba-katekísimo ndenge na ndenge, mpe nyonso wana, kasi ntango ekomaka na oyo etali Liloba yango, ndelo ya kokatisa wana, balobaka: “Oh, nayebi Yango te, lingomba na biso eteyaka Yango bongo te.” Oyo lingomba na bino eteyaka etali ngai te, Biblia elobi ete Ezali ndenge wana. Na nsima, bolobaka: “Nakoyeba ndenge nini ete Ezali solo?” Atátolaka Yango, mpe Andimisaka Yango!

<sup>130</sup> Sikawa, Biblia, na eleko wana, elobaki: “Mboka moko ya kitoko ezali kuna, mpe etóndi na míliki ná mafuta-ya-nzoi, ná bambuma kitoko ya vínyo mpe limóna, ná, oh, ezali esika moko kitoko.”

<sup>131</sup> Ee, balobaki: “Sikawa, bamosusu kati na bino bákóma kuna na mayele, bátala yango, mpe bázónge, mpo tókoka kobondisa bato oyo. Tolingi sika-sikawa kokatisa na ngámbo, soki bino nyonso bondimi yango mpenza.” Ee, basimbaki nzela bakendekei.

<sup>132</sup> Mpe tala, bazongaki, oh, mibale na bango, bazalaki mpenza kogánga: “Ee, nkembo na Nzambe! Tomoni yango! Tomoni yango! Oh, ezali kitoko mingi, eloko moko te ekokani na yango!” Bamosusu, bango zomi bazalaki zinga-zinga, bazalaki koloba: “Oh, te, te, te, te, tokokoka kosala yango te.” Bato boni bakátisaki na ngámbo? Bango mibale wana! Ya solo. Bango mibale wana, mpo bayebaki ete Nzambe akondimisa ete Liloba na Ye ezali solo. Bótala, kovimba ya Yaladene te, te misie, kotonga ya mabóngo ya Yaladene te, to bingambé ya Kanana moko te, bakokaki kopekisa bango. Nzambe andimisaki ete Liloba na Ye ezalaki bongo, Amemaki bango sémba kino na mboka yango.

<sup>133</sup> Akosala lisusu ndenge moko, iyo, misie, na bilaka ya lelo. Andimisaka Liloba na Ye. Ata ndenge nini, Andimisaka Liloba na Ye.

<sup>134</sup> Akangáki minoko ya bankosi ya nzala oyo bazalaki kolia bato, mokolo moko, mpo na kondimisa, na mosakoli Daniele, ete Liloba na Ye ezalaki solo, ete Azalaki na makoki ya kokangola. Bazalaki kobomba bankosi yango mpo na koleisa bango misuni ya bato. Mpe bazalaki koboma bankosi yango na nzala, mpo ntango moto abwákami kuna, to mwana moke, nyonso oyo bazalaki kobwaka kuna, ezalaki nde etumbu ya liwa, nkosi yango ezalaki kokátakata bango biteni-biteni, liboke ya bankosi ya nzala wana. Mpe bazuaki mosakoli oyo, azalaki ná Liloba mpo na bana ya Yisraele, oyo asilaki kosakola ete bakozua esika yango. Mpe azalaki wana, elongo ná bango. Kasi Nzambe asilisaki naino te, Azalaki na mposa ya kondimisa Liloba na Ye,

ete Azalaki na makoki ya kokangola. Mpe babomaki bankosi yango na nzala, mpe babwakaki mosakoli yango kuna na kati, mpe bayelaki ye mbangu ndenge wana. Likonzi na Móto yango ezalaki wana, (mpe nyama nyonso ebángaka móto), Likonzi na Móto yango ezalaki wana, bankosi bafandaki na nse. Abatelaki Liloba na Ye. Azali ndenge moko lobi, lelo mpe libela. Nzambe abatelaka Liloba na Ye, Andimisaka Yango, Andimisaka Yango, ete ezali bongo.

<sup>135</sup> Sikawa, Alongolaki molunge oyo ezalaki na kati ya ndémo na móto ya libeke na móto, mpo na kondimisa ete Liloba na Ye ezalaki bongo, ete Akokaki kokangola na móto. Na kati ya ndemo na móto wana mpenza, epai babwakaki bana yango, mpe baumelaki ntango molai kuna, na ntango oyo ata bato oyo babwakaki bango kuna na kati, molunge makasi ya—ya libeke yango ebomaki basodá ya mpiko oyo bazalaki komema bango kuna. Mpe Nzambe atikaki ete móto ékóba kopela, kasi Alongolaki molunge na yango. Andimisaka! Soki ozui ngámbo na Ye, Ye mpe akozua ngámbo na yo. Akozua ngámbo na yo? Ee, na ntembe te! Ngonga moko nsima na yango, bafungolaki ekuke, mpe balobaki: “Hé, ata bongo, bokotisaki bato boni kuna na kati?” Balobaki: “Tozali komona bato misato oyo tokotisaki kuna na kati.” Alobaki: “Bazali minei na kati kuna, mpe moko na bango azali lokola Mwana na Nzambe.” Bomoni, Atalisaka! Mpo na nini? Azali Liloba.

<sup>136</sup> Mpe balobaki: “Nzambe azali na makoki ya kokangola biso na libeke ya móto yango, kasi, ata bongo, tokogúmbamela ekeko moko te, mpo tozui ngámbo ya Liloba.” Zalá mosika na ekeko nyonso, na lolenge nyonso ya religion. Nzambe akozua ngámbo na yo. Akolongola molunge na monyoko yango. Akolongola bo—bomoi na cancer yango. Akolongola... Akosala nyonso; Azali Nzambe. Yo zua ngámbo na Ye; Akozua ngámbo na yo. Andimisaka ete Liloba na Ye ezali solo, ntango nyonso. Alongolaki molunge na kati ya ndémo ya móto, Akangaki minoko ya bankosi, mpe bongo na bongo.

<sup>137</sup> Bótala likambo mosusu oyo Nzambe asalaki, mpo na kotalisa ete Azalaki Nzambe. Bato bakómaki mpenza, na nsima, na kati ya esobe, bakómaki koluka bato ya mayele, komikómisa bato minene. Bakómaki na bibongiseli lokola Bafalisai, Basadukai, Baelóde, ná nyonso koleka wana. Mpe bakómaki bato minene. Bamikómisaki banganganzambe katikati na bango. Mpe bakómaki kosala makambo minene ya ndenge wana, komikomisa banganganzambe bakonzi mpe bato minene, ná bato ya lokumu mpe bongo na bongo.

<sup>138</sup> Kasi Nzambe, katikati na nyonso wana, Atelemisaki mosakoli moko, mwana ya nganganzambe. Ata moke te... akendeki na esobe na mibu libwa. Akokaki kotánga nkombo na ye te, ata ekomamáki na nkomá ya minene lokola wagó. Ee, mpo na nini asalaki bongo? Azalaki mosakoli. Soki áyekolaka kelasi

lokola tata na ye, ntango mosusu alingaki kokóma Mofalisai to Mosadukai, to moko na bitóna na bango. Kasi azalaki na mosala ya motuya, ya kosakola boyei ya Masiya. Mpo na nini? Nzambe abatelaki Liloba na Ye, mpe andimisaki Yango. “Mongongo ya moto oyo azali kongánga longwa na likindo: ‘Bótala, nazui diplome na ngai ya molakisi’?” Wana—wana ekokaki kozala na Buku ya Bokundoli Mbotama ya Bamama Nkoko, kasi na Liloba ya Nzambe te. Alobaki: “Mongongo ya moto oyo azali kongánga na esobe: ‘Bóbongisa nzela ya Nkolo, mpe bósébola babalabala mpo na Ye!’” Azalaki nde kobongisa nzela ya Liloba, mpo Liloba ékoka kotalisama polele? Aleluya!

<sup>139</sup> Bozali komona yango te, na bililingi? Tótelema awa miniti moke. Na mikolo ya nsuka, esika moko esengeli kobongisama mpo Liloba étalisama polele, mpe sikawa tozali kobika na ndanga ya Mboka ya sika, amen, Mwana na moto.

<sup>140</sup> Etínda ya Yoane, atángaki te, azalaki na eloko moko te, azalaki kofanda na esobe. Mateya na ye ezalaki na bitaliseli. “Epasola etiami na mosisa ya nzete,” yango nde eloko oyo azalaki komona. Azalaki kokata na epasola, kotonga mwa ndako na ye, kosala móto mpo na kopelisa nkoni. “Oh, bino libota na nyoka,” oyo wana nde eloko oyo azalaki komona. Eloko oyo eleki na nkanza, na zamba, mpo na ye, na lisobe, ezalaki nyoka. Alobaki: “E libota na banyoka, nani akebisi bino mpo bókima nkanda oyo ezali koya? Bóbanda koloba te ete: ‘Tozali na eloko *boye*, tozali bato ya etonga *boye*, mpe tozali bato ya etonga *wana*.’ Nzambe azali na makoki ya kotemisela Abraham Bana longwa na mabanga oyo. Epasola etiami na mosisa ya nzete, mpe nzete nyonso oyo ekobota mbuma ya malamau te. . . .” Azalaki kosala nini na esobe ntango e. . . epesi ye mayoyo ná biloko mosusu te, azalaki kokata yango mpe kotumba yango. Bomoni? “Akosangisa blé na ebombelo, kasi Akozikisa matiti na móto oyo ekufaka te.” Moto ya ndenge wana, azalaki ata na kazáka ya bakambi-ya-lingomba te, azalaki ata na ekoti ya bapískópo te. Bomoni? Ayaki ná eteni ya loposo ya mpate oyo amizingaki na yango, ná eteni ya loposo ya mokongo ya kamela, epasúká-pasúká ezingá ye, mpe ayaki wana ná mandefu mpe suki epanzáná ndenge wana, alobaki: “Epasola etiami na mosisa ya nzete.” Amen. Ayaki na mpiko nyonso. Mpo na nini? Liloba na Nzambe ezalaki kondimisama: “Nzambe azali na makoki, uta na mabanga oyo!” Nzambe alakaki yango: “Tala, Natindi motindami na Ngai liboso na elongi na Ngai.” Ezali mpenza ndanga ya basambeli te, ya science te to ya basambeli te, kasi ndanga ya Liloba na Nzambe. Nzambe azalaki kobatela Liloba na Ye, bomoni. Azalaki ata moke te moto ya mayele mingi, kasi mosakoli atindami na Nkombo na Nkolo. Asalaki bongo, mpo na nini? Mpo na kotatola Liloba na Ye.

<sup>141</sup> Sikawa, banganzambe yango balobaki: “Sikawa, toyebi ete moto moko akoya na mikolo ya nsuka, boye, tokotángisa

bana mibali nyonso oyo tozali na bango, mpe tokomilengela mpo na yango. Bino nyonso, bana mibali, bosengeli kotánga na université. Bosengeli koya awa. Na ntembe te, ekozala na bakitani oyo, akoya na molongo ya Balewi, mpo kuna nde banganganzambe bautaka.” Kasi ye azalaki nganganzambe te, azalaki mosakoli! Mpe wana ezali koponama ya Nzambe. Azali na ntina ya kouta na denomination moko to bokitani moko boye te. Ezalaka koponama ya Nzambe, na kobongisama liboso, boyebi makambo liboso. Ayáka kokokana na lolenge ya koponama ya Nzambe. Boye, balingaki kondima ye te, mpo ayaki te na lolenge oyo bango babongisáká, ndenge bango bakanisáká ete akoya. Likambo yango ekoki kosalema lisusu, boyebi, esalemaka ntango mingi bongo. Kasi tomoni ete ayaki ndenge Nzambe abongisáká, mpo na kondimisa Liloba na Ye.

<sup>142</sup> Bótala, Asalaki ete mongondo ákumba zemi, mpo na kondimisa Liloba na Ye. Yisaya 9:6, mpe tomoni ete: “Mwana mobali abotameli biso, Mwana moko apesameli.” Sikawa, tomoni ete Alobáká ete mongondo moko akokumba zemi. Mpe Nzambe asalaki ete mongondo moko ákumba zemi. Mpo na nini? Mpo na kondimisa Liloba na Ye. Sikawa boyoka mwa miníti moke, tolingi kosilisa. Asalaki ete mongondo moko ákumba zemi, mpo na kondimisa Liloba na Ye. Ezalaki mpenza. . . Ekangaki minoko ya bato na science nyonso. [Maloba mazangi na bande—Mok.] . . kokende.

<sup>143</sup> Bososoli likambo yango, boye te? Bomoni, mabelé elakélámá mabe. Mabelé mobimba elakélámá mabe, mpo na lisumu ya Adama. Kasi ntango mwa momboto oyo. . . Sikawa, mwasi azalaka na momboto te. Azalaka na elanga moko, esika oyo momboto efandaka, momboto te, mpo ezalaka na germe moko te, germe esengeli ko. . . momboto esengeli kozala na bomoi kati na yango. Soki ezali te, ezali eloko mpamba, bomoi ezali kuna te. Boye, momboto ezalaka na kati ya mobali. Yango wana momboto na nyoka esengelaki kozala na kati ya mwasi, bomoni, mpo ezalaki momboto ya Nzambe te. Toyebi yango. Bókende liboso, bózela kino bokozua buku yango mpe bótánga yango, na nsima, boko—bokomona, to ekolakisa bino na nzela na Makomi, ekofungola likambo yango mobimba, kaka ndenge moko lokola libatisi na mai na Nkombo na Ye, bokomona yango. Nzambe azalaka na libunga ata moke te, Alobaka ntango nyonso sóló. Ata okoki kosósola Yango te, ndima Yango ata bongo. Bomoni? Ezali mpenza Solo.

<sup>144</sup> Mpe sikawa, tomoni ete A—Alobaki yango, Asalaki ete ékokisama. Sikawa, ntango mwa momboto yango, kozanga mobali, ekotaki na kati ya mwa líki moko, na elanga oyo Asiláká kokela, na nsima, mwa momboto yango, mwa germe yango ekotaki na kati ya líki yango, mpe mwa mokíla na yango elongwe wana, mpe ebandi kokóla, cellule moko nsima na mosusu, kobikáká uta na bomoi ya mama, na nzoto na ye, mpe kuna na



kati, aleisaka mwana na nzela ya makila na ye. Mpe tomoni, sikawa ete mama nde aleisaka ye; na makila ya mwana te; makila ya mama. Te, azalaka ata na litanga moko te ya makila ya mama. Kasi aliaka uta na vitamine oyo eutaka na mama, kasi makila ya mama te. Azingami mobimba na makila ya mama, mpo na kobatela mwana na kotutana mpe na makambo ya ndenge wana, ná mai, kasi azalaka ata na litanga moko te ya makila ya mama. Mama akoki kozala kokufa na tuberculose, mpe aboti mwana; yango ekoki kokitana na mwana te, mpo tuberculose ezali germe oyo etambolaka na makila. Kasi mama akoki . . . mwana akoki . . . Tuberculose ekitanaka te; bolembu ekitanaka, kasi tuberculose te, mpo asengeli kobenda pema ya mama mpo na kozua germe yango, bomoni, liboso ákoka kozua yango. Mwana azalaka mpenza na kobatelama ntango abotami, mpo azalaka na makila ya mama ata moke te.

<sup>145</sup> Sikawa, tomoni ete Nzambe akotaki na kati ya mwa cellule oyo, bomoni, mpe Abandaki kokólisa ba-cellule, oyo ebendami longwa na ba-vitamine ná biloko mosusu oyo mama azalaki kolia. Na nsima, ntango Akómaki mokólo mpe Akokaki kolia Ye moko, Abandáki kolia. Mpe ezali nini? Ezali—ezali mputulu ya mabelé, epai boutá, ná bomoi ya banzete ná bomoi ya banyama mpe bongo na bongo, mpe ntango Abandi kolia mbisi ná mápa mpe biloko mosusu, ebandi koyíkanisa ba-cellule. Na nsima, ntango ekólaki mpenza, na mibu ntuku misato, Abatisamaki na kotosa Yoane, awa, to mpo na kotosa Nzambe, na kati ya mai, mpe abimaki. Mpe, eloko nini esálemaki? Ebengá, oyo ezalaki Nzambe, akitaki uta na Likoló, ná Mongongo moko oyo elobaki: “Oyo azali Mwana na Ngai molingami, Nasepeli kofanda na kati na Ye.” Ayaki kosala eloko nini? Kosikola eteni wana ya mabelé. Azalaki ebandeli ya bokeli ya Nzambe. Mpamba te, Nzambe azali bokeli te, kaka kati na Klisto nde Azali bokeli, mpo Nzambe azali Seko-na-seko mpe Molimo, mpe Molimo ekelámá te. Azalaki ebandeli ya bokeli ya Nzambe, mpe Nzambe asíkolaki nzoto *wana*. Bomoni, ntango Akitaki: “Oyo azali Mwana na Ngai molingami, Nasepeli kofanda na kati na Ye.”

<sup>146</sup> Boye, Ye Nzambe akitaki, nsima na koleka na likambo yango, sikawa mwana nyonso, oyo aliaka mpe abotamaka na mbotama ya mokili oyo, ya koyebana nzoto, ndenge bobótámá; na bongo, ntango ekómaka na esika oyo oleki na libatisi ya mai, nsima na yango na libatisi ya Molimo Mosanto, na bongo, Molimo Mosanto akitaka na libatisi ya Móto mpe akamataka bokeli yango, ndenge moko oyo Asalaki mpo na Ye. Molimo Mosanto ná Nzambe, ezali Molimo yango moko. Bomoni? Ekitaka mpe Ekamataka nzoto oyo mpo na lisekwa. Mpe Asekwaki mpo kolóngisama na biso: “Baoyo nyonso Tata apesaki Ngai bakoya, ata moko te akobunga. Nakosekwisa bango na mokolo ya nsuka. Ata suki moko te ya motó ekobeba.” *Wana* ezali ebandeli ya bokeli ya Nzambe. *Oyo* ezali bokóbi ya bokeli ya Nzambe. *Nsima* nde mabelé mobimba

esengeli kozua libatishi. Na nsima nde Molimo Mosanto ekiti na engumba moko mpo na kofanda na mokili, mpe mongombo ya Nzambe ekómi elongo na bato, mpe efandi elongo na bango, Nzambe afandi na mongombo awa na mokili. Mwango mobimba ya lisiko, kolóngisama, kobulisama, libatishi ya Molimo Mosanto, ndenge moko oyo ezaláká na eleko wana.

<sup>147</sup> Sikawa bótala, Asalaki ete mongondo yango ákumba zemi, mpe ezali na lolenge wana nde abotaki Mwana kozanga koyebana ná mobali. Yango nde esili kokanga monoko ya science na bileko nyonso. Ezali kokanga yango kino lelo. Ntango mosusu batiolaki Yisaya, ntango asakólaki mpe alobaki ete mongondo akokumba zemi: “Sikawa, ekosalema ndenge nini?”

<sup>148</sup> Nakanisi, Yisaya, ndenge atungisamaki, ntango ayokaki Nzambe koloba: “Nakopesa bango elembo ya kokamwa koleka, Nakopesa bango elembo ya libela, mongondo moko akokumba zemi.” Sikawa, ye, azalaki na lokumu katikati na bato, bato na ye, azalaki mosakoli oyo atotolamaki na Nzambe. Sikawa, ntango akómaki liboso na minganga ná bamosusu, ná maloba oyo: “Mongondo moko akokumba zemi.” Bomoni, etikálá kolema te, uta na ebandeli ya ntango, ntango nyonso oyo Nzambe akelaki moto na Ye ya liboso. Kasi awa, sikawa, ezali ete, mwasi oyo azali awa na mokili nde akokumba zemi. Bókanisa naino likambo yango lokola bato mpenza, ndenge mosakoli yango atungisamaki, kasi ayebaki ete Nzambe akobatela Liloba na Ye, Akondimisa Yango. Nabanzi ete libota moko na moko ya Baebele ezalaki kolengela bana na bango ya basi mpo na kobota mwana yango, bomoni, ezalaki kosómbela ye ba-sapato ná ba-botte, to nyonso oyo balataka, ná mwa ba-couche, mpe azalaki komilengela mpo na—mpo na boyei ya mwana yango. Bikeke elekaki, kasi Nzambe Andimisaki Liloba na Ye!

<sup>149</sup> Mongondo akumbaki mpenza zemi, mpe abotaki Mwana yango, Andimisaki ete Liloba ya mosakoli na Ye ezalaki Solo, Azalaka ntango nyonso na ngambo na bango. Mwana ya mongondo oyo azalaki Liloba litalisami polele (Sikawa Yoane 1, soki bolingi kotánga yango, Yoane 1.), mosakoli oyo, mosakoli oyo, mpe lokola, kasi Mwana ya mongondo yango azalaki Liloba litalisami polele, ebandeli ya bokeli ya Nzambe. Sikawa, mabelé mobimba ezali bokeli ya Nzambe, kasi ebúngi. Bomoni? Na bongo, Asikoli mabelé yango. Bino ozali eteni ya mabelé, mpe Asikoli yo, na lolenge moko oyo Asikoli mabelé mobimba. Bomoni? Sikawa, Mwana ya mongondo oyo azalaki Liloba litalisami polele: “Na ebandeli Liloba ezalaki, Liloba ezalaki elongo na Nzambe, mpe Liloba ezalaki Nzambe. Mpe Liloba ekómaki nzoto mpe afandaki elongo na biso.”

<sup>150</sup> Satana amekaki mayele nyonso ya mabe mpo na Ye abebisa likambo oyo. Satana amekaki nyonso oyo akokaki kosala mpo—mpo na Ye ábebisa likambo yango, amekaki kosala ete Ázua bokonzi kozanga monyoko, amekaki kosala ete Ázua yango

kozanga lisiko (nzokande ezalaki mwango ya Nzambe, na elanga ya Edene, ntango Abomaki mwana mpate, ete Akozua yango kaka na nzela na makila), alakaki kutu Ye ba-bokonzi nyonso ya mokili, soki Alingaki kozua yango. Bókanisa naino elaká ya boye!

<sup>151</sup> Bozali kososola te, balingami baninga na ngai ya motuya, na miniti oyo, ete Satana azali kopesa bino elaká ya . . . akokómisa yo moko na batei na bango ya malamú koleka na kati ya lisangana. Akopesa yo kiti ya liboso na mangomba nyonso mpe akokómisa yo mosungi. Akosala nyonso, soki ondimi kaka kotika Liloba oyo.

<sup>152</sup> Sikawa bótala, kosala ete nyonso . . . kopesa Ye mokili ná makonzi nyonso, Akokaki kozua yango. Azalaki koluka kosala ete Ye abuka Liloba yango, mpo ayebaki ete akozua Ye na mbala moko, soki akokaki. Asalaki ete Mose ábuka Yango, asalaki ete Eva ábuka Yango, kasi na mbala oyo, akutanaki na Moto ya ndenge mosusu. Mpo na nini? Azalaki Liloba, kasi ye ayebaki yango te. Azalaki Liloba yango, Ye moko.

<sup>153</sup> Nakoki komona ye. Tolingi kotalisa ye lokola etaliseli ya bana mike. Nakoki komona mapapu minene ya moindo wana koya epai na Eva, mpe alobi: “Sikawa, nakoyebisa eloko moko, ezali elengi mpenza. Osengeli komeka yango.”

“Kasi Nzambe alobaki ete, soki tosali bongo, tokokufa.”

<sup>154</sup> “Oh, ee, na bosolo mpenza, bokokufa te. Omoni? Oh, ezali bolémá. Oyo wana ezali makanisi ya bato basilá ngala. Kondima eloko moko te.” Kasi Nzambe nde alobaki bongo! Nzambe andimisaki ete ezali solo. Mpe Azali kondimisa yango sikasikawa, bato bazali kokufa na miniti oyo. Andimisaka kino lelo, ete ezali solo.

<sup>155</sup> Bótala, mpe ntango akómaki epai na Mose, alobaki: “Mose, oyebi ete osilikaka na pete.” Hmm. “Ozalaka moto ya nkándá makasi. Tála makambo batomboki wana basili kosala, omoni. Mpo na nini okei kuna te mpo na kolobela bango mpenza na ntina na yango?” Mpe akendeki.

<sup>156</sup> Kasi ntango akutanaki na Nsinga ya lotiliki ya volt nkoto zomi, Ezikisaki nsála na ye, ntango akutanaki ná Ye. Alobaki: “Oh, yoka,” alobaki, “nakopesa Yo makonzi nyonso.”

“Ekomámi!” Bomoni? “Ekomámi!”

<sup>157</sup> Alobaki sikawa: “Soki Ozali Mwana na Nzambe.” Bomoni, atiaka ntembe na Yango ntango nyonso. Alakisaka bamosusu, kino lelo, kotia ntembe na Yango. Alakísaki Eva kotia Yango ntembe, alakísaki Mose, alakísaki bango nyonso komeka kotia Yango ntembe.

<sup>158</sup> Azolakisaka bino komeka kotia Yango ntembe. Bino baoyo bofandi awa sikawa, soki bolingi nátánga bankombo na bino, esali, Satana azali komeka banda kala, kosala ete bótiela ngai

ntembe. Bómeka kosala yango te. Ndeko mwasi, soki osali bongo, ee, yo. . . to, ngai te, kasi kaka kotia ntembe. Ndima kaka Liloba oyo. Ozali na ntina ya kondima ngai te, kasi ndima nde Oyo. Bomoni? Soki nalobi Liloba oyo, Ezali ya ngai te, Ezali ya Ye. Liloba na ngai ezali ndenge mosusu, kasi Oyo ezali ya Ye. Bomoni? Bótala sikawa, bótala. Nalingi kokota na likambo yango sikawa te.

<sup>159</sup> Bótala, elaka, Maloba na Ye nyonso, ezali mpenza solo. Andimisaki Yango. Andimisaki, mpo Andimisaki ete Azalaki Liloba ya solo. “Moto akobika bobele na lípa te, kasi na Liloba nyonso oyo ebimaka na monoko ya Nzambe.”

<sup>160</sup> Nini, akobika ndenge nini? Na: “Ee, soki andimi kaka mwa ndambo ya Liloba na Nzambe, akobika?” Sikawa, wana ezalaki te oyo Ye alobaki Ye. Bomonaki, n-y-o-n-s- . . . “Liloba nyonso?” Akobika ndenge nini? “Oh, aliaka kuna na kati?” Te, azali kokufa noki noki. Oyo wana ezali nzoto. “Ee, ye, oh, azalaka moto ya lingomba. Andimaka nyonso, longola kaka oyo *Wana*”? Azali kaka ebembe. Bosósoli yango?

“Akoki kobika bobele na Liloba nyonso oyo ekobimaka na monoko na . . .” Ya nganganzambe mokonzi, epískópo, cardinal, mokengeli? “Nzambe! Liloba nyonso oyo ekobimaka na monoko na Nzambe.” Toyebaka ndenge nini ete ezali Liloba na Nzambe? Soki Alobi bongo, na nsima Andimisaka Yango. Andimisaka Liloba na Ye. Bótala sikawa, soki ezali bongo, eyambweli na yo ekosala te ete óbika. Kozala mondimi ya lingomba ekosala te ete óbika.

Bótala, bobele na Liloba na Ye, kaka na Liloba moko te oyo etiami mabe. Moto moko te ako. . . Liloba kaka moko ebomaki libota ya bato. Na Biblia, na Emoniseli 22, liloba moko ekoboma likambo yango mobimba, nkombo na ye ekolongolama na Buku ya Bomoi. “Moto nyonso oyo akobakisa liloba moko, to akolongola Liloba moko.” Liloba moko te! Ezali te. . . Te, nalingi koloba, ma—maloba mibale te, liloba kaka moko! Phrase moko te; liloba moko! Liloba moko! Oh, baninga, bozali kosósola?

<sup>161</sup> Sikawa, nazali kaka koloba mpenza na eyanganelo oyo te. Liteya oyo ezali kotiamana na bande, bomoni, mpe Ekondeke na mokili mobimba. Bozali kosósola, bino bato na mokili, ete Liloba moko, Liloba moko, phrase moko te, paragraphe moko te, Liloba moko, yango nde nyonso oyo Eva azangaki kondima. Ememaki. . . Nzambe andimisaki yango. “Kasi na boye soki otósi Liloba nyonso, okobika.” Batiaki ntembe na Liloba moko, ememaki kufa na bato nyonso. Kasi moto akobika bobele na lípa te, mpo na makasi ya nzoto, kasi na Liloba nyonso, Liloba nyonso, kaka ndenge Ekomámi. Biblia elobi: “Ezali likambo ya ndimbola ya moto ye moko te.” Moto moko te asengeli, na esika moko te, ata moke te, komeka kolimbola Liloba na Nzambe. Nzambe azali molimboli na Ye Moko.

162 Ntango Alakáki, Alobaki: “Tika ete pole ézala,” mpe pole ezalaki. Alobaki: “Mongondo moko akokumba zemi,” mpe akumbaki zemi. Bomoni, nyonso oyo Nzambe alobaka, Nzambe andimisaka yango.

163 Ata omeki kokanisa ndenge nini ete lisekwa ya nzoto ekoki kosalema te, ete bato oyo bazali kuna, batíkálá kaka mputulú ya mabelé, mpe bazali lisusu mputulú te sikawa, bakómá ba-acide mpe ba-gaz, oyo banzoto na bango esalemáká na yango. Milimo na bango ezali kaka na bomoi. Nzambe alobaki: “Nakosekwisa yango.” Yobo alobaki: “Ata nkusú ebibisi nzoto oyo, nde kati na mosuni na ngai nakomona Nzambe.” Bomoni, ata ndenge nini, Liloba nyonso esengeli kotósama, mpe moto akobika na Liloba yango. Asekwisaki moto moko na bakufi, nsima na ye kokufa mikolo minei, mpo na kondimisa ete Azalaki lisekwa mpe Bomoi. Ntango moto asilaki kokufa mikolo minei mpe akómaki kolumba nsolo, zólo na ye esilaki kozinda na kati, na mikolo minei. Ezali ya solo. Eloko ya liboso oyo ezindaka na kati, mpo na moto, ezali zólo, ezindaka na kati ya ebembe, ekómaka moselú mpe ezindaka na kati. Na nsima, loposo, nkusú, bino. . . Soki batii yo na kati ya sandúku oyo ekangami malamú, to na eloko soko nini, kasi ata bongo, nkusú ya loposo ezali na ntina ya kouta na mabelé te, ezalaka na kati na yo. Bomonaki yango? Yobo alobaki: “Ata nku—nkusú ya loposo na ngai elei ngai.” Nkusú ya mabelé te, ata moko te elingaki kozala. Nkusú yango ezalaka kati na yo, ebelemi mpo na kolia yo, kufa ezali kosala mosala kati na nzoto na yo ya kufa. Kasi soki ozali na Klisto, na bongo, Bomoi nde ezali kosala mosala kati na nzoto na yo ya kufa, mpo na kosekwisa yo. Bomoni? Asekwisaki moto moko kati na bakufi, nsima na ye kokufa mikolo minei, “akómaki kolumba nsolo,” mpo na kondimisa ntango Alobaki: “Nazali lisekwa mpe Bomoi.” Sikawa, nani akoki koloba bongo soki Nzambe te, bomoni, “Nazali lisekwa mpe Bomoi. Ye oyo akondimela Ngai, ata akufi, akozala na bomoi.” Bondimi yango? Mpe Asekwisaki moto yango, mpo na kondimisa ete Liloba na Ye ezalaki solo. Ya solo!

164 Bótala, Azalaki Liloba. Baebele 4:12, soki bolingi kokoma yango. Baebele 4:12, elobaki: “Liloba na Nzambe ezali na mopotú koleka mopánga ya mino mibale, esósolaka makanisi mpe mikano ya motema.” Ezali bongo? “Esósolaka.” Mpo na kondimisa ete Azalaki Liloba, Asalaki nini? Petelo ayaki epai na Ye, nkombo na ye ezaláki Simona. Ayaki epai na Yesu, mpe Alobaki. . . afandaki wana, mpe Yesu, kaka ntango ayaki epai na Ye, Alobaki: “Nkombo na yo Simona, mpe ozali mwana na Yona.” Moínga, ná diplome moko te, azaláká na eloko moko te, kaka molóbi mbisi moko boye, oyo atángá te, Biblia elobaki ete azalaki “moínga mpe atángá te,” kasi akómaki episkopo ya lingomba ya—ya Yelusaleme. Mpo na nini? Mpo na nini? Yesu ayebisaki ye nani ye azalaki, oyo nkombo na ye ezalaki, mpe oyo nkombo ya

tata na ye ezalaki. Mpe ayebaki ete wana ezalaki Liloba, mpo Biblia elobaki: “Nkolo Nzambe na bino akotelemisa Mosakoli moko lokola ngai,” mpe wana esengelaki kozala Mosakoli, mpe mosakoli moko te alakamaki nsima na Malaki kino na Masiya, mibu nkama minei kozanga mosakoli. Mpe tálá, Moto moko atelemaki wana, mpo na kotatola, to kondimisa Liloba na Ye, epai ya moto oyo abongisamáká liboso mpo na Bomoi, Alobaki: “Nkombo na yo Simona, kobandá lelo. . . Ozali mwana ya Yona, kobandá lelo okobengama ‘Petelo.’” Bókanisa naino! Andimisaki yango epai ya nani? Mpo na nini Andimisaki Liloba yango te epai ya. . . Mpo na nini Andimisaki Liloba yango te epai ya Kaifa? Azalaki Nzambe, Ayebaki ete Kaifa akondima Yango ata moke te. Kasi moto oyo abongisamáká mpo na Bomoi, ayebaki Yango mbala moko.

<sup>165</sup> Mokolo moko, katikati na bango, esika oyo moto mosusu akendeki kozua moninga na ye kuna na ngomba, nsima na mwa mikolo, pene na kilometre ntuku mibale na ndambo longwa na esika oyo bazalaki koteya, ayaki na ye na mokolo oyo elandaki. Azalaki wana katikati na bango, mpe apusanaki epai oyo Yesu azalaki. Yesu atalaki zinga-zinga, Azalaki Nzambe, bomoni, Azalaki na lisó soli. Oyo wana etalisaki yango, bomoni, etalisaki ete Liloba ezali solo, Andimisaki Liloba.

Sikawa, bamosusu na bango balobaki: “Boyebi, Moto yango azali Liloba.”

<sup>166</sup> “Bolémá,” banganzambe wana balobaki, “moto yango azali bongo te. Te. Wana ezali Liloba te.”

<sup>167</sup> Alobaki: “Boyebi eloko nini Makomi elobaki: ‘Nkolo Nzambe na biso akotelemisa Mosakoli moko lokola Mose.’ Ezali Ye. Bóyoka Ye.”

<sup>168</sup> Ee, Alobaki: “Ozali, bótala mwana ya Yisraele, oyo na kati na ye bokosi ezali te.”

Moto yango alobaki: “Rábi, Oyebaki ngai ntango nini?”

<sup>169</sup> Alobaki: “Liboso Filipino ábenga yo, ntango ozalaki na nsé ya nzete, Namonaki yo.” Ayebaki nani oyo akondima Yango.

<sup>170</sup> Alobaki: “Lábi, Ozali Mwana na Nzambe. Ozali Liloba.” Yesu andimisaki ete Azalaki Liloba, na nzela ya Liloba.

<sup>171</sup> Bótala mwasi wana, na libulu ya mai. Azaláká kozela Masiya. Azalaki na likambo moko te ya kosala ná bitónge minene mpe bibongiseli na bango ná nyonso wana, oyo bazalaki na yango na ntango wana. Azalaki kozela Liloba. Boye mokolo moko, Moto moko afandaki kuna, Moto lokola bato nyonso, afandaki kuna, pembeni na nzela, alobaki—alobaki: “Mwasi, yéla Ngai mai.”

<sup>172</sup> Alobaki: “Sikawa, zela naino, ntango mosusu Azali kosepela na ngai,” ntango mosusu akanisaki bongo na motema na ye, mpo ayebanaki lokola mwasi ya bomoi mabe. Alobaki: “Ee, Ozali

na. . . Mpo na nini Otuni ngai motuna ya ndenge wana? Awa tozali na bokabwani. Ozali—Ozali—Ozali mpenza. . . Yo ozali Moyuda, biso tozali Basamalia, ezali te. . . ezali momesano te, ezali malamumu te ete Ótuna ngai bongo.” Bomoni?

173 Alobaki: “Mwasi, soki óyebaka Moto oyo azali kosolola na yo, yo nde olingaki kosenga Ngai mai.”

174 Alobaki: “Násenga Yo mai? Namoni ata katíni moko te to nsinga moko te. Okopesa ngai mai na libulu oyo ndenge nini?”

Alobaki: “Nazalaki kolobela libulu oyo te.” Bomoni?

175 Nsima na mwa ntango, alobaki: “Oyo azali Mobali moko ya ndenge.” Boye, abandaki kotómbola etókelu ya mai, kobenda yango.

176 Alobaki: “Ee, mai oyo Ngai nakopésa ekokóma maziba ya mai, ba-geyser, kopunza-punza kino na Bomoi ya Seko, mpe kati na elimo.”

177 “Ee,” alobaki, “sikawa, zela naino, na—nasosoli ete Ozali Moyuda.” Alobaki: “Sikawa, bino Bayuda,” alobaki, “Olingi koyebisa ngai ete Oleki tata na biso, Yakobo, oyo atímolaki libulu oyo?” Azalaki Nzambe ya Yakobo. Bomoni? Alobaki: “Olingi koloba ete—ete Oleki Yakobo, oyo atimolaki libulu oyo?” Moto lokola bato nyonso, bomoni, na miso boye. Yango nde nyonso oyo bomonaki, moto lokola bato nyonso. Alobaki: “Olobi ete Oleki tata na biso, Yakobo, oyo atimolaki libulu yango, mpe ye moko amelaki mai yango, ná bibwele na ye? Ee, topambolamaka mpenza, ntango tomelaka mai ya libulu oyo, oyo mosakoli yango atimolaki.”

Alobaki: “Ah-ha,” Alobaki.

“Mpe biso tosambelaka na ngomba oyo. Bino bolobaka ‘na Yelusaleme.’”

178 Alobaki: “Lobiko euti na Bayuda, mwasi, toyebi eloko nini tolobelaka.” Alobaki: “Bino bosambelaka oyo boyebi te.” Moyuda asengeli koyeba Liloba, bomoni, oyo esengelaki kosalema. Kasi, bomoni, Azalaki kolanda malamumu. Mpo na nini? Alingi ko. . . Akosala nini? Kondimisa Liloba na Ye. Bomoni? Ee, alobaki. . . Alobaki: “Kútu, kende kozua mobali na yo mpe bóya awa.”

Mpe alobaki: “Nazali na mobali te.”

179 “Ee,” Alobaki, “olobi solo, bomoni, mpo ozalaki na bango mitano, mpe oyo ozali na ye sikawa azali mobali na yo te.” Bomoni? Bótala! Likambo moko esalemaki, bomoni, eloko moko ezuaki Bomoi. Sikawa, soki eloko ézalaka te na kati kuna, mpo na kobanda, soki ázalaka na etaliseli moko te, na nzela ya kobongisama liboso, elingaki kosimba ata moke te.

180 Banganganzambe bazalaki kuna, balobaki: “Moto oyo azali Belezebula.” Bomoni, etaliseli moko te.

<sup>181</sup> *Bomoi na Seko*, “ozaláká ntango nyonso.” Bomoni, ozalaka na Bomoi na Seko, ezalaka bobele na lolenge moko, yango ezali Nzambe. Ozalaki eteni ya ezalela na Ye, Akanisaki yo mpe Ayebaki yo liboso na kozalisama ya mokili, na kati ya likanisi na Ye. Bomoni?

<sup>182</sup> Atálaki zinga-zinga, bótala lolenge ya masumu oyo—oyo azalaki kati na yango. Kasi, bomoni, Akokaki te—Akokaki te kozua nganganzambe wana, mpo nganganzambe yango azalaki moto ya mayele mingi, moto ya likindo na Liloba, kasi azalaki na etaliseli moko te na Likoló, bomoni, azalaki na kati ya likanisi ya Nzambe te. Kasi mwasi yango azalaki kuna. Alobaki: “Misie, namoni ete Ozali mosakoli.” Yango nde nyonso oyo Alingaki ete ye mwasi yango ámona. Bomoni? Alobaki: “Tondimaka ete Ozali, nandimi ete Ozali mosakoli. Sikawa, toyebi. Tososolaka lisusu likambo ya basakoli te, mpo ntango esili koleka mpenza, toyebi ete Masiya moko akoya. Mpe ntango Masiya yango akoya, Akozala Liloba. Bomoni, Akoyeba basekele ya mitema, Akosala likambo yango moko, oyo—oyo Osalaki kuna.” Alobaki: “Osengeli kozala moko na basakoli na Ye, mpo na koya liboso na Ye, to eloko moko bongo.”

Alobaki: “Ngai nazali Ye.”

<sup>183</sup> Asáláki nini? Azalaki kondimisa Liloba na Ye, kondimisa esika na Ye, kondimisa nini Ye azalaki. Nzambe azalaki kati na Klisto, kozongisáká mokili na boyokani ná Ye moko. Mpe Nzambe azali Liloba. Malamu. Anyelisaki mipepe ná bambónge, mpo na kondimisa lisakoli ya Yisaya ete: “Bakobenga Ye ‘Nzambe na nguya, Tata na seko.’” Bomoni? Ayikanisaki mpe mápa ná mbisi, Mwana oyo abotamaki na mongondo. Ezalaki nini? Kondimisa Liloba. Makomi nyonso esengeli kokokisama. Andimisaki Liloba, na kolobáká ete Azalaki Jehovah atalisami polele. Azalaki ebandeli ya bokeli ya Nzambe. Nzambe kati bokeli, Nzambe ná eteni moke ya bokeli, awa, oyo Nzambe, Ye moko, azalaki kofanda kati na yango, Azalaki ebandeli ya bokeli yango ya Nzambe, “Uta na Ye, aboti bana ebele.” Bótala, Ayikanisaki mpe mbisi. Azali Liloba mpe ndanga ya Liloba.

<sup>184</sup> Sikawa bóyoka na bokebi, wana tozali kokende na nsuka. Mokolo yango, oyo nauti kotánga eleki mwa miníti, sikawa, ntango Akómaki na ndako ya Yailo. Akotaki, ntango Akómaki kuna. Sikawa, bómikanisela, Yailo azalaki nga—nganganzambe, mondimi ya ndelo. Alingaki kondimela Yesu, kasi azalaki koyina kotika lingomba na ye, mpo bazalaki koloba: “Moto nyonso oyo akondimela Ye, tokobengana ye na lingomba.” Sikawa, bóyoka na bokebi sikawa, mpo na kosilisa, bóyoka ngai na bokebi mingi. Bolanda yango malamumu. Nandimaka ete Yesu ayebaki yango, ntango Akatisaki mbu, mpo Ayebaki makambo nyonso. Mpe ntango Akatisaki mbu, Atelemaki wana, mpe elenge nganganzambe yango ayaki wana. Mwana na ye ya mwasi azalaki kobela makasi, minganga basundolaki ye, balobaki:



“Akómi mpenza pene na liwa.” Sikawa, ntango ya kokóta na mosala ekokaki.

<sup>185</sup> Ntango mosusu ezali mpo na yo na ntongo oyo, ntango ekoki mpo ókóta na mosala. Bomoni? Ntango mosusu ozali kobela makasi. Ntango mosusu ondimisami ete ozali na libunga. Ekoki kozala. Nzambe atindi likambo na makasi, ntango ya kokóta na mosala ekoki.

<sup>186</sup> Sikawa, na bokebi nyonso. Mpe ayaki, atalaki te likambo nini bato mosusu balobaki, liboso na bato nyonso, ayaki kokweya na makolo ya Yesu. Ezalaki etápe monene, mpo na—mpo na moto ya mayele mingi, koya epai ya Moto oyo toyebi te na kelasi nini atángá. Ndenge nini moto áyá, ye oyo asengelaki koyeba likindo mobimba malamumu, áyá epai ya Moto oyo asengelaki kozala “moto oyo aboyami, moto ya zamba, moto ya libóma, oyo motó na ye ebébá, oyo motó na ye ezalaki ata kosala malamumu te.” Bolimbisa elobeli oyo, kasi “Azali kaka moto ya liboma moko boye ya lelo,” bato nyonso bazalaki kokanisa bongo mpo na Ye. Lelo, na elobeli ya balabala, tokoki koloba: “Ecrou!” Ndenge nateyaki mokolo wana likoló na ecrou ná boulon, boyebi. Bomoni, yango nde oyo Ye azalaki mpo na bato, moto mpamba ya mikolo nyonso. . . Bazalaki koloba: “Ee, Osili kobéla libóma! Ozali na libóma! Ozali eléma!” Sikawa, tálá moto oyo atángá mingi mpenza, ayei epai na Moto oyo motó na Ye ezalaki kosala malamumu te. Atindamaki na makasi kosala yango.

<sup>187</sup> Bótala ye sikawa. Ekosala mpasi mwa moke, kasi ekozala malamumu mpo na bino. Bomoni, ntango mosusu likambo ya mpasi elamusaka bato.

<sup>188</sup> Bótala, Ayaki mpe abelemaki pene na ebembe ya mwana mwasi yango, oyo asilaki kokufa ntango mosusu bangonga mingi liboso, mpe balálisaki ye wana, bapakolaki ye nkisi ya kokaukisa bibembe, mpe batiaki ye na kiti ya divan. Bazalaki kosala bongo na eleko wana, komema bango mpe kotia bango na kati ya libulu, likoló na libáyá. Alálaki likoló na kiti ya divan, ba-feléle zingazinga na ye.

<sup>189</sup> Mpe, oh, elenge mokengeli malamumu wana, elenge Yailo, nabanzi ete azalaki elenge mokengeli moko malamumu, bato nyonso bazalaki kolinga ye. Mpo, bomoni, nakoki kondimisa yango, mpo, na motema na ye, andimelaki mpenza Yesu. Kasi azalaki kokoka mpenza kozua mokano te, mpo alingaki kozanga misolo oyo ezalaki koya mokolo ya mpóso nyonso to na ntongo nyonso ya mokolo ya liboso na mpóso. Bomoni? Akokaki mpenza kozua mo—mokano te. Mpe likambo mosusu, bato, lokumu monene oyo azalaki na yango katikati na bato, balingaki koloba: “Oyebi, Yailo akómi bilandálanda. Bomoni, akendeki kuna, epai ya mosakoli ya lokuta wana. Oyo wana mpenza nde eloko oyo asálaki, alandaki makambo nyonso oyo babéngaka bilembo mpe

bongo na bongo, Mosakoli wana ya Galilai, boyebi, Yesu ya Nasalete.”

<sup>190</sup> Tondimaka yango te sikawa, ezali koyokana lokola kotúka, kasi ezalaki bongo na eleko wana. Bomoni? “Mpe, mokolo moko, ndenge ezalaka sikawa, ekozala mpe bongo na ntango wana.” Bomoni, ndenge moko!

<sup>191</sup> Sikawa bótala, akendeki kuna. Mpe ezalaki mpasi mpo ákoka kosala yango, kasi ntango ekomaki, oyo atindamaki na makasi ete ásala yango. Asengelaki kosala yango. Mpe akendeki kokutana na Yesu, liboso mpenza ya bato nyonso, mpe akweyaki na makolo na Ye, mpe alobaki: “Molakisi! Molakisi!” Boyebi eloko nini yango ezali? Bokonzi, bonkóló. Malamu.

<sup>192</sup> Bomoni, bato mingi balingaka ete Yesu ázala Mobikisi na bango, kasi Nkolo na bango te. Bomoni, *Nkolo* elakisi “mokonzi.” Iyo. Okoloba: “Yesu, bikisa ngai mpe tika ete nátelema awa, mpe ezali malamumu mpenza, mpe nakosala makambo na ngai moko. Sikawa, kokóta na makambo na ngai te. Kasi Okoki kozala Mobikisi na ngai, kasi Nkolo na ngai te.” Ye alingi kozala Nkolo, bomoni, bongo nde Akomi Mobiki na yo.

<sup>193</sup> Kasi sikawa, alobaki: “Molakisi, Mobikisi!” Bomoni? “Ngai. . .mwana na ngai ya moke ya mwasi, mwana na ngai kaka moko, azali na mibu zomi na mibale, minganga batiki ye.” Na ntembe te, nganganzambe yango akokaki koloba boye: “Oyebi, bango nyonso balobaka ete Ozali fanatiki, kasi, oyebi, Molakisi, ngai—ngai—ngai nandimaka Yo. Nandimaka. Nayebi ete Ozali na lisosoli. Mpe likambo kaka moko oyo nalingi ete Óloba, ezali, yaka kotiela ye maboko. Na nsima, yebisa ngai eloko nini nasengeli kosala, nakosala yango.” Oh, sikawa obandi kokóma esika moko!

Alobaki: “Nakokende. Nakokende.” Mpe Akendeki.

<sup>194</sup> Wana asilaki kokende nsima na ngonga mingi, mobali moko ayaki mbangu, ndenge ezaláká na eleko wana, ná putulú likoló na motó na ye, alobaki: “Kotungisa Moto yango te, mwana—mwasi na yo asili kokufa. Asili kokufa, basili kobongisa ye mpe balalisi ye wana.”

<sup>195</sup> Oh, mwa motema na ye! Yesu abalolaki miso, Atalaki ye, alobaki: “Oh! Oh! Oh!”

<sup>196</sup> Alobaki: “Nayebisaki yo te?” Sikawa, oyo Asalaki kuna, Asilaki kolaka Yailo. Sikawa Asengeli kondimisa yango. Amen. “Nayebisaki yo. Ndima kaka mpe okomona nkembo na Nzambe.” Sikawa, Ayebaki eloko nini Azalaki kosala. Alobaki ete Azalaki kosala eloko moko te, soki Tata alakisaki Ye yango liboso te. Santu Yoane—Santu Yoane 5:19: “Nasalaka bobele makambo oyo Tata alakisaka Ngai,” boye, Alakisaki Ye likambo nini ekosalema.

<sup>197</sup> Boye, ntango Akotaki na ndako yango, Atelemaki wana, mpembeni na mwa nzoto oyo ekangámá na malili elali wana, abélaki esili mwa bampóso. Mpe mwa nzóto na ye ekómaki pembe, bilei ekotaki na nzoto na ye te, mpo na fievre ná nyonso wana, mpe asilaki—asilaki kokufa. Basilaki kopakola ye nkisi ná biloko mosusu ya kokaukisa bibembe. Mpe alálaki wana, boyebi, na kiti ya divan mpe nyonso wana, komilengeláká mpo na kozinga ye na bilamba mpe kokende kokunda ye, mpe batiaki . . . basilaki kosala mwa molúlú na bango ya kotia bafeléle zingazinga na ye. Yesu akómaki wana. Mpe bato nyonso: “Oh, Yailo, mwana na yo ya mwasi akufi! Oh, tata Yailo, oh! tozoyokela yo mawa mingi,” mpe bongo na bongo.

<sup>198</sup> Alobaki: “Oh, bófanda kimia; bozali kosala makelele mingi.” Alobaki: “Mpo na nini bozali kosala mobulu makasi boye zinga-zinga awa?” Bomoni? “Mobulu oyo, bino . . . bozali—bozali kogánga mpe kosala makeléle. Mwana mwasi yango akufi te. Aláli. Shhh.”

<sup>199</sup> Na bongo basalaki nini? Ntango bayokaki Ye koloba ete akufi te, bango . . . Balobaki: “Basekaki Ye na lityo.” Na elobeli mosusu, bawolóláki Ye. “Woo! Ee, Yo! Ee, Yo mosakoli ya lokuta! Ee, Yo mopéngwisi na bato! Mwana-mwasi yango asili kokufa. Monganga alobaki ete akufi. Bisu tosili kobongisa bibembe na ye, tolalisi ye wana. Alali wana, asili kokufa.” Balobaki: “Ha, ha, ha! Sikawa, Yailo, ozalaki koloba na ntina na Ye, sikawa olobi nini mpo na yango?”

<sup>200</sup> Boyebi eloko nini Asálaki? Alobaki: “Bino nyonso bóbima libanda.” Katikati na kozanga kondima ya bongo, ekoki kosimba te. Sikawa, Autaki koloba nini? Alobaki: “Yailo, soki ondimi kaka, okomona nkembo na Nzambe.” Sikawa, wana ezali Liloba na Ye. Asengeli kondimisa yango. Malamu.

<sup>201</sup> Na nsima, ntango Akotaki na ndako, esika oyo bango nyonso bazalaki kolela, Alobaki: “Alali.” Yango ekesanaki na science. Ekesanaki na bomoto mpenza. Asilaki kokufa, basilaki kobongisa bibembe.

<sup>202</sup> Kaka ntango moto akufi, bazalaki kobongisa bibembe na bango mbala moko, kaka ntango bomoi ebimaki kati na ye, bazalaki kosopela ye nkisi yango ná biloko mosusu, kozinga ye na bilamba mpe komema ye mosika. Bomoni, kokunda ye, bazalaki kokunda bibembe mbala moko, ee, ntango mosusu bazalaki ata koyebisa bato te. Boyebi, Anania ná Safira; basilaki kokunda Anania, ntango Safira . . . Anania, ntango Safira akómaki, bomoni; basilaki komema ye mpe kokunda ye, bomoni. Bango, kaka ntango moto akufi, bazalaki kosopela bango nkisi yango, kobimisa bango mpe komema bango mosika. Bomoni?

<sup>203</sup> Boye, basilaki kolengela ye mpo na komema ye na nkunda, kasi bazalaki kozela ete papa áyá komona ye liboso bákende na

ye. Mpe ntango Akóti, mpe mwana yango kati na lolenge wana, Alobaki: “Azali kolala kaka mwa mpongi.”

Ee, balobaki: “Sikawa, Moto yango azali mpenza na libóma!”

<sup>204</sup> Na bongo, Asalaki nini? Asilaki koloba ete mwana yango alálaki, Asengelaki kondimisa Liloba na Ye. Akokaki kosala yango te liboso na bato wana, na bongo, Alobaki: “Bimísa bango nyonso libanda.” Mpe nakoki komona Ye kotala Yailo mpe koloba: “Ozali kaka kondima?”

“Iyo, Nkolo.”

<sup>205</sup> “Yo ná mwasi na yo bóya awa. Petelo, Yakobo ná Yoane, bóya elongo na Ngai.” Bapusanaki wana mpe Alobaki maloba oyo: *talita kumi*, elingi koloba: “Mwana mwasi, télema.” Mpe Andimisaki Liloba na Ye, mwana mwasi yango azalaki kaka kolala. Ezali bongo? Andimisaki awa, ete Liloba na Ye ezali solo. Ata kozanga kondima na bango, Ye andimisaki kaka Liloba na Ye, ete ezalaki solo, na kolamusáká ye, mpo Alobaki ete alalaki mpongi. Alalaki mpongi.

<sup>206</sup> Mokolo moko, Akosala ndenge moko, mpo na mondimi ya solo nyonso, mpo Liloba na Ye nde elakáki bongo. “Baoyo bazali kati na Klisto, Nzambe akosekwisa bango elongo na Ye.” Bomoni, “Baoyo bazali kati na Klisto.”

<sup>207</sup> Mwa mwana mwasi ya Moyuda oyo asálaki nini? Nabandaki koleka mpembeni na Likomi yango, awa, kasi na—nako—nakolobela yango. Nayebi ete ntango ekoki koleka mwa moke, mpe tokobanda molongo ya mabondeli nsima na miníti moke. Ntango mosusu, nakomona bino te mpóso mobimba, kasi tózela mwa moke. “Moto akobika bobele na lípa te.” Bomoni? Bótala, bótika ete názindisa yango malamú sikawa, mpo na kotalisa bino. Mpo na nini Yesu alamusaki mwa mwana mwasi Moebele oyo? Mpo ye ayebaki ete akufi te? Kobongisama liboso. Kaka ndenge Asalaki mpo na Lazálo. Bomoni? Ntango mosusu ezalaki na bana basi mingi oyo bakufaki mokolo yango, Alobaki na bango ata liloba moko te. Ayebaki ete mwana oyo azalaki na Bomoí ya Seko. Bomoni, Alamusaki bamosusu te.

<sup>208</sup> Bótala, ntango Abimaki na Yeliko, bato balobaki: “Bótala mobali oyo!” Na ntembe te balobaki: “Olamusaka bakufi? Olobi na ngai ete Okoki kosekwisa bakufi, tozali na malíta moko etondi na bango kuna, yaka kolamusa bango.” Bomoni, Akipaki bango ata moke te. Bomoni, Asalaki yango ata moke te, mpo Ayebaki ete Azalaki Liloba.

<sup>209</sup> Bótala, alálaki kaka mpongi. Ayebaki ete tata akoya. Sikawa, mwana mwasi moke oyo, bomoni, Ayebaki ete mwa mwana mwasi ya Moyuda wana alalaki kaka mpongi. Bomoni, mo—moyengebene akufaka te. Yesu ayaki kosikola bayengebene. mpe, *kosikola*, elingi koloba “kozongisama na esika ozaláká kalakala.” Bomoni? Akokaki kosikola bazangi kondima te,

ata batángá ndenge nini mpe bazuá ba-diplóme ya balakisi boni. Akokaki kosikola bango te, mpo bakokaki kosikolama te; basengelaki kokende na esukela na bango. Kasi, na boyebi na Ye makambo liboso, Ayebaki ete Lazálo akobima na nkunda. Ayebaki mpe ete mwana mwasi moke oyo azalaki na Bomoi na Seko. Boye, akufaki te, alálaki kaka mpongi. Mpe ntango mosala na biso na mokili ekosila, soki totikali na bomoi te kino na Boyei na Ye, tokoki kokufa te, tokolala kaka mpongi. Andimisaki yango awa. Akondimisa yango lisusu. “Ata nkusú ebebisi nzoto oyo, kasi nakolamuka mpo na kokóma na lolenge na Ye.”

<sup>210</sup> Andimisaka Maloba na Ye nyonso, Maloba na Ye nyonso. Bókanisa naino, Maloba na Ye nyonso! Bino mpe bozalaki Liloba na Ye. Ye azalaki Liloba, mpe bino bozalaki eteni ya Liloba na Ye. Mpe, yango nde ntina oyo botindami awa, mpo na kotátola esika na bino na bomoi. Na—na—nandimi te ete bososoli yango. Bomoni, Ye azali Liloba. Sikawa bosósoli yango?

<sup>211</sup> Azalaki na makolo, kati na Luther; na bibelo, kati na Wesley; na mapeka, na ba-Pantekotiste. Bomoni eloko nini nalingi koloba? Ye azali Motó. Bino bozali eteni oyo ezali kosangisa yango elongo, ngonga oyo tozali kobika kati na yango sikawa; ezali eteni ya makolo te, eteni ya bibelo te, eteni ya mapeka te, kasi eteni ya kígó. Ezali bongo? Ezali kosangana ná motó. Ezali eteni ya nzoto yango. Baoyo baláli kati na Yesu, Nzambe akosekwise bango elongo na Ye. Kelelo ya Nzambe ekoyula, mpe bakufi kati na Klisto bakosekwa liboso. Ezali nde bongo? Bomoni, bokómi eteni ya Liloba yango, bokómi eteni na Ye. Mpe bozui Nkombo na Ye mpo na koyeba yango malamumu, bomoni, botiami kuna na kati, bobátisami na kati na Nkombo na Ye, na kati na Nzoto na Ye: “Na Molimo moko, biso nyonso tobatisami kati na Nzoto moko,” awa na kati, ezali mpenza esika yango moko. Abóngolaka lolenge na Ye te. Soki . . . Bato boni bandimaka ete lingomba ya ebandeli ezali kati na Ye? Tótala, bato boni bandimaka yango? Bango babatisamaki ndenge nini? Malamumu. Bomoni, Azali Nzambe oyo abongwanaka te. Tondimisaki yango. Tokoki kotikalala awa kino na minwí lelo, kondimisáká yango, mpe kaka kokóba sé kokoba ná kokóba. Bomoni, abongwanaka te! Bomoni? Bozali kati na Ye mpe bozali eteni na Ye, mpo bozalaki eteni ya makanisi na Ye. Liboso na kozalisama ya mokili, Abengaki bino!

<sup>212</sup> Biblia elobi ete nyama, likoló na mokili. . . Oyo wana ezali motemeli-na-Klisto ya denomination oyo ayei na mokili, mpo na kosala nyama ya Roma, yango nde ezalaki denomination ya liboso. Mpe Lisanga ya Mangomba ya Mokili mobimba ezali kosala elilingi mpo na nyama, ezali mpenza makambo oyo touti kotia na buku, kuna, mokolo wana. Bótala, ezali kosala yango, bomoni, motemeli-na-Klisto. Mpe Biblia elobi: “Baoyo nyonso ba-nkombo na bango ekomamaki te na Buku ya Bomoi ya Mwana mpate,” (ntango nini, na kolamuka?) “abomamaki liboso

na kozalisama ya mokili,” (nkombo na yo ekomamaki kuna) “motemeli-na-Klisto oyo akopengwisa bino.” Matai 24:24 elobi ete—ete “Motemeli-na-Klisto akozala mpenza pene na eloko ya solosolo, na mikolo ya nsuka, akopengwisa baponami mpenza, to baoyo babongisámá liboso. . .” Ezali ndenge moko, koponama ná kobongisama liboso ezali ndenge moko, Nzambe aponaki yo to abongisaki yo liboso na kozalisama ya mokili. “Akopengwisa bato nyonso oyo ba-nkombo na bango ebongisamaki te liboso na Buku ya Bomoi.”

<sup>213</sup> Daniele alobelaki yango, ndenge bato na bwanya bakozala na ntango yango, ná bilémá, mpe bongo na bongo. Malamu, mingi mpenza, kasi nazali kokóba kokende mo—mosika mingi koleka, sáá ezali kotambola mbangu mingi koleka mpo na ngai. Bótala, sikawa bótala malamumu, Amonaki ete nsima. . . Sikawa bótala eloko oyo esalemaki awa. “Baoyo nyonso Ayebaki liboso, Abengaki bango. Baoyo nyonso Abengaki, Alongisaki bango. Baoyo nyonso Alongisaki, Akembisaki bango.” Mobembo na bino esili, bozali kokokisa eteni na bino. Ngolu ezali eloko oyo Nzambe asalaki mpo na yo. Misala ezali eloko oyo yo ozali kosala mpo botondi.

<sup>214</sup> Andimisaki ndenge moko, ete Ayebaki makambo nyonso, Mwana oyo abotamaki na mongondo. Ayebaki esika mbisi ezalaki, na kati ya mai, esika oyo Petelo ná bamosusu basilaki kobwaka monyama mbala na mbala mpe bazuaki eloko te. Yango endimisaki Liloba na Ye. Ezali bongo? Ayebaki makambo nyonso.

<sup>215</sup> Mpe ntango Alingaki kofuta bampáko na Ye, etalisaki ete biloko nyonso ezalaki ya Ye. Ayebaki esika oyo mbisi yango ezalaki, oyo ezalaki na mbongo oyo esengelaki, na monoko na yango, mpo na kofuta. . . Moto moko akweisáká yango kuna, mpe mbisi yango elokotaki yango. Mpe Ye alobaki: “Petelo, kende kobwaka monyama kuna, omoni, zua mbisi yango mpe bimisa mbongo yango na monoko na ye. Mpe kende kosepelisa bango, fúta bampáko yango.” Oh, iyo!

<sup>216</sup> Bagambala ezalaka na mabúlú mpe bandeke ya likoló ezalaka na bazála, kasi Ye azalaki na Liloba, Azalaki Liloba, mpe Andimisaki yango bongo. Andimisaka Liloba na Ye ntango nyonso. Akosala yango ndenge moko sikawa, na bikeke nyonso, Andimisaka yango ndenge moko.

<sup>217</sup> Nsima na mokolo ya misato, nsima na liwa mpe kokundama na Ye, na mokolo ya misato, Asékwaki, mpo na kondimisa Liloba na Ye, mpo mosakoli alobáká: “Nakopesa nzela te ete Mosanto na Ngai ápolá, Nakotika mpe molimo na Ye na ewelo te,” mokolo ya misato, liboso nzoto ébanda kopola, nsima na ngonga ntuku nsambo na mibale. Bomoni, mikolo misato ekokaki mobimba te, mpo kopola ebandaka nsima na ngonga ntuku nsambo na mibale. Bomoni, boye, Akokisaki ntango yango mobimba te,

mpo mosakoli alobáká, bomoni, mosakoli alobáká: “Nakotika te Mobulami na Ngai komona kopola.” Andimisaki Liloba na Ye.

<sup>218</sup> Abikisaki babeli, batengumi, mpo na kondimisa Liloba na Ye, oyo Yisaya ná basakoli mosusu balobáká.

<sup>219</sup> Atindaki Molimo Mosanto Mokolo ya Pantekote, mpo na kondimisa Liloba na Ye. Soki bolingi kozua Makomi mosusu sikawa, na Yoele 2:28, Alobaki: “Ekosalema na mikolo ya nsuka, Nzambe alobi, ete Nakosopa Molimo na Ngai likoló na bato nyonso, Nakosopa mpe Molimo na Ngai likoló na basali na Ngai ya mibali ná ya basi. Bilenge na bino bakomona bimononeli, mibange na bino bakolóta bandoto,” mpe bongo na bongo. Andimisaki yango na kosopáká! Lisusu, Asiláká koloba liboso na ntango yango, na Luka 24:49, soki bolingi kokoma yango, Alobáká: “Tálá, Nakotinda elaká ya Tata na Ngai likoló na bino. Kasi bino bótíkala na engumba ya Yelusaleme kino bokolátisama na nguya kouta na Likolo.” Yango mpenza, Asalaki yango, Atindaki Molimo mpo na kokóba kondimisa Liloba na Ye. Kasi bótala eloko oyo Alobaki. Asalaki yango? Malamu.

<sup>220</sup> Na Málako 16, Alobaki: “Bókende na mokili mobimba, bóteya Nsango-Malamu na bikelamu nyonso.” Kino wapi? Na mokili mobimba. Na nani? Na bikelamu nyonso. “Ye oyo akondima mpe akobatisama akobikisama. Ye oyo akondima te akokweisama, mpe bilembo oyo ekolanda baoyo bakondima.” Alobaki na Malako 4, Alobaki na Yoane 14:12, Alobaki mpe ete: “Ye oyo akondimela Ngai,” kondima na maloba te, kasi, “Ye oyo akondimela Ngai, misala oyo Nazali kosala, ye mpe akosala yango.” Esengaki na Molimo yango moko oyo ezalaki kati na Ye mpo na kosala misala moko wana. Mpo na nini? Molimo esengelaki koya kotalisa Liloba oyo elakamaki mpo na ntango ekoya na nsima. Bomoni, Abóngisaki likambo, mpo Ayebaki ete makambo oyo ekosalema.

<sup>221</sup> Sikawa, nsima na mibu nkóto na nkama libwa, wana bileko ya lingomba esili koleka, ná makambo nyonso oyo Asakólaki mpo na Luther, Wesley, touti koyekola yango mpe tomonaki yango koyemama, mpe sánzá ezalaki kokóma moke mpe eyemamaki, Nkolo nde ayemelaki biso yango awa na etánda, mpe Atalisaki yango, Akitaki Ye moko mpe Atatolaki ete ezali solo. Nsima na mibu nkóto na nkama libwa, tokómi na nsuka ya Eleko ya Lingomba ya Laodikia, Alakáki, na Luka 17:30, ete Mwana na moto yango moko (Alakaki yango) akomónisama na mikolo oyo, na mokili, ndenge esalemaki na Sodoma. Asalaki yango? Esengeli nde kokokisama? Ekoki kosalema te. . . Sikawa, bómikanisela, Ayaki na bankombo misato: Mwana na moto, mosakoli; Mwana na Nzambe, Molimo; Mwana na Dawidi, mpo na Millenium. Kasi awa na katikati, na bokutani oyo, sikawa kokokana na Maloba na Ye moko, na mikolo oyo Mwana na moto akomonisama, Akomimonisa lokola (nani? Mwana na Nzambe te) Mwana na moto. Akomimonisa na lolenge mosusu. Sikawa,

epesi eloko nini? Malaki 4, yango mpenza. Bomoni, Mwana na moto akomimonisa, na kati ya ba-denomination ya minene nyonso wana te, ndenge tomonaki yango na kati ya bileko, kasi Akomitalisa lisusu lokola Mwana na moto, mpo na kokokisa Malaki 4. “Mpe na mokolo yango, Nakotindela bino Eliya mosakoli, akozongisa mitema ya bana na Kondima ya batata bantóma, mosika na mimesano nyonso ya bo-denomination, bakozonga lisusu na Liloba ya ebandeli,” mpo na koyema Nzete-Mwasi na libala ya ntango na nsuka oyo Alakaki. “Na ntango na mpokwa Póle ekozala,” na mokolo ya londende te nde póle ekozala; ekozala mokolo oyo ekoki te kobengama moi to butu. Bomoni, ezali kotonga Nzoto yango. Kasi kaka Motó oyo ezalaki awa na Ésti, ezali mpe awa na Wésti, “Póle ekozala na ntango na mpokwa.” Oh, la la, nayoki mposa ya koyemba loyembo moko!

Póle ekozala na ntango ya mpokwa,  
Solo, bokomona nzela moke ya nkembo;  
Lelo, Póle yango ezali na nzela na mai,  
Wana okundami na Nkombo na Ye ya motuya.  
Bilenge ná mikóló, bóyambola masumu na bino  
nyonso,  
Na nsima, Molimo Mosanto akokóta sólo;  
Ba-Póle ya mpokwa esili koya,  
Ezali koyebana mpe kokokisama ete Nzambe  
ná Klisto bazali Moko.

<sup>222</sup> Mpe Mwana na moto azali komimonisa na nguya yango moko oyo Azalaki na yango, (na kati ya bileko ya lingomba te, na nzela ya kolóngisama, kobulisama, makambo nyonso oyo awa) kasi Mwana na moto. Mwana na moto azali nani? Liloba! Mpe Liloba ezali na bomoi koleka, na nguya koleka mopanga ya mino mibale, mpe esósolaka makanisi oyo ezali na kati ya motema. Asengelaki kosala nini? Asengeli kondimisa Liloba yango. Alingaki kosala nini? Bótala yango malamumu, ntango tozali komona yango kosalema, bótala Yango na lolenge moko oyo Azalaki awa na ebandeli, Likonzi na Móto. Oh! la la! Azali kondimisa ete Azali Baebele 13:8, oyo elobi ete: “Yesu Klisto azali ndenge moko lobi, lelo mpe libela.” Ezalaki nini? Yesu Klisto, ndenge moko lobi, oyo wana ezali Klisto oyo azalaki na esobe elongo ná Mose. Bato boni bayebi ete Biblia elobaki bongo? Lobi! Oyo wana ezalaki Klisto, ntango Polo azalaki koloba awa lelo (bondimi yango?) na Kondimana na Sika. Na nsima, Mwana na moto, Klisto moko yango, na mikolo ya nsuka. Bomoni? Malamumu.

<sup>223</sup> Bótala lisusu Yoane 14:12, Alobaki: “Misala oyo Nazali kosala, bino mpe bokosala yango.” Ná Makomi mosusu nyonso, Azali kosala nini? Azali awa sikawa kondimisa (eleko ya Luther te, eleko ya Wesley te, eleko ya ba-Pantekotiste te, eleko ya ba-Batiste te, eleko ya ba-Presbiterien te, touti koyekola yango mpe kondimisa yango na nzela ya histoire, na kati ya Biblia; kasi



ezali nini?) eleko oyo Mwana na moto azali komonisama, mpo na kosala ete makambo oyo ékokisa Liloba, ntango makambo nyonso esengeli kokokisama. Bomoni? Tozali komona yango, mpe ezali solo!

<sup>224</sup> Mpe, bokanisa naino, kaka ndenge moko oyo Asalaki mbala ya liboso, etatolami kaka katikati na biso te, kasi etatolami na science. Basengeli kondima ete Ezali solo. George J. Lacy, mokonzi ya FBI, mpo na bilembo ya misapi ná mikanda, alobaki: “Pole ebetaki objectif. Ngai moko nabéngaki yango psychologie, kasi,” ye alobaki, “M. Branham, camera oyo ekokanga psychologie te. Ezali wana.”

<sup>225</sup> Ezali eloko nini? Litatoli, ete eleki mibu ebele, ntango Likonzi na Móto yango ezalaki kuna, na mwa nzete wana, lokola ekúbaki, elobáki, Alobaki: “Komeka komela makaya to masanga ata moke te, ozali na mosala ya kosala ntango okokóma mokóló.”

<sup>226</sup> Bato balobaki: “Mwana mobali wana abeli liboma.” Mama alingaki kobenga monganga, nakómaki motema likoló-likoló.

<sup>227</sup> Kasi ezalaki nini? Akitaki mpenza awa, na libóngo ya ebale wana, kuna, na Ebale Ohio, mpe Alobaki: “Ndenge Yoane Mobatizi atindamaki mpo bato bámilengela mpo Liloba étalisama, Nsango na yo mpe ekosala bongo.”

<sup>228</sup> Molakisi Davis ná bamosusu balobaki nazali “libanda” ya “makanisi,” na ngai, balingaki kobengana ngai na lingomba, mpo nayókánáká ná ye te na likambo ya basi batei ná makambo nyonso oyo ezalaka libanda na Makomi. Alobaki: “Mpe olobi ete okoteya mpe okobandisa kolamuka na mokili mobimba?”

Nalobaki: “Ngai te, kasi Ye nde alobaki bongo.”

Alobaki: “Billy, olótáki ndoto ya mabe.”

Nalobaki: “Nakozongisa kálati na ngai sika-sikawa, nazali lisusu moko kati na bino te.”

<sup>229</sup> Ye alobaki Yango, ngai nandimi Yango, mpe Andimisi Yango. Yango nde eteni ya malamau, Asili kondimisa Yango, andimisaki Liloba na Ye na nzela ya Liloba, mpo Azali Liloba. Bomoni? Mpe Liloba esálaka nini? Eyébaka sekele ya mitema. Ezali solo? Malamau, endimisi yango na Baebele 13:8.

<sup>230</sup> Mpe Akozua Mwasi-Lingomba oyo abeleme na mikolo ya nsuka. “Akosala yango ndenge nini, Ndeko Branham?” Nayebi te. Kasi Alobaki ete Akosala yango. Akondimisa yango. Mobengami kobima moko longwa na bamosusu nyonso, ezali solo, ndeke ya matónó, oyo azui matónó na nzela ya Makila na Ye. Bomoni? Abengami kobima, bamosusu nyonso bazali kotelemela Ye. Atiolami mpe aboyami.

<sup>231</sup> Kasi, ndeke ya matónó, sikawa, Etali ngai te boni boni mokomi-buku alingaki kotelemela Yango, azali na libunga. Bómikanisela, bazalaki kosala nini na ndeke yango, na ndeke

ya matónó? Bazalaki kozua ndeke mibale, bazalaki koboma moninga moko, kosopa makila na yango likoló na ndeke mosusu, ezalaki mpo na kopetolama na bokono ya mbálá, mpe matónó ya makila, ezalaki kogánga: “Búle, búle, búle, epai na Yawe.” Mpe wana ezalaki Moninga na biso, Yesu Klisto, oyo abomamaki, mpe Makila na Ye, likoló na biso, ezali kogánga: “Búle, búle, búle, epai na Yawe.” Bandeke mosusu nyonso... Nazali na esengo nkombo na ngai ezali na Buku ya ye mwasi; awa na mokili te, kasi kuna na likoló; na loposo ya ntaba te, kasi na loposo ya Mwana mpate. Ya solo.

<sup>232</sup> Lisekwa ya bakufi ekozala. Akotatola yango. Ya solo. Akondimisa yango. Konetolama ya Lingomba ekozala. “Ekosalema ndenge nini?” Nayebi te, kasi Akondimisa yango. Liloba na Ye ezali solo. Millenium ekozala. Akondimisa yango, Ezali Liloba na Ye. Likoló ya sika ná mabelé ya sika ekozala. Akondimisa yango, mpo Liloba na Ye elobi bongo. Mpe kaka bayengebene nde bakozala kuna. Yango mpe, Akondimisa yango. Ya solo. Kaka baoyo basili kokóma eteni ya Liloba oyo, (bomoni, ekozala eteni na bango mpe esika na bango na Liloba ya eleko na bango) kaka bango nde bakozala kuna. Mpamba te, ezali mpenza bongo, Azali Liloba. Mpe mwasi azalaka nini? Elilingi ya mobali. Mpe Lingomba ezali—ezali eloko nini? Elilingi ya Liloba. Bomoni, ezali mpenza bongo. Bomoni? Boye, ekozala wana, bongo mpenza. Kaka bandimi ya solo ya Liloba na Ye nde bayebi Yango mpe bakoki kondima Yango. Mpe Nzambe akosunga bango mpo na kondimisa yango, ya solo, ete ezali solo.

<sup>233</sup> Bondimi Yango sikawa? Bondimi Yango? Soki ezali bongo, bósembola loboko na kondima mpe bósimba monkóto na Ye, mpo Akolekela nzela oyo. Akondimisa ete Azali ndenge moko lobi, lelo mpe libela, Baebele 13:8. “Tálá, Nazali elongo na bino ntango nyonso, kino na nsuka ya mokili,” Matai. Mpe Azali Nganganzambe Mokonzi, kokokana na Baebele, Mokanda na Baebele, mokapo ya 4 mpe molongo ya 15: “Azali Nganganzambe Mokonzi oyo akoki koyoka mpasi esika moko na biso kati na bolembu na biso.” Bondimi yango? Sémbola loboko mpe símba Nkolo. Azalaka ntango nyonso: “Tálá, Nazali elongo na bino ntango nyonso.” Bótala na kati ya bileko. “Bómeke makambo nyonso. Bókangama makasi na oyo ezali malamú.”

<sup>234</sup> Sikawa, soki ozali moto ya lingomba oyo endimaka te ete Azali ndenge moko lobi, lelo mpe libela, ndenge moko na makambo nyonso, longwa kati na yango. Ndimisá!

<sup>235</sup> Sikawa, tolobaka ete Asekwaki na bakufi. Ngai moto nalobaki yango te, Liloba oyo nde elobaki yango. Balobaki: “Asekwaki longwa na bakufi.” Ye alobi ete Azali ndenge moko lobi, mpe libela. Bondimi yango? Alakaki ete makambo oyo ekosalema na ntango ya nsuka, ete Mwana na moto akotalisama.

<sup>236</sup> Sikawa, bómikanisela, oyo azalaki kosolola na Abraham kuna, ezalaki Yesu te, oyo akokaki kosósola makanisi oyo ezalaki na molimo ya Sara, oyo azalaki nsima na Ye. Wana ezalaki Yesu te, Ye abótamaki naino te. Kasi ezalaki Moto na kati na nzoto ya moto, Abraham abengaki Ye “Elohim, Oyo-na-Nguya-nyonso monene.” Kotalisáká. . . Mpe Yesu alobaki: “Pelamoko esalemaki na mikolo ya Sodoma,” sikawa bótala malamú, “na mikolo ya Sodoma, ekozala mpe bongo na boyei ya Mwana na moto, ntango Mwana na moto akomonisama.” Lokola lingomba lisusu te, bomoni, ndenge wana lisusu te; Mwasi na libala abengami, bomoni. “Na mokolo wana Mwana na moto akomonisama.” Mpo na nini? Mpo na kosangisa Lingomba ná Motó, kosangisa, libala ya Mwasi na libala. Mbela ya Mobali na libala ekoya na nzela oyo, ntango Mwana na moto akokita mpe akoya na nzoto ya moto mpo na kosangisa bango mibale. Lingomba esengeli kozala Liloba, Ye azali Liloba, mpe bango mibale bakosangana, mpe, mpo na kosala yango, ekosengela na kotalisama ya komonisama ya Mwana na moto. Mokonzi ya lingomba moko te. Na—nayebi te, na. . . Bozali kosósola oyo nalingi koloba? Bomoni, ezali Mwana na moto, Yesu Klisto nde akokita na kati na nzoto ya moto katikati na biso, mpe akokomisa Liloba na Ye mpenza solo na lolenge ete ekosangisa Lingomba ná Ye ete bákóma moko, Mwasi na libala, na nsima, Mwasi akozonga na Ndako mpo na Elambo ya Libala. Amen. Asili kosangana, bomoni, tokokende na Elambo ya Libala, na libala te. “. . . bótondisa misuni na bino. . . bótonda, na misuni ya bato na nguya nyonso, mpo libala ya Mwana mpate esili koya.” Kasi, Konetolama, ezali kokende na Elambo ya Libala. Na ntango oyo, awa Liloba ezali kosangana ná moto, mpe bango mibale bakómi moko. Na bongo, esalaka nini na nsima? Etalisaka lisusu Mwana na moto, bato na likindo ya mangomba te. Mwana na moto! Liloba ná Lingomba bakómi moko. Nyonso oyo Mwana na moto asalaki, Azalaki Liloba, Lingomba mpe ezali kosala likambo yango moko.

<sup>237</sup> Ndenge nini Andimisaki Ye moko kati na bileko? Na nzela na basakoli, baoyo bakokaki koloba Liloba, koyeba makanisi na bango. Ndenge wana nde bazalaki koyeba Ye, ndenge wana. Alakaki ete na eleko ya lingomba, na nsuka, ekozala “ata butu to moi te,” kasi na ntango ya mpokwa, Mwana na moto akomonisama. Ekosalema lisusu. “Póle ekozala na ntango ya mpokwa.” Bomoni? Azali kosala eloko nini? Kondimisa Liloba na Ye.

<sup>238</sup> Sikawa bóbwaka miso na nsima, Ayaki nde lokola mongondo, Ayaki ndenge balobáká, na nzela ya mongondo, kutu nde? Ayaki mpenza—mpenza ndenge Alobáki? Bótala lelo, Andimisaki Liloba na Ye, ata motángo boni ya ba-athée, bazáangi-kondima, batioli, Ayaki ata bongo, Andimisaki Liloba na Ye. Tala biso oyo, toyei na eleko oyo ya mangomba mpe nyonso wana, bakei mosika, ndenge basalaki kobanda na Malaki kino

na boyei ya Klisto. Basakoli nyonso ná bamosusu basilaki koleka, mpe batiaki bato ya lokumu mpe bongo na bongo, kasi, ndenge moko mpenza, bótala lolenge ya moto oyo Atindaki. Lokola Eliya mpenza, azalaki koyina basi ya bomoi mabe, baoyo bazalaki kopakola-pakola, ba-poudre, ba-maquillage ná biloko ya ndenge na ndenge. Mpe bakonzi ya mangomba, abomaki bango na ngámbo ya mobali mpe ya mwasi. Ntango abimaki na esobe, atiaki mai na monoko te mpo na moko na bango, mpe alobaki: “Masiya azali koya. Ntango Akoya, nakoyeba Ye, ngai nde nakotalisa Ye. Amen. Bóbanda kokanisa te ete bozali bato ya *boye* na *boye*.” Kaka ndenge Eliya asalaki!

<sup>239</sup> “Mpe na ntango ya nsuka, ekosalema ete, liboso mokolo ya monene mpe ya nsomo ya Nkolo éya, Nakotindela bino, liboso mokolo yango ya monene mpe ya nsomo ya Nkolo éya, Nakotindela bino Eliya mosakoli, mpe akozongisa Kondima ya bana epai na batata.” Mpe bótala, Kondima ya batata epai na bana, Bayuda. Bomoni? Elaka na bango ya Makomi, Mabota mpe esika oyo bakweyáká. Bótala makambo mibale, oyo ebongi be mpenza, ya solo. Mpe tozali komona yango awa, Nzambe azali kondimisa Liloba na Ye.

<sup>240</sup> Tógumba mitó mwa moke. Nzambe molingami, Oyo asekwisaki Nkolo na biso Yesu longwa na bakufi, mpo na kondimisa Liloba na Yo, mpe Azali na bomoi lelo, azali kondimisa Liloba na Yo. “Tálá, Nazali elongo na bino ntango nyonso, kino na nsuka,” ezali kondimisa Liloba na Ye. “Yesu Klisto, ndenge moko lobi, lelo mpe bileko na bileko.” (Soki ezalaki “bileko na bileko” te, ntango mosusu bokokaki—bokokaki kobeta libaku na makambo mosusu.) Natelemaki te mpo na kolimbola yango, Nkolo. Kasi, *bileko na bileko*, bayebi, ezali bobele “nta—ntaka moko ya ntango.” Mpe sikawa, nsima na eleko oyo, bileko na bileko ekozala lisusu te, ekozala Seko na Seko. Boye, Azalaki Nzambe moko oyo azalaki kati na Mose mpe kati na basakoli. Na nsima, Ayaki nsima na ntaka ya ntango, mpe Amitali. . . saki Ye moko mpo na. . . Amitalisaki lokola Nzambe-mosakoli. Na nsima, tozuaki ntaka moko ya ntango, mpe Ayei lisusu. “Ndenge moko lobi, lelo mpe bileko na bileko.”

<sup>241</sup> Tozali kokanisa likambo oyo, Solomo, na millenium monene ya Bayuda, ntango oyo ekólo moko te ekokaki kosimba bango, mpe likabo monene wana ya Nzambe ezalaki na kati na mosakoli, na lolenge ete ayebisaki mwasi mokonzi ba-sekele na ye nyonso ya motema, eloko moko te ebómbamaki. Eleko ya nkembo wana, ezalaki kolakisa mpe kotalisa ete Eleko moko ya nkembo ekoya.

<sup>242</sup> Mpe sikawa, Tata, ezalaki Yo, Solomo te. Ezalaki Yo na kati na Yesu, mpo Alobaki: “Nzambe azalaki kati na Klisto, kozongisa mokili na boyokani ná Ye moko. Azalaki ebandeli ya bokeli.” Nzoto na Ye ezalaki bokeli oyo esikolami. Sikawa, na

kati ya bileko, lingomba ebungisaki bolingo na yango ya liboso, mpe sikawa, na ntango ya nsuka, Olakaki ete okobenga mwa bato moke, Etonga moke, na ntango ya nsuka.

<sup>243</sup> Tata, mitema na biso ezali kopumbwa, mpe motema na ngai ezali kobeta makasi, ntango nazali kokanisa likambo yango mpe koyeba ete Maloba na Yo ezali solo, ata moko na Yango ekoki kokweya te. Tika ete bato oyo lelo básosola yango, mpe tika basumuki báluka Yo na ngonga oyo, liboso bikuke ékangama mpe ntango ézala lisusu te. Tika ete Mwasi na libala, lokola abandi kobima na matámbe, libanda na *boye* na *boye*, tika ete ázonga na matámbe ndenge emononeli elakisaki yango eleki mwa ba-mpóso.

<sup>244</sup> Nabondeli Yo, Tata, ete ópambola sikawa, mpe óbikisa babeli. Bilamba etiami awa, miswále ya . . . euti na bisika ndenge na ndenge. Sikawa, na Makomi, Elobamaki: “Bazalaki kozua biteni ya bilamba ná bilamba, miswále, longwa na nzoto ya Polo, mpe bazalaki komemela yango babeli, mpe Nzambe azalaki kobikisa bango.” Sikawa, toyebi ete biso tozali Santu Polo te, kasi toyebi ete ezalaki Santu Polo te, ezalaki kondima ya bato epai na ye, lokola mosali na Yo. Nkolo, bato oyo bakokaki kotambola na motuka kilometre nkama na nkama te, soki bandimaki te. Fúta kondima na bango, Nkolo, wana ngai . . . ezali te kopakola miswále oyo mafuta (Polo apakolaki yango mafuta te, azuaki yango na nzoto na ye), wana nasimbi miswále oyo, Nkolo, ezali te ete nzoto na ngai (mpo ezali na ntina te), kasi ezali libula oyo esikolami na Yo, boye, nabondeli, e Nzambe, ete Óyamba kondima na bango. Tika ete moko na moko na bango ábikisama, mpo na ntina ya Bokonzi na Nzambe. Sikawa, Nkolo, Liteya molai oyo, nakánaki te ete ekoleka ba-miníti boye, kasi esili koleka kino ngonga mibale to koleka. Sikawa tika ete babeli bábika, Nkolo, tika ete bato bámona ete Ozali awa, ete nalobi Yango na ngai moko te. Ezali Yo, Nkolo. Mpe nabondeli na Nkombo na Yesu. Amen.

<sup>245</sup> Sikawa, miníti pene na zomi kaka. Nayebi te . . . (O—okabolaki yango ndambo awa, ezalaki nini?) Billy alobi ete akabolaki mwa ndambo. Nayebisaki ye ásala yango na ntongo oyo. Nautaki kokóta eleki miníti moke kuna na nsima, mpe nazuaki libaku ya kotuna ye te, mpo nazalaki kosolola ná Ndeko Ben ná bato mosusu kuna. Nazuaki libaku ya koyebisa ye te. Ayebisaki ngai ete akabolaki ba-kalati ya mabondeli. Kalati ya mabondeli B, mokama . . . (Moko kino mokama?) B. Malamu, biso, nabanzi, kalati ya mabondeli motángo ya liboso, B. Nani azali na B? Okoki . . . Soki okoki kotelema, kotombola loboko, soki okoki kotambola. Mwasi moko na nsima. Malamu, B, motángo ya liboso, motángo ya mibale, misato, minei, mitano, bóya *boye*. Mpe nakosenga na bana mike oyo soki bakoki koya awa, nsima na etumbelo, mpe báfanda awa sikawa. Malamu. Sikawa, sikawa bóyoka, bótinda bango, boleka na ngámbo wana

kuna, bino baoyo bozali na motángo ya liboso kino mitano, bóleka na nzela wana mpe bóya boye. Tika ete baoyo bazali na ngámbo oyo kuna, soki bakokoka, bázongela awa mpo na kokende na bakiti na bango. Sikawa, bana mike oyo bafandi awa, boya awa, nsima na etumbelo. Mpe nalingi ete bato bálekela awa, mpo nákoka kobondela mpo na bango.

<sup>246</sup> Sikawa, totala sikawa. Namoni. Nabéngaki motángo nini, moko kino mitano, boye te? Moko, mibale, misato, minei, mitano. Moko. . . Baoyo nyonso bazali na ba-kálati ya mabondeli kuna, moko kino mitano, bótombola maboko, mpo tóyeba soki bango nyonso batelemi. Ezali moko, mibale, misato, minei. Nazangi moto moko. Moko, mibale, misato, minei, mitano, ya B. Bino nyonso bozali nde moko, mibale, misato, minei? Moko, mibale, misato, minei? Mitano azali wapi, B? Mitano, zonga na nzela wana, madame. Malamu, misie, balukela na nzela wana. Ezali bongo. Kende óbaluka mpe zonga boye, mitano. Motoba, nsambo, mwambe, libwa, zomi. Malamu, B, kálati ya mabondeli motoba, nsambo, mwambe, libwa, zomi. Bomoni, tosalaka bongo, mpo mobulu ékota te, na nsima. Motoba, nsambo, mwambe, libwa, zomi. Sikawa nazui na. . . nakanisi. Ozali na kálati, mesie, oyo ateleme awa? Nsambo? Malamu, kende ngambo kuna, kende mbala moko ná bango. Nazui kaka mibale, nakanisi, kuna. Malamu, motoba, nsambo, mwambe, libwa, zomi, kálati ya mabondeli motoba, nsambo, mwambe, libwa, zomi. Nazui kaka mibale, awa. . . Ozali na kalati ya liboso, mesie? Bongo nde. Bango wana. Zomi, zomi na moko, zomi na mibale, zomi na misato, zomi na minei, zomi na mitano. Sikawa epesi moko, mibale, misato, minei, mitano. Malamu, zomi na motoba, zomi na nsambo, zomi na mwambe, zomi na libwa, ntuku mibale. Moko, mibale, misato, minei, yango. Malamu, ntuku mibale, ntuku mibale na moko, ntuku mibale na mibale, ntuku mibale na misato, ntuku mibale na minei, ntuku mibale na mitano. Moko, mibale, misato, kende kobaluka na nzela wana, misie, kende semba baluka, ókota na molongo, ntuku mibale na mitano, ntuku mibale na mitano. Bósunga ye kuna, bólekisa ye na nzela moko to mosusu oyo alingi. Tálá, ndeko, awa, bafungoleli yo nzela awa. Bandeko bafungoleli yo nzela awa. Moto moko ásungu ye kuna, soki bokokoka. Bótika ye áleka wana mpo ákota na molongo kuna. Bóyoka, bófandisa ye wana, mpe ntango motángo na ye ekobéngama, bótelemisa ye kuna. Bomoni? Ntango motángo na ye ekotángama, bókotisa ye na molongo. Malamu, nakanisi ete bakoki—bakoki sikawa.

<sup>247</sup> Sikawa, bato boni awa bazali na kálati ya mabondeli te, kasi botii motema, ba—bondimi mpenza ete Nzambe akoki kobikisa babeli? Bótombola maboko. Bondimi yango? Bato boni kati na bino awa bauti na. . . bayebi ete nayebi bango ata moke te, ete nayebi bokono na bango ata moke te? Bato bazali—bazali awa, sikawa, tabernacle na ngai (Moko kati na bino bapaya.), nazali

mpenza komona moto moko te, longola kaka batei oyo. Kuna, namoni moto moko oyo nayebi. Nazalaka awa mingi mpenza te, bomoni, mpe bazali kaka bato oyo bauti na bisika nyonso. Bato boni awa . . . Bótika ete nátalisa bino yango. Bato boni awa bayebi ete nayebi makambo na bango te? Bótombola maboko. Bótala awa. Bomoni? Bomoni? Botomboli maboko liboso na Nzambe, bomoni. Nayebi makambo na bango te. Sikawa, nayebi te, ekoki kosalema ete nábenga moto moko na molongo ya mabondeli boye, oyo nayebi mpenza, kasi nayebi ntina oyo bango bayeli awa te. Bomoni, nayebi ntina oyo bango bayeli awa te.

<sup>248</sup> Sikawa, oyo nazali koluka kosala ezali, komema bino mpo bósosolo yango, sikawa bótala malamú, “Misala oyo Nazali kosala, bino mpe bokosala yango.” Bondimi yango? Bondimi ete Akondimisa Liloba yango? Malamú. Alobaki ete Akomimonisa lokola Mwana na moto na nsuka ya eleko ya lingomba, boye te? Bato boni? Mpe mokili ekokóma, ekozala na lolenge ya Sodoma ná Gomora? Bondimi yango?

<sup>249</sup> Sikawa, Billy, mpo na nini otiki bango báleka boye te? Iyo, malamú. Ee, bongo, malamú.

<sup>250</sup> Na—na nsuka ya eleko, Akomimonisa Ye moko. Sikawa, bótala, bozali kosósola ete, na bongo, likambo yango ekoki kosalema ata moke te? Sikawa, bótala ndenge bato batelemi na molongo oyo, baoyo namóná naino te na bomoi na ngai. Bato mosusu bafandi kuna, baoyo natikálá komona te. Kasi, bóbosana te, Baebele 4:15, nabanzi ezali yango, oyo elobi ete “Azali Nganganzambe Mokonzi sikawa, oyo akoki koyoka mpasi elongo na bisokati na bolembu na biso.” Ezali solo? Sikawa, soki Azali Nganganzambe Mokonzi, na bongo, Azali Baebele 13:8, boye: “Ndenge moko lobi, lelo mpe libela.” Ezali bongo? Sikawa, Akomimonisa Ye moko ndenge nini? Ndenge nayebisaki bino, Alobaka ntango nyonso na nzela na basakoli na Ye. Atindaka ntango nyonso nsa—nsa—nsa—nsango moko liboso ya kosambisama. Na makambo nyonso, Abongolaka lolenge na Ye ata moke te.

<sup>251</sup> Akánaki na elanga ya Edene, ndenge Akobikisa moto, na nzela na makila oyo esopani, ya moto oyo ayebi-mabe-te. Abongolá yango ata moke te. Bisó tolukaka kobongola yango, na nzela na koyekola, na nzela ya ba-ndako milai ya Babéle, na nzela na bingumba minene, ná makambo nyonso ya ndenge wana. Tolukaka kobongola yango, kasi esimbaka te. Tolukaka kobongola yango, na nzela ya kotángisa mokili mpo bándima Ye. Tolukaka kobongola yango, na nzela ya denomination ya bato. Esimbá ata moke te. Esika bobele moko oyo moto akoki kokutana mpo na kosámbela, ezali na nsé ya Makila. Bardenomination na bino ekokabola bino, kasi na nsé ya Makila, bozali ndenge moko. Abongwanaka ata moke te.

<sup>252</sup> Sikawa, soki Azali Nganganzambe Mokonzi oyo

abongwanaka te, mpe ndenge moko lobi, lelo mpe libela, na bongo, Asengeli kotosa Liloba yango. Ezali te mpo biso tolobaki nde Asálaki, kasi mpo Ye alobaki ete Akosala. Bomoni? Sikawa, sikawa, soki Alingi kosala yango. . . Sikawa, tótelema naino mwa moke, tókanisa. Sikawa, bato boni kati na bino, na molongo ya mabondeli oyo, boyebi ete nayebi eloko moko te na ntina na bino, bokono na bino? Na bongo, bótombola maboko, boyebi eloko nini ngai. . . Bato boni, na molongo ya mabondeli, bayebi ete nayebi ata bino te? Bótombola maboko.

<sup>253</sup> Bótala na kati ya eyanganelo, bomoni. Sikawa, bino baoyo bozali kuna, bozali na ntina ya kozala awa te, bósimba kaka elamba na Ye. Bóloba kaka, bóloba: “Nkolo Yesu, nandimeli Yo.” Sikawa bóloba: “Nandimi Yango. Mpe na—nandimi ete—ete Okoki komonisa na Ndeko Branham, mpo. . .”

<sup>254</sup> Sikawa, ezali te mpo ezali Ndeko Branham, azali kaka moto lokola bato nyonso. Mpe ntango mosusu soki Konetolama esalemi na ntongo oyo. . . Bokanisaka na ntina na Konetolama? Soki Konetolama esalemi na ntongo oyo, nazali koloba yango na komikitisa, na ntembe te, ndambo ya eyanganelo oyo, soki tokei kokokana na—na ba-diplome, kokokana na esika oyo tosengeli kozala, ndambo kati na bino bakokende liboso na ngai. Ezali solo. Nazali te. . . Bótala mokumba oyo nazali na yango, mpe ndenge—ndenge namemaka yango kozánga eyóngi. Nazali mosali ya mpamba mpo na Klisto, koyeba makambo oyo nayebi na ntina na Ye, bongo nábika ndenge nabikaka; na bomoi ya mabe te, ya mbindo te, eloko moko ya ndenge wana te, Nzambe ayebi ete ezali solo. Bomoni? Namekaka kobika malamumu, kasi na—na—namónaka lokola nakokaka kokómisa likambo yango na esika oyo esengeli te. Ntango mosusu soki ezalaki moto mosusu, ntango mosusu oyo atángá mingi to eloko moko bongo, bakokaki kokómisa yango epai na bato. Kasi, na nsima, wana tozali mpe kokanisa, ezali te ete bato nyonso bakosósola yango, ata bongo. Bomoni? Bomoni? Bomoni, Ayebi eloko oyo Ye alingi kosala. Na bongo, namitikaka kaka epai na Ye mpe nalobaka: “Nkolo, nazali na maboko na Yo, sálá na ngai ndenge Omoni esengeli.” Sikawa, soki Yesu Klisto azali ndenge moko lobi, lelo mpe libela. . .

<sup>255</sup> Sikawa, nakanisi ete nayebi mwasi oyo. Nazali lisusu koyeba ye malamumu te, kasi nayebi ye. Nayebi ye, na lolenge moko boye. Kasi nasílá komona elongi na ye, kasi na—nazali koyeba malamumu mpenza te, sika-sikawa. Kasi na—na—nayebi ye, na lolenge moko boye. Yo oyebi ngai te? Ah-ha. Na—nakanisaki, nazalaki kotala elongi na ye, nakanisaki ete nayebi ye, kasi nabosani nkombo na ye. Kasi nakanisi ete ye. . . Mobali na yo te moto. . . Ezali yo te mwasi oyo asálaka na. . . Mobali na ye asalaka na Seven—Seven—Seven. . . to Seven-Eleven, to na eloko moko ya ndenge wana, kuna na New Albany. Mme Agan, ezali solo. Sikawa, osílá kozala awa, koya na losambo. Roy, ezali ye te oyo tokendeki



epai na ye mokolo moko na . . . Ezali ye oyo—ezali ye oyo azalaki kuna na ngomba? Olobi nini? Ndeko na ye ya mwasi. Ezalaki ye, ndenge wana, bomoni. Namikaniseli ete ngai ná Roy tozalaki kotámbola elongo, na motuka, atángaki nkombo yango, mpe Nkolo atindaki ngai kuna, mpe abikisaki mwasi yango kaka kuna. Iyo, misie, euti kozongela ngai na makanisi.

<sup>256</sup> Sikawa, kasi mpo na koyeba mpasi na yo, nazali na likanisi moko te. Oyebi yango. Kasi soki Nkolo Yesu akoki koyebisa ye likambo moko oyo asáláki. To soki ntango mosusu azali—azali na mikakatano ya mbongo. Ntango mosusu ye ná mobali na ye bazali na mwa mindondo, ntango mosusu ye ná bana na ye, ntango mosusu moko na bana na ye, soki azali na bana, nayebi te. Kasi soki azali na bango, ntango mosusu bana na ye mosusu bazali—bazali kotelengana-telengana. Ntango mosusu azali awa mpo na koyeba likambo moko na ntina na yango. Nayebi te. Nazali na makoki ya koyeba yango te. Na—na—nayebi yango te. Kasi Ye ayebi. Bomoni? Boye, bomoni. Boye te?

<sup>257</sup> Bóyoka, sikawa bosimba likambo oyo malamú mpenza. Natikálá koloba yango na eyanganelo te liboso, kasi nayoki kokambama mpo na koloba yango sikawa. Liloba ezali eloko nini? Ezali likanisi oyo elobami. Sikawa, ndenge nini nakoki koloba likanisi ya mwasi oyo, to ndenge nini nakoki koyebisa ye likanisi na ye? Esengeli kozala likanisi moko oyo etalisami, kasi ye akoki kosala yango te. Boye, nasengelaka koloba likanisi ya Nkolo, mpe soki ezali solo . . . Soki ezali likanisi ya Nzambe, ekozala solo; soki ezali likanisi ya Nzambe te, na bongo, ekozala solo te; ye mwasi oyo akoyeba yango, bino bokoyeba yango, bato nyonso bakoyeba yango. Bomoni, nzela mosusu ezali te. Esengeli kozala Nzambe, to Nzambe te. Ngolu na Ye ekoki. Sikawa bódima, sikawa, bino nyonso.

<sup>258</sup> Mpe bato boni bakondima? Ee, ntango mosusu bomóná naino moko na mayangani ya boye te liboso, kasi soki Nzambe asali yango, bokondima? Na bongo, bino baoyo bozali kuna sikawa, bino baoyo bokokota na molongo ya mabondeli te, bino—bino mpe bóbóndela, bomoni. To mpe, soki bokoya na molongo ya mabondeli, ózala nani, bóbóndela kaka.

<sup>259</sup> Nkolo Yesu, sikawa nazui ntango mingi, kasi ezali mosala na Yo, Nkolo. Mpe nasali nyonso oyo nakoki kosala lokola moto, kasi Yo ozali Nzambe, sikawa oyo etikali ezali na maboko na Yo, Tata. Tika ete éyebana ete Ozali Nzambe, mpe Liloba na Yo ezali solo. Ndimisa Liloba na Yo, Nkolo, ya mokolo na nsuka oyo, ntango Mwana na moto akomonisama. Amitalisaki na bato ndenge nini? Azalaki Liloba. Liloba ezali eloko nini? Esósolaka makanisi mpe bamposa ya mitema. Asósolaki makanisi na bango, Ayebisaki Petelo, Filipino, Natanaele, mwasi na libulu ya mai, ná bamosusu nyonso kuna, ete ntango bakoya, Ayebaki ete mwana mwasi yango alálaki mpongi, akufaki te. Nabondeli, e Nzambe, ete Ósalela mingombo ya komikitisa na biso lelo,

bifandelo ya mokili, mpo Ókoka komitalisa Yo moko na bato. Na Nkombo na Yesu Klisto. Amen.

<sup>260</sup> Sikawa mpo na kobikisa bokono, ngai nakoki te, boyebi yango. “Likabo ezali eloko nini, Ndeko Branham, eloko moko oyo moto akoki kozua?” Te. Ezali eloko oyo ekoyebisa yo ndenge ya komilongola na nzela. Bomoni? Na ntango nyonso oyo yo ozali wana, ekosimba ata moke te. William Branham azali mongúna monene koleka oyo nazali na ye. Bomoni? Kasi soki nalongoli ye na nzela, bomoni, na ntango wana, Yesu Klisto akoki kosalela nzoto yango. Bomoni? Bomoni, sikawa, nazongi epai ya mwasi oyo. Sikawa, ezali nini? Sikawa tóloba soki—soki a—soki azalaki na bokono.

<sup>261</sup> Bótala mwasi moko awa, oyo atii lokolo na ye likoló ya—na kiti. Sikawa, soki ngai. . .soki Yesu azalaki awa, Alingaki kokende kotia maboko na Ye likoló na mwasi yango, lokolo yango elingaki kobonga. Ntembe ezali te mpo na yango. Kasi, bomoni, biso tozali bato na maboko ya mbindo. Maboko na Ye ezali búle, Nzambe atátolaki Ye. Azalaki Liloba. Bondimi yango? Solo mpenza, Azalaki na ntembe ata moke te. Alingaki kotia maboko na Ye likoló na ye, koloba: “Mwana mwasi, bíká” mpe alingaki kobika. Kasi mpe Apesaki biso etínda ya kosala ndenge moko. Nakanisi ete Asílí kotalisa yango polele.

<sup>262</sup> Sikawa, bongo soki Apesi ngai emononeli, mpe Ayebisi mwasi oyo likambo oyo asengeli kosala? Yango, ee, ngai nandimi ete, na bongo, soki natieli ye maboko, akobika. Bino bondimi yango? Kasi, bongo soki Apesaki emononeli te? Emononeli ekosala nini? Ekopesa ngai bobebe kondima. Kopesa kondima na ngai, nguya ya Nzambe oyo emonanaka te. Bomoni? Sikawa, soki yo, moko moko bino nyonso okufi na miniti oyo, okomona ata moke te ndenge *yo* ya yo ekotika nzoto na yo. Makoki na yo nyonso ya bongó, nyonso oyo ozali ekokende, kasi ata moke te okomona yango kokende. Bomoni? Ekozala e-. . . Makasi oyo esalaka ete náningisa maboko na ngai, ezali makasi, boye te? Makasi oyo ekoki kosala ete nákanisa, makasi oyo esalaka ete náteya, makasi oyo esalaka ete názala na bomoi, násala makambo, makasi yango moko, oyo ekoki kopesa mpiko na nzoto oyo, ekotika yango, kasi okomona makasi yango kokende te. Ezali makasi oyo emonanaka te. Kondima mpe ezali bongo! Bózanga likambo oyo te. Kondima! Mpe Yesu alobaki: “Bakotiela babeli maboko.” Sikawa, bomoni, soki nakendeki, mpe nazuaki emononeli mpe natielaki mwasi oyo maboko, nandimi ete akobika, mpo namonaki emononeli, elikia na ngai ezali na emononeli. Kasi ezali boni mpo na Liloba? Kotiela ye maboko ná kondima moko wana. Emononeli epésamaka kaka mpo na kopesa mpiko na kondima na ngai ná kondima na bino. Ná kondima moko wana, kozanga emononeli, ekosala kaka ndenge moko. Bato mosusu bapésáma kondima ya monene. Bamosusu bazalaka na kondima ya ndenge wana te, bapésamaka

bimononeli mpo épesa bango kondima yango. Bomoni? Sikawa, bomoni, ekozala kaka maboko moko wana ya mbindo, ekozala kaka moto yango, kasi akotiela bango maboko.

<sup>263</sup> Sikawa, tika ete Molimo Mosanto átatola Bozali na Ye, átatola Liloba na Ye oyo Alakaki. Sikawa, nabosani lisusu nkombo na yo. Nkombo na yo nani, sikawa? Agan. Ee, Akokaki koyebisa ngai yango soki Alingaki, bomoni, kasi nazali kaka koloba ete na—nayebi ete nayebi yo. Sikawa, pusana naino awa mwa miniti moke, mwa mpembeni koleka, bato mosusu batelemi wana, bazali kobondela, bomoni. Ezali. . . Sikawa, Mme Agan, soki na—soki nazali mosali ya Klisto, mpe nauti koteya Liloba oyo ngai nandimaka ete ezali Solo, yo ondimi yango? [Madame Agan alobi: “Iyo.”—Mok.] Ondimi yango. Sikawa, soki ozali na bosenga ya eloko moko, ngai nakoki kopesa yo yango te, mpo nazali na yango te mpo na kopesa; lobá bobele soki ezali ntango mosusu mwa mbongo to eloko mosusu, to nakoki kokende kosolola na mobali na yo to bana na yo to balingami na yo to bamosusu, nakokoka. Kasi soki ozali na bosenga ya lobiko na nzoto, ngai nakoki kopesa yo yango te, yango esilá kosómbama. Kasi na nzela ya likabo, nakoki kosala ete ósósola, soki ozali na kondima, ete esilá kosómbama, mpo Ye Oyo asómbáki yango, Moto bobele moko oyo okoki kondimela, ezali Mwana na Nzambe. Mosombi yango azali awa. Bomoni? Ezali bongo? Mosombi yango azali awa.

<sup>264</sup> Sikawa, oyebi ngai lokola ndeko mobali, motei, mpe ngai nayebi yo lokola ndeko mwasi. Toyebi Ye lokola Nzambe. Sikawa, soki Moto yango, oyo amonaka te, na nzela na likabo oyo nazali na yango ya komilongola na nzela, akoki koyebisa ngai, koyebisa yo na nzela na ngai, na bibebu na ngai, bomoni. Sikawa, ntango nabondelaka, Nzambe amonaka ngai te, Ayokaka kaka mongongo na ngai na nzela na Makila ya Yesu. Bomoni, Amonaka ngai te, Ayokaka mongongo na ngai. Mpe Makila yango, kuna, etalisaka eloko oyo naséngaka. Bomoni? Na bongo, Ayókaka mongongo na ngai, kasi Amonaka kaka Makila. Bomoni, Amonaka ngai te, boye, nakoki kozala na mbindo te soki nazali na nsé ya Makila. Makila epetolaka. Bomoni, Azali parechoc katikati na ngai ná Nzambe, mpe Alakaki ete: “Nyonso oyo bokosenga na Tata, Nakosala yango.” Bondimi ete ezali solo?

<sup>265</sup> Sikawa, soki bato nyonso. . . ezali lokola. . . Bokoki komona eloko oyo ezali kosálema? Bótala eloko oyo ezali kokota awa, Póle moko, ya lángi ya wólo, ezali kobaluka zinga-zinga.

<sup>266</sup> Sikawa mwasi oyo akokaki kobomba yango te, ata ndenge nini. Te, te. Oyei awa uta na mbano ya likambo moko oyo ekómelaki yo. Ozali na bokono ya pneumonie, mpe okotaki na lopitalo. Ozalaki na kati ya héma ya oxygene. Mpe mpasi na yo euti na mbano na yango. Okobika. Yesu Klisto akobikisa yo, namoni yango. Kóbá kondima yango. Kóbá kondima yango, Ndeko mwasi Agan. Nakotiela yo maboko, na Nkombo na Yesu.

Nzambe ápambola yo, ndeko mwasi. Kende, sepéla sikawa, kotia ntembe na likambo oyo Ye alobaki te.

267 Nsango nini, ndeko mwasi? Na—nandimi te ete nayebi yo. Toyebani te. Sikawa, bótala mwasi oyo, nayebi ye te. Nayebi yo te. Nazali na makoki te ya koyeba yo. Kasi ondimi ete Nzambe akoki komonisa ngai, na nzela na Liloba na Ye, mpo, omoni, mpo Alakaki yango? Ondimi ete Akoki koyebisa ngai likambo moko na ntina na yo? Yango ekosala ete óyamba yango, ezali bongo, koyeba ete ezali ngai te ndeko na yo, ekozala nde Ye, Mobikisi na yo. Ondimi yango? Lipasó ezali kozela yo. Bayebisaki yo ete osengeli koleka na lipasó. Ondimi ete Akoki koyebisa ngai ntina ya lipasó yango? Ezali na kati ya libumu, na kati ya misopó. Ezali mpenza bongo. Olingi kokíma yango. Ozali kondima sikawa, wana Molimo oyo ezali awa, Molimo ya Klisto ezali zinga-zinga na biso mpe eteleme likoló na ngai . . . ? Oyebi ete eloko moko nde esengelaki koyebisa yo yango, mpo ngai nayebi yo te. Ondimi ete soki natieli yo maboko, ekomema kondima oyo nazali na yango, ná yo, ná kondima na yo, mpe liboso na Nzambe, Tata na biso, ondimi ete okobikisama? Na bongo, Nkolo Yesu, natosi etinda na Yo, ntango Olobaki: “Bilembo oyo ekolanda baoyo bakondima. Soki batieli babeli maboko, bakobika,” tika ete ndeko na biso ya mwasi ábika mpo na nkembo ya Nzambe; na Nkombo na Yesu. Amen. Sikawa kóbá, te, bósana yango mpenza, omoni, kóbá kondima yango na motema mobimba.

268 Nsango nini? Nalobi bongo kaka mpo nákota na boyokani ná molimo na yo, madame. Ndenge Yesu asalaki na libulu ya mai, Alobaki: “Pésá Ngai mai ya komela.” Sikawa, nandimi . . . Nandimi te ete nasílá komona yo, nakanisi ete nayebi yo te. Boye te? Soki ezali bongo, tómbola loboko mpo bato bákoka komona. Madame oyo, nayebi ye te.

269 Oyo ezali kobikisama ya solosolo, ezali kondima ya solosolo, Makomi ya solosolo, Liloba na Nzambe oyo esangisami te, oyo ezali kotalisama mpe kondimisama ete Akufi te. Azali na bomoi libela na libela. “Mpe ye oyo akondimela Ngai, misala oyo Nazali kosala, ye mpe akosala yango, mpe mondimi oyo akotiela babeli maboko mpe bakobika.” Oh, ndenge nini bokoki kotiela yango ntembe? Bomoni? Sikawa, Ayebaki nani akondima mpe nani akondima te, ngai nayebi te. Oyo wana etali Ye.

270 Kasi sikawa, soki madame oyo azali mopaya . . . Nayebi ye te, namóná naino ye te na bomoi na ngai. Azali mama-moke, elenge mingi koleka—koleka ngai. Kasi na—natikálá komona ye te. Mpe azali awa na ntina moko. Ondimi ete makambo oyo nauti koteya na Biblia, madame, ezali Solo? Ondimi ete ezali Solo. Mpe oyambi Yango, ezali te mpo ngai nalobaki Yango, kasi mpo Nzambe nde alobaki Yango?

271 Ondimi ete tozali kobika na mikolo ya nsuka, ntango Mwana na moto asengelaki kotalisama? Ekozala Liloba nyonso oyo

esangisamaki, na ntango ya Luther, Wesley, ba-Batiste, ná nyonso wana, ná ba-Pantekotiste, yango nyonso ekosangisama kino na emoniseli ya makambo nyonso oyo yango ezalaki. Mwanje ya nsambo asengelaki kofungola libómbami ya bilembo motoba. Nyonso wana esengeli kosangisama na kati ya Mwana na moto, litondi na Ye ya ntango ekómi na litondi ya Liloba na Ye, mpo na kotalisa litondi ya Nzoto na Ye. Oyo wana *nde* Liloba, na bongo, oyo wana *nde* Liloba lilobami litalisami polele na nzela ya Liloba, mpo na komonisa Liloba.

<sup>272</sup> Sikawa, soki Nzambe akoki koyebisa ngai bampasi na yo, mpsi na yo, kútu. . . Ye *nde* asálá yo, Ayebi makambo na yo nyonso. Mpe soki Akoki komonisa yango. . . Ozali komonana lokola ozali na nzoto kolongonu. Kasi soki Akoki komonisa ngai yango, okoyeba soki ezali sólo to te. Okoyamba yango? Sikawa tala ngai na miso. Na ntembe te, olátaka matalatála, osengelaki ko—koláta yango. Oyei awa mpenza mpo na yango te. Namoni ete Ezongaki mpenza nsima, bomoni. Sikawa, oyei awa mpo na libanga ya makila na mosisa na yo. Bomoni? Bomoni? O—ondimi ete Akoki koyebisa ngai esika yango ezali? Na makolo na yo. Ondimi ete Nzambe *nde* azali kosala yango? Ondimi ete Nzambe akoki koyebisa ngai mingi koleka na ntina na yo? Hein? Ezali malamumu ndenge ozali mopaya, mpe ngai. . . kosolola na yo mwa moke. Ondimi ete Akoki, ondimi ete Akoki koyebisa ngai esika outi? Outi na Gary, na Indiana. Ondimi ete Akoki koyebisa ngai nkombo na yo? Mme Ogden. Ezali ya solo. Sikawa zóngá na ndako mpe bíka, na Nkombo na Yesu Klisto. Bomoni?

<sup>273</sup> Nsango nini? Bisó mibale mpe toyebani te. Ngai nayebi yo te, bomoni. Kasi ondimi ete Nkolo Yesu akoki komonisa ngai mpsi na yo? [Ndeko mwasi alobi: “Nayebi yango.”—Mok.] Oyebi yango. Natondi yo, ndeko mwasi. Ezali mpenza malamumu. Malamumu, lokola oyebi yango, na bongo, hernie yango ekosila. Mpe ozali na—mpe ozali na—na litutu moko na mopanzi na yo. Ezali solo, boye te? Olingi ete náyebisa yo na mopanzi nini yango ezali? Ezali na mopanzi na yo ya mobali. Ezali mpenza bongo. Sikawa kende liboso mpe ndimá yango, mpe okobika.

<sup>274</sup> Bondimi? Na ntembe te, ezali Solo. Bondimi ete Mwana na Nzambe, Mwana na moto akitaki na kati ya bileko ndenge Alakaki? Kasi, *nde*, bondimi ete mokili ekómi na lolenge ya Sodoma, ebélemi mpo na kobebisama na móto, lokola Sodoma? Bato ya Sodoma bazalaki bato ya Mabota, bóbosana te. Kasi kuna, na Sodoma, mwa bato ya boyengebene bazalaki kuna, Nzambe atindaki motindami mpo ábimisa bango; bamoko kati na bango babimaki, bamosusu babimaki te, mingi kati na bango batikalaki. Kasi etonga moko ezaláki likoló ya ngomba, Abraham, mpe Motindami moko ayaki epai na ye, mpo na kolakisa ye eloko nini elingaki kosalema. Ye alingaki kozala na kati na yango te, ata bongo. Kasi *nde*, lelo, mokili ekómi na lolenge moko wana, mpe Yesu Klisto azali Mwana na Nzambe,

Mwana na moto, Mwana na Dawidi, mpe Ayei mpo na komitalisa Ye moko.

275 Nauti komona likambo moko, oyo ekómeli mwasi oyo. Ayei awa na ntina moko ya motuya. Ayei awa mpo na bokono te. Boyebi eloko nini alingi kosenga ngai? “Nátiela ye maboko,” mpo “ázua libatisi ya Molimo Mosanto.” Bomoni? Bomoni? Ezali bongo te? Tombola loboko soki ezali bongo. Bomoni? Bomoni, azali na eloko ya motuya mingi. Molingami Tata na Likoló, pesa mwana na Yo oyo mposa ya motema na ye, tika ete ázua libatisi ya Molimo Mosanto. Boye akozua Yango. Amen. Okozua Yango, ndeko mwasi. Nzambe ápambola yo. Pesa Ye masanzoli mpe nkembo.

276 Ondimi? Bongo yo kuna, yo mpe ondimi? “Soki okoki kondima, makambo nyonso ekosalema.” Ezali komonana ete ozali mpenza na bosembo mpo na yango, ondimi ete libanga ya makila yango na mosisa ekoki mpe kolongwa? Yo oyo ofandi kuna, olati simísi ya lángi lokola mai ya pondu. Tombola loboko soki ondimi ete ekolongwa, ekolongwa. Naticálá komona mobali yango te na bomoi na ngai, nayebi ye ata moke te. Namoná ye te.

277 Bondimi yango, bino nyonso na eyanganelo? Sikawa, bozali komona te ete esengeli kozala Ye?

278 Cancer ezali mpasi te mpo Nzambe ábikisa yango. Akoki kobikisa yango, boye te? Ondimi ete Akobikisa yango? Malamu, na bongo kende, yamba yango, na Nkombo na Yesu Klisto. Ndimá kaka na motema mobimba.

279 Mbote, molingami. Oyebi, Yesu asopaki Makila na Ye, mpo—mpo makila na yo ézala malamú. Ondimi yango? Nzambe molingami, napamboli mwana oyo, mpe tika ete azongisama makila uta na Kalvari. Longola sukali nyonso, Nkolo, mpe tika ete ábika, na Nkombo na Yesu. Nzambe ápambola yo.

280 Nsango nini? Ondimi ete Akoki kobikisa mokongo wana mpe kosala ete ékóma malamú? [Ndeko mobali alobi: “Nayebi ete Akoki kosala yango.”—Mok.] Malamu, kende, ndima yango, zalá na kondima. Tika ete tótiela yo kaka maboko ndenge osengi yango. Nzambe ápambola yo, ndeko.

281 Ondimi? Asálá bilei mpo na kolia yango, Asálá libumu mpo na kobóngola yango. Mpe soki eloko moko ebebi na libumu yango, Ye azali Mobikisi na yango. Ondimi yango? Malamu, yango nde nyonso oyo osengeli koyeba, ndima na motema mobimba.

282 Lokola yo mpe ozalaki na bokono yango moko, kende liboso, ndima mpe na motema mobimba.

283 Ezali malamú, bóya na mwasi yango. Nsango nini? Mwana mwasi kitoko, azali mpenza moke mingi, mpo na kobela bokono ya basi. Ondimi ete Yesu akobikisa yo na yango? Nzambe molingami, mwana mwasi oyo, nalakeli mongúna oyo mabe,

wana tozali Liboso na Yesu Klisto, tika ete étika ye, tika ete ábika. Na Nkombo na Yesu. Amen. Ápambola yo molingami, okoyoka mpenza malamamu.

284 Ondimi? Sikawa elilingi moko ya moindo epusani, kufa. Cancer ezalaka te... Nzambe akoki kobikisa cancer mpe kosilisa yango. Ondimi yango na motema mobimba? Ondimi ete Akobikisa yo na yango? Na Nkombo na Yesu Klisto, nalakeli mabe eloko oyo elakelámá mabe, na nse ya ba-mbísi oyo esali ekulusu, tika ete Ekulusu ya Klisto élongola yango. Longola yango, na Nkombo na Yesu. Kotia ntembe te, kende, ndima na motema mobimba. “Soki okoki kondima, nyonso ekosalema.”

285 Nsango nini? Na ntembe te, arthritis na yo ekosila, mpe okobikisama soki ondimi. Ondimi ete okozala lisusu na makoki ya kotambola mpe okozala malamamu? Nkolo ápambola molingami ndeko mwasi oyo mpe ábikisa ye, na Nkombo na Yesu Klisto. Kende, kóbá kondima na motema mobimba.

286 Ondimi ete likambo yango moko ekoki mpe kosalema mpo na yo? Ee, nandimi ete esalemi. Oko... Soki, ondimi ete obikisami sika-sikawa? Ngai moko nandimi ete esili kotika yo. Na Nkombo na Yesu Klisto, tika ete ndeko na biso ákende mpe ákóma malamamu mpenza, mpo na nkembo ya Nzambe. Amen.

287 Sukasuka esalemi. Yo oyo ofandi kuna mpe ozali kolela, ondimi ete bampota ya libumu wana ekotika yo? Atikalaki kaka awa na ndambo ya ngonga oyo euti koleka, emonanaki bongo, liboso na ngai mpenza, Atelemi mpenza mpembeni na mobali oyo. Ozalaki kokóba kondima, boye te? Ondimi na motema mobimba, mpe okoki kozónge na Texas na nzoto kolongonu. Natikalá komona mobali yango na bomoi na ngai te.

288 Ondimi ete mwa mokongo wana ekobonga mpe obelemi mpo na kobikisama? Nkolo Yesu, simba mwana moke oyo mpe bikisa ye, na Nkombo na Yesu Klisto. Amen. Ndimba yango na motema na yo mobimba.

289 Sikawa Molimo yango epusani mpembeni, Etóndi na ndako mobimba. Ekómi mpasi mpo na koyeba esika nini yango ekoki kouta, motema likoló-likoló. Bótika ete nálakisa bino eloko moko. Bato boni bazalaka na motema likoló-likoló, kuna, bótombola maboko. Bomoni, ezali mpasi ya koyeba soki ezali nani. Kasi Nzambe ayebi nyonso wana, ba-mposa na bino nyonso. Bosalaki makasi nyonso mpenza, mpo na kolónge yango. Omekaka kotika makambo mingi na bomoi, mpe bolingaka kosalela Nzambe ná nyonso oyo ezali kati na yo. Emonanaka lokola eloko moko epekisaka yo. Bondimi ete ekosalema sika-sikawa, na ntongo oyo, okokangolama na makambo yango, boye te? Okondima yango?

290 Tata na biso na Likoló, mpo bato mosusu awa bámona ete Yo ozali Klisto, Mwana na Nzambe, bikisa molingami mwasi oyo ateleme awa, Tata, kitisa motema na ye. Bisó nyonso toyebi

mpasi oyo ezali kotungisa ye, Nkolo, mpe tobondeli ete Óbikisa ye. Wana natieli ye maboko ná kondima nyonso, ngai mpe nazali kobundisama sikawa, na bolembu makasi, Satana, surmenage, misísá kobeba. Tika ye, Satana. Natieli ye maboko na kondima na ngai nyonso, tika ye, na Nkombo na Yesu. Kende na yo mpe kóbá kondimela Ye. Yango nde olingaki ete násala.

<sup>291</sup> Nayebi yo te, ozali mopaya mpo na ngai. Língúndu wana, soki ondimi, ekosila. Mpe eloko mosusu, ozali na arthrite. Soki ondimi, okobika. Mpasi na yo ya mokongo etiki yo. Kende, kóbá kondima.

<sup>292</sup> Ondimi na motema na yo mobimba? Awa, wana . . . bato boni . . . Kaka bango nde bazalaki na molongo? Bato mosusu batikali na molongo? Bino nyonso bóleka awa mpo nákoka kotielá babeli maboko. Tógúmba mitó mwa moke, ngonga ya zomi na misato esili kobeta. Nzambe molingami, natieli ndeko na ngai ya mwasi maboko, wana epakweli ya Molimo Mosanto ezali awa. Bikisa ye, na Nkombo na Yesu. Molingami Tata na Likoló, natieli ndeko na ngai ya mobali maboko . . . [Maloba mazangi na bande.—Mok.] . . . ondimi.

<sup>293</sup> Oh, babondelaki mpo na yo te, ndeko mobali? [Maloba mazangi na bande—Mok.] . . . ndeko mobali, boyebi eloko nini asalaki? Azali moto na bokila ya mbuli ya kala. Alobi ete azali na bondóki moko oyo abomaka na yango ntango nyonso mbuli, alobi ete akómi mobange mingi sikawa, akoki lisusu kokende bokila te. Alingaki komema bondóki yango mpo na kokabela ngai yango. Amen. Tóloba: “Nkembo na Nkolo.” [Losambo balobi: “Nkembo na Nkolo.”]

Nalingi Ye . . .

Kobosana te mwa motuna na yo, tia yango awa. Soki ozali na yango lelo te, yaka na yango mokolo ya Misato to ya Lomingo.

Mpo Alingaki ngai liboso

Mpe Asombaki . . . (Bino nyonso bozalaki na molongo ya mabondeli, molongo ya mabondeli?) . . . lobiko

Likoló na Ekulusu.

<sup>294</sup> Bókanisa ndenge Azali malamú mpo na biso, sikawa. Bókanisa naino, Azali kondimisa Liloba na Ye! Bomoni? Sikawa bomoni, soki ngai nakokaki kobikisa, elingaki kozala ndenge mosusu, bomoni, kasi Ye azali Ye oyo asílá kosala yango. Bomoni? Boye, Azali mpenza kondimisa Bozali na Ye awa: “Nazali Ye oyo akufaki, mpe Nazali na bomoi libela na libela.” Moto lokola Ye atikálá kozala te. Azalaki mpenza Moto ya ndenge na Ye moko. Azalaki Nzambe. Bomoni? Etikálá kozala na moto moko te oyo abiká lokola Ye abikaki. Etikálá kozala na moto moko te abotámá lokola Ye abótámaki. Etikálá kozala na moto moko te oyo akokaki kosala oyo . . . lokola Ye asalaki. Etikálá kozala na moto moko te oyo akufá lokola Ye akufaki. Etikálá kozala



na moto moko te oyo asékwá na bakufi lokola Ye asekwaki. “Oh,” okoloba, “zela naino, Ndeko Branham, bato mosusu mpe basékwá na bakufi.” Iyo, kasi bakufaki lisusu. Kasi Ye azali na bomoi libela na libela. Bomoni? Ata mokolo moko te moto moko asékwá lokola Ye. Asékwá longwa na bakufi, mpo na libela na libela.

<sup>295</sup> Tóyembela Ye yango sikawa.

Oh, nalingi Ye, nalingi Ye  
Mpo Alingaki ngai liboso  
Mpe Asombaki lobiko na ngai  
Likoló na Ekulusu. . .

Tógumba bobele mitó.

<sup>296</sup> Nkolo Yesu, nalingaka bato oyo. Mpe naumisi bango Nkolo, ezalaki mposa na ngai te ete násala bongo. Kasi awa, mingi kati na bango bazali na bana mike oyo bazali kozela, bazali na nzala, bazali kosósola te. Kasi bafandi kaka wana, mpo bayebi ete moto akoki kobika te, soki na Liloba ya Nzambe te. Na bongo, ntango Liloba ezali kolobama, na nsima emonisami, etalisami polele, endimisami, na bongo bayebi ete ekoki kozala bobele Yo. Nabondeli mpo na moko na moko. Pámbola bango, Tata. Tika ete bázala na nzoto kolongonu ná makasi mpo na mobembo oyo ezali liboso na biso. Pambola bango na kati ya mpóso oyo. Mpe soki ezali mokano na Yo, Nkolo, ete tókoka kokutana lisusu awa mokolo ya Lomingo ekoya, Sabata ekoya, mpo na koya kokumbamela awa, nabondeli, e Nzambe, ete Opesa bango makasi. Ntango mosusu bamosusu kati na bango bakoya te, bamosusu bakosengela kozonga na ba-ndako na bango na bisika denge na denge na ekólo, ntango mosusu bakokátisa mbu, to bakokende libanda na Amerika. Tobondeli ete Yo ózala na bango mpe ósunga bango. Tika ete tókutana na makolo ya Yesu, mokolo moko. Kokisa yango, Tata. Sunga biso sikawa, wana tozali kolingana, mpe tondimeli Yo, mpe tozali na elikia ete, mokolo moko ekanganelo oyo esangisi mitema na biso sikawa, ekokóma nsinga ya Seko, tika ete tóbika na Engumba yango, oyo ezali na nsonge minei, Libela na libela. Na Nkombo na Yesu. Amen.

Malamu.

Mema Nkombo na Yesu,  
Mwana na. . .

Sikawa bópesana mbote ya loboko.

. . . bolozji;  
Ekopesa yo esengo. . .

Baluka mpe pesa moninga mbote ya loboko, loba: “Nasepeli kozala awa elongo na yo, na ntongo ya lelo.”

Mema Yango bisika nyonso okokende.

Nkombo kitoko, O ya boboto! (Nzambe  
ápambola yo, Ben.)

Elikia ya mokili mpe esengo ya Lola;

Nkombo kitoko, O ya boboto!

Elikia ya mokili mpe esengo ya Lola.

Sikawa, báyoka eteni oyo sikawa, sikawa báyemba boye:

Mema Nkombo na Yesu,

Lokola nguba liboso na motambo nyonso;


(Sikawa báyoka na bokebi.)

Wana komekama ezingi yo, (Okosala nini?)

Loba Nkombo mosanto yango na libondeli.

Nkombo kitoko, (Nkombo kitoko!), O ya  
boboto!

Elikia ya mokili mpe esengo ya Lola;

Nkombo kitoko . . . 

64-0816 Kondimisa Liloba Na Ye  
Branham Tabernacle  
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)